

Mbεε Bhaadal ε Luk Luk Mεkpa mε mεken

Tye wat ne Matye, Luk baazodu to ekwyla be ε, ezel ε wat ne Malak.

Zan Nduuel-bot nazyε ε zεkoobal Yezu ze. Zan eeduu Yezu Zεeb. Bhii tak, Satan naawa Yezu ε mebhowal. Yezu nadi ε mot kyee dik Ghalile, pe nye nakan elyo ne etsik ε membεl ε.

Ye εpekaada dāa Yezu nazεdus Ghalile tō pe ghaada Yeluzalem ε. Ye εpekaada dōo ne etεp djas Yezu nasa dwoο nye nagom ε, ne dāa nye nabyet tō to gwoo ε. Zεbela nāá, Luk naabaabil bεdhiiti etεp ee Malak nadi āākwyal ε.

Luk nakan εkaada ε dāa nye nasa zii ε εσεεga, etεp egu enyōεpe etεp djas Yezu nasa ε ne etεp ee nye nalii ε. Tin, nye naakaada bεtε ne etεp dum ne εbyel ε Zan Nduuel-bot, zenōo ye Yezu. Nye nakaada ε dāa fofop ε Ghεη nalyaal Zakali ne Maali nyel ε, dāa ye nadhaa ε sok Elisabet ne Maali nabya ε, dāa Maali, Zakali zenōo Simeyōη naduwal Zεeb ne djeeb ε, dāa Yezu nalik to Ndjaa-ebuwa nye dinaa dhōma ε (1–3).

Ye baakaada ε, etō ε Yezu pe Yeluzalem. To elanel εlak, Luk nakaada kana dhiiti mot na mbεε lyem dεl ε Samali, kana mot ekum, kana mōn nawo o. Zenōo bεdhiiti etεp, tyee ye Maat ne Maali, bot ε namyaal nāá, Yezu sulal pe daa lōo o (10.35–15.32).

To etεp bak djas, Luk nadi ekwyel elyaal ε ghwyil ne mεbwala ε Yezu. Nye baalyaal ε nāá, Yezu nadus ε pe daa Zεeb, ne tseetse nāá, nye ε mot mbyak

Yisalael, nyε nazyε é étεp bot ε membyak djas. Nyε baakwyel εlyaal ε, dáa Zεεb di ekwyel bot ε di ebeεaá é mis toto ɔ. Ye é mot dáa Elisabet, mot nadi kwyiid moma ɔ, bεbaalel ε etaa, nε bεdhiiti bot ε lɔɔg tak.

Luk nakwyel ε εgoola Mbεε Bhaadal pε daa bot ε di ààbε bot ε mbyak eYuda ɔ. Kɔ εsu ε tak ε di náá, tɔ bεmekana mεná mε Mbεε Bhaadal di ekwyala ε, yε Luk nε kɔa nε belanel ε membyak djas. Nyε nakwyal deenεk é, étεp bε neegu εsuk ε duma ε Yezu, bε neemyaal náá, nyε é Metsik-bot étεp bot ε bɔs djas.

Mekana mε tak kaada ε etεp bak:

Elanel 1.1-4: Esuk ε ekwyala bak

Melanel 1.5—2.52: Ebyel ε Zan Nduuel-bot nε yε Yezu, zenɔ edhɔma bɔɔ

Elanel 3.1-20: Mεsa ε Zan Nduuel-bot

Melanel 3.21—4.13: Eduwa Yezu naduwa Zεεb ε, nε mεbhowal mε

Melanel 4.14—9.50: Mεsa ε Yezu pε Ghalile

Melanel 9.51—19.27: Yezu eedus pε Ghalile tɔ pε Yeluzalem

Melanel 19.28—23.56: Yenga mεsik ε Yezu pε Yeluzalem, mezuk mε nε esyee ε lε

Elanel 24.1-53: Yezu eegom, nyε eelyaal nyel nε bot, nyε eebyet tɔ gwoo.

Luk εpelyaal εsuk ε ekwyala bε

¹ Boo-mot Teofil, dáa ye nabe náá, bot ebuεpe naakwyel εkaada tɔ mεkana etεp ee nadhaa pak'ena ε,

² ne dāa bot ε nabee ne mis mɔɔ met tyee etep bak djas nadi esael nakaadaa bis é meken ε. Bot ε tak nabe é, be moo bot ε mesa ε Zeeb.

³ Bhii me nazedu etep tak kekum pe mesuk me tak ε, me é booke náá, ye goka é náá, mam pe, me kaada wɔ etep bak djas tɔ ekwyala, wɔy kukuma Teofil.

⁴ Me sa deenek é, étep wɔ neegu etsεεtse e melyo me wɔ nabela ε.

Fofop ngɔt epelε bhaadal dum ne ebyel ε Zan Nduuel-bot

⁵ E ghen Elood nadi mekoozi kɔ Yude ε, ye nabe é ne dhiiti ghaa-Zeeb, din ε le nabe é Zakali. Nyε nadi é ngɔt tɔ sama εdhuu ε beghaa-Zeeb nadi tɔ lɔɔg ε Abiya ɔ. Myel nabe é dha ε boo ghaa-Zeeb Alɔn. Din ε le nabe é Elizabet.

⁶ Bɔɔ djas bebá nadi é bot ε epiki é mis ε Zeeb. Be nadi eduwal ne eke tyee etsi ne metinj ε Ghen di elεε ε enyɔpe.

⁷ Saabegɔs kabe é náá, be nabe é ààbe ne mɔn. Elizabet nabe é kwyiid moma, nyε nabe é ààbe ne ghwyil ebya etεε náá, bɔɔ djas nabe é, be moo betɔa-bot.

⁸ Dhiiti dwoo, Zakali nadi esa mesa me yii ghaa-Zeeb tɔ Ndjaa-ebuwa, etεε náá, ye nabe é yɔbɔ lɔɔg ε nadi tɔ mesa é dwoo tak.

⁹ Be eezesa dhiiti egwyeeɔg tɔ ezel ε lɔɔ, dāa eboo beghaa-Zeeb nadi ezezye ne esa sok ε étep be neesée mot aani, tɔ kedik bemul na mbeε menuub tɔ Di na Dεε ε Ghen ε. Zakali é naséeaa dwoo tak étep ekedik menanas.

¹⁰ Edhuu ε bot djas naleelik ε pe kel edjaala é ewala ε menanas na mbeε menuub nadi edikaa tɔ Di na Dεε ε.

11 Tin, dhiiti fofop ngɔt ε Ghɛɲ zokazetuula Zakali «zaka». Fofop tak eezetyaa tetel pɛ mbɔ eghɛɲ mesa ebuwa di edikaa bɛmɛnanas ε.

12 Dáa Zakali nabee nyɛ é, ye nabɛ é bwoo nɛ bɛbebwol naamɛt nyɛ elyelɛpɛ.

13 E di'enek, fofop eezɛke nɛ nɛ náá: «Nàdi nɛ bwoo Zakali, etɛɛ náá, Zɛɛb eegwak mendjaala mɔ! Elizabet mwalɔ é waabela ebum. Nyɛ waabya wɔ mɔn mɔɔ motom. Wɔ aaget mɔn tak ε Zan.

14 Wɔ aadi é tɔ boo mɛmyaala. Tin, bot ebuepɛ é waamyala dum nɛ ebyel ε lɛ.

15 Etɛɛ náá, nyɛ aadi é boo-mot é mis ε Ghɛɲ. Nyɛ aanàdɛ mɛnyok mɛ vin, ààdɛ dɔɔ nɛ kwaambi bɛdhiiti mɛnyok mɛ di edjɛ elangi ε. Sisim na Dɛɛ é waalwood tɔ lɛ nyɛ dinaa tɔ mɔ nyɛɛg.

16 Nyɛ waasa náá, bɔn Yisalaɛl ebuepɛ bula zɛdum kon nɛ Ghɛɲ Zɛɛb'ɔɔ.

17 Tin, nyɛ waakɛ sok bhwoob ε Ghɛɲ nɛ sisim nɛ eghɛɲ ε ngooel-mɛkpa ε Zɛɛb Eli, étɛp nyɛ neebulal ɛgwakel pak bɛsɛɛg nɛ bɔn bɔɔ. Nɛ ebaasa náá, bot ε di elyel elo ɔ swoola mɛfulu étɛp bɛ needi bot ε etson nɛ epiki.»

18 Tin, Zakali eezɛke nɛ fofop náá: «Mam aagu náá, etɛp ee wɔ di elɛɛ ε, ye é tsɛɛtsɛ dáa? Etɛɛ náá, mɛ moo é tɔa-mot. Mwalam pɛ moo é yɛ sil-moma.»

19 E di'enek, fofop é boozɛbɔɔza nɛ nɛ náá: «Din ε lam é Ghabhiliɛl. Ye é mam é dyeebadi sok bhwoob ε Zɛɛb étɛp elwomel bɛ. Nyɛ lwom mɛ ε, mɛ zɛlii nɛ nɔ, mɛ zɛlɛɛ wɔ mbɛɛ bhaadal'enek.

20 Deenek, wɔ ààpamyaa etɛp ee mɛ lɛɛ wɔ ε, sonok bɛ náá, etɛp tak ε waasɛɛ é ɛwala ε Zɛɛb zekoobal ε. Etɛp tak é di náá, wɔ aadi é bubu.

Wɔ aanàkwaabaalii, kana dwoo mos kekum dwoo esesée binek djas aasaal ε.»

²¹ E di'enek, bot ε nazyε mendjaala ɔ nadi ebwood Zakali, bɔɔ edjoka dáa nyε nadi ebɔya tɔ sum Di na Dεε ε Zεεb.

²² Tin, dáa nyε nakawyis ε, nyε nabε é, nyε moo àakabε nε tyee nyε kalii nε nɔɔ. Tin, bot eezεgek náá, nyε eebee dhiiti djema mεbwala penek tɔ sum Di na Dεε ε Zεεb. E di'enek, nyε nakalii-lii nε nɔɔ ε nε egeka dáa bubu, étεp nyε nabε é, nyε moo bubu.

²³ Tin, dáa Zakali nasilal bim mεlu mε nyε nagoka nε esa mεsa mε tɔ Ndjaa-ebuwa ε Zεεb ε, nyε eezεsik pε dεl ε lε.

²⁴ Ba mεlu bhii tak, Elizabet myεl eezεbela εbum. Wɔ gwaa, nyε zokazεɔwa nε εbum ε tak tyee bεngɔn εten. Nyε nadi ekeke é náá:

²⁵ «Bee sa Ghεη sa dum nε nam ε, nyε eemyaal εdis ε mε tɔ esa ee nadi edjε mε sen é mis mε bot ε.»

Fofop ngɔt εpeleε bhaadal náá, Yezu é waabyel

²⁶ Bhii bεngɔn εten nε wat yii εbum ε Elisabet, Zεεb eeaaazεdhis fofop Ghabhiliel pε dεl ε Nazalet, pε kyee dik Ghalile.

²⁷ Nyε nadhis fofop tak é pε daa mɔɔ moma ngɔt di ààgu bɔtom ɔ, din ε lε nabε é Maali. Nyε nadi é, ghɔɔd motom ngɔt nε din ε Zozεf. Zozεf nabε é dha ε Mεkoozi Dhavid.

²⁸ Fofop eezεtuula nyε, swos nyε, nyεy náá: «Dia tɔ mεmyaala, wɔ eeboma nε mbεε bhwoob ε Zεεb. Ghεη é nε nɔ lɔɔg.»

²⁹ Maali moo tinaak «yɔɔɔ», edjoka nε mbi yenek mεkpa. Nyε é boozεdji εsuk ε yenek mεswosel.

³⁰ Fofop é bookake ne ne náá: «Maali, nàbem ba, etee náá, wò eeboma ne mbee bhwoob e Zeeb.

³¹ Wò waabela ebum. Wò waabya mòn mào motom. Din e wò aaget nye e, ye aadi é Yezu.

³² Nye aaboodi é boo-mot, be aadjóo nye Mòn Zeeb-Mekaake. Gheṇ Zeeb é waaneeg nye mekoozi dáa Dhavid bhaab'e nadi é.

³³ Deenek, nye aadi é mekoozi kò mbyak Yisalael kòm-kòm. Eyon e le aadi é ààbe ne esik.»

³⁴ Maali eezeke ne fofop náá: «Yiizaag aasael dáa? Mam é di ààgu botos'aak?»

³⁵ Fofop eezebóza ne ne náá: «Sisim na Dee é waazyé kò ló. Ghwyil e Zeeb-Mekaake é waabutal wò. Eteṇ tak e mòn na dee wò waabya o, nye aadjóoaa é Mòn Zeeb.

³⁶ Dòo ne Elizabet mòn nyoog é waabya ngbe mòn motom, ye nakoozobe náá, nye é sil-moma. Nyeṇ mot be nadi ekeke náá, nye é kwyiid o, ebum e le moo mos é ne bengon eten ne wat.

³⁷ Etee náá, ye tok ne sa Zeeb aadi ààkwak.»

³⁸ Tin, Maali zebóza ne ne náá: «Mam é mot-mesa e Gheṇ. Ye sael ne nam dáa mekpa mò di eke náá, ye sael e.» Bhii tak, fofop eezetó ye.

Maali eetó kebee Elizabet

³⁹ Aàbaya tò melu menek deenek, Maali eezeghe, tò kaab pe del e metsok nadi pe kyee dik Yude e.

⁴⁰ Nye eezeni tò ndjan e Zakali, bhii tak nye eezeswos Elizabet.

⁴¹ Dáa Elizabet nazogwak-gwakak meswosel e Maali e, é di tak wat wò gwaa, mòn zekuu nye tò mò. Tin, wò gwaa Sisim na Dee zelwood tò le.

⁴² Nyε eezεtsim εlyelεpe náá: «Zεεb eesεε wɔ metel dhaa boa djas kɔ bɔs'ak! Deenek, esεεa metel menek é dɔɔ nε kɔ mɔn wɔ aabya ɔ.

⁴³ Mam é yam nwyaa dhiiti van moma, etεε náá, nyεεg ε Ghεη'am zyε pε daa lam?

⁴⁴ Etεε náá, ye bε é, wɔ eebee náá, é sok mε gwak mεswosel mɔ ε, ye bε é, mɔn eekuu mε tɔ mɔ nε mεmyaala.

⁴⁵ Mεnyɔ nε nɔ, etεε náá, wɔ eemyaal náá, Ghεη é waasa sa nyε lεε wɔ ε!»

Djeeb ε Maali

⁴⁶ E di'enek, Maali eezεke náá:
«Mε εpeduwal Ghεη nε lyem'am djas.

⁴⁷ Sisim'am é pε tɔ boo mεmyaala kɔ εsu ε Zεεb metsik-bot mam.

⁴⁸ Etεε náá, nyε eeliig mis mε, gwyák mot-mesa mε, mam ààkobε yam mot εtela ε nyel.

Nε tsεεtse, kana dwoo εlak mos, membu nε mesee, bot aakadjoo mε é “moma Zεεb nazesεε metel ɔ”.

⁴⁹ Etεε náá, Zεεb Mεkaake eesa eboo esonok tɔ lam. Nyε é Zεεb na Dεε.

⁵⁰ Nyε nε bu enem esa, mεlu nε mεwala djas dum nε bot ε di eduwal metiη mε ɔ.

⁵¹ Nyε eesa mesa mε mεbwala nε eghεη bε. Nyε eetwak bot ε di nε mεbet tɔ elyem ɔ.

⁵² Nyε eedis bεmekoozi kɔ mεbhóó mε mεkoozi mɔɔ.

Bhii tak, nyε eedjε bot ε di ààbε nε εbet ɔ, mεbhóó mε mεkoozi.

⁵³ Nyε eedjε mbεε edee nε bot ε nadi nε za ɔ.

Nyε esswaal bekum ε bot mεmbɔ mε toto.

⁵⁴ Nyε nazyε é zεkwyee Yisalaεl, mot-mesa mε.

Nye àadjisa elyaal enem ne embɛɛ bɛ

⁵⁵ ne Abalaam bɛ ne bɛdha bɛ, kɔm-kɔm sii ne kɔm, dɔ́a nye nakɛk bebhaab binaka ɛ.»

⁵⁶ Tin, Maali eezɛdi pɛ daa Elizabet tyee bɛngɔn elɛl, bhii tak, nye eezɛsik pɛ dɛl ɛ lɛ.

Ebyel ɛ Zan Nduuel-bot

⁵⁷ Ewala nabe náá, Elizabet é waabya ɛ, ye eezɛkum. Wɔ gwaa, nye zɛbya mɔn motom.

⁵⁸ Bɛsɔ bot ɛ nadi ne mendjaa ekunaaɛpe ne ne ɔ, ne bot ɛ mɛbyel mɛ zokazɛgwak náá, Ghɛɲ nabe é, nye naagek nye ghon. Bɛ ne bɛ nɔɔ moo tin tɔ mɛmyaala bɔɔ djas.

⁵⁹ Dɔ́a mɔn nabe, nye moo ne mɛlu mɛten ne elɛl bhis ebyel ɛ lɛ ɛ, wɔ gwaa, bɛ zɛtɔ́ éteɖ ɛkeniigal nye beka. Bɛ nakwyɛl ɛget nye ɛ ne din ɛ sɛɛg Zakali.

⁶⁰ Tin, nyeɛg é boopɛɛ, nye é boozeke náá: «Ààbɛ! Din ɛ lɛ aadi é Zan.»

⁶¹ E di'enek, wɔ gwaa bɛ zɛke ne ne náá: «Deenek, ye tok ne mot ngɔt tɔ bot bɔ nadi ne din ɛ Zan!»

⁶² Tin, tɔ ɛgek ɛ dɔ́a ebubu di elii ɛ, bɛ eezɛdji sɛɛg mɔn, din ɛ nye nakwyɛl ɛget mɔn'ɛ ɛ.

⁶³ Wɔ gwaa Zakali zokazɛwaab náá, bɛ zyɛ nye ne mɔɔ pɛt ɛbaya bɛ di ezezyɛ ne ɛkwyal kɔ tak ɛ. E di tak, wɔ gwaa, nye zokakwyal náá: «Nɛ tseɛtse, din ɛ lɛ é Zan.» Tin, bɔɔ djas naazɛdjoka ɛbuepe.

⁶⁴ E di tak wat, wɔ gwaa, Zakali zɛbaakan elii ɛnyɔɛpe. Nye moo tin etsim ɛlyelɛpe eduwal Zɛɛb.

⁶⁵ E di'enek, bot djas nadi bɛ ne bɛ nɔɔ ɛ, bɛ nadi é bɛ moo ne bwoo, pɛ kɔ mɛl mɛ nadi tɔ mɛtsok mɛ kyee dik Yude ɛ. Tin, bot nazokakekaada ɛ tɛp'enek.

⁶⁶ Bot djas nadi egwak dáa tɛp tak nasael ε, bɛ moo tin esiiza tɔ bhum elyem bɔɔ, edji náá: «Mɔn tak aadi zɛ?» Ye nabɛ é tɛɛtɛ náá, ghwyil ε Ghɛɲ nadi é tɔ lɛ.

Djeeb ε Zakali

⁶⁷ Zakali, sɛɛg mɔn nabɛ é, nyɛ eelwood nɛ Sisim na Dɛɛ. Wɔ gwaa, nyɛ zokani egoola mɛkpa mɛ Zɛɛb tɔ Sisim. Nyɛ nadi ekeke é náá:

⁶⁸ «Mena goka é nɛ ɛsɛɛ Ghɛɲ Zɛɛb bot ε Yisalaɛl metel.

Etɛɛ náá, nyɛ eezɛkwyee bot ε mbyak'ɛ, nyɛ eepɛk bɛ.

⁶⁹ Nyɛ eewyisal mena ghɛɲ mot, metsik-bot, pɛ tɔ bɛdha ε mɛkoozi Dhavid mot-mɛsa mɛ.

⁷⁰ Ye é etɛp ee nyɛ naloozɛɛ tɔ enuub e bɛngoolɛl ε mɛkpa mɛ na edɛɛ ε.

⁷¹ Nyɛ naakɛk mena tsik di epɛk mena é mɛmbɔ mɛ bot ε mɛbhuka mena ε, dɔɔ nɛ si mɛko mɛ bot ε di esa mena ɛbiyo ɔ.

⁷² Nyɛ naagɛk ghon nɛ bɛbhaab benaka.

Nyɛ nabɛ é ààdjisa ɛbhɛɲ ε lɛ na dɛɛ nyɛ nalik ε.

⁷³ Nɛ tɛɛtɛ ye nabɛ é, Zɛɛb eetuwal myon nɛ mɛson mɛ é mis mɛ bhaab'ena Abalaam náá,

⁷⁴ nyɛ waazɛpɛk mena é mɛmbɔ mɛ bot ε mɛbhuka mena.

Etɛp mena neesaka mɛsa mɛ, ààbɛ nɛ bwoo tɔ ebhum elyem bena.

⁷⁵ Etɛɛ náá, mena needika dɛɛ nɛ piki é mis mɛ, é mɛlu mɛ tsik'ena djas.

⁷⁶ Deenek, wɔy mɔn'am, wɔ aadi é, ngoolel-mɛkpa ε Zɛɛb-Mɛkaake.

Etɛɛ náá, wɔy é kwaakɛ sok bhwoob ε Ghɛɲ étɛp wɔ neekoobal mɛze mɛ.

77 Etɛp wɔ neelɛɛ bot bɛ náá, nyɛ ɛpezyɛ zetsik bɛ,
da pel mesyem mɔɔ.

78 Tsɛɛtsɛ, Zɛɛb'enabelka nɛ bu enɛm esa, nɛ kwyɛl.
Dusa tɔ gwoo, nyɛ eewyisal kɔ lena gwyɛ tyee wat
nɛ mɛkas mɛ gwyɛs di edjem tɔ mɛlem ɛ.

79 Etɛɛ náá, nyɛ neewyisal bot ɛ di tɔ ghooghom, nɛ
tɔ piyo ɛsyee ɔ, tɔ gwyɛ.

Nyɛ needjɛɛd mɛko mɛ kyeed mena pɛ ze eg-
wyɛm.»

80 Dáa mɔn nadi ewyee ɛ, sisim yɛ nabaadi
ewyee ɛbuɛpɛ. Nyɛ nadidi é, tɔ kyee dik bɛsyɛ di
ààbɛ nɛ mɛdii ɛ, kɛkum dwoo nyɛ nazɛlyaal bot ɛ
Yisalaɛl nyɛl ɛ.

2

ɛbyɛl ɛ Yezu

1 E ghɛɲ tak, wɔ gwaa, Sezaad Oghust
zokazɛlwom bot, bɛ kwyal min mɛ mɛtaɲ mɛ
bot ɛ bɔs djas.

2 ɛkɛn ɛ ɛlɛɛga nɛ ɛkwyal ɛ min mɛ bot nasael é é
ghɛɲ Kilinus nadi kukuma dik Siili ɛ.

3 Bot djas nadi etɔ kɛkwɛkwɛyala min ɛ mot nɛ
mot pɛ dɛl ɛ lɛ.

4 Zozɛf zokadus pɛ kyee dik Ghalile, pɛ ghaada
Nazaɛt, nyɛ neezɛtɔ pɛ kyee dik Yude, pɛ dɛl ɛ
Bheteleɛm, etɛɛ náá, nyɛ nabɛ é dha ɛ Dhavid.

5 Nyɛ é bootɔ pɛ ɛlɛɛga nɛ ɛkwɛyala e min bɛ nɛ
ghɔɔd'e Maali. Maali nadi é nɛ ɛbum.

6 Dáa bɛ nakadi tin ɛ, wɔ gwaa, ɛwala ɛ nabɛ náá,
Maali é waasyas ɛ zokazɛkum.

7 Nyɛ é boozɛbya mɔn mɛgwyak mɛ. Tin, nyɛ é
boozɛbet nyɛ ɛghɔɔd, pil nyɛ tɔ bhelangiti, bhii tak

nyε eezekel nyε kɔ mɔɔ tεεg bε nadi ekekel edee e ebhata ε, etεε nάά, bε nabε ε ààbela di tɔ ndjaa bedjon.

Fofop ngɔt eelyaal bebaalel ε ebhata nyel

⁸ E kyee dik tak wat, ye nabε ε nε bebaalel ε ebhata, bε nadi ε tɔ bal ebaal εsan ε ebhata bɔɔ ε pum.

⁹ Wɔ gwaa, fofop ε Ghεη zetuuula bε. Mekas ε Ghεη naazekaal bε «bwyeee». Wɔ gwaa, bwɔɔ zεsa bε εbuεpe.

¹⁰ Tinaak, fofop eezεlεε bε nάά: «Nàbemka ba, etεε nάά, mε zyε ε, zegoola bin mbεε bhaadal, yii bot djas aamyaaala nε yε ε.

¹¹ E pum'ak mos, kɔ dεl ε Dhavid, metsik-bot eezebyel εtεp'en. Ye ε Mesia, Ghεη.

¹² Beeka geka bi aagwyak nyε nε yε ε: bi ε waabela mɔn tɔlɔɔ wola tɔ bhelangiti, ndjaasi kɔ mɔɔ tεεg bε di ekel edee e ebhata ε.»

¹³ E di'enek wat, wɔ gwaa, bεtε nε efofop zokadus tɔ gwɔɔ, zεsεεga nε fofop nadi tinaak sok ɔ, bε moo tin eduwal Zεεb, bɔɔ nάά:

¹⁴ «Duu nε Zεεb pε εko tɔ gwɔɔ, tin, egwyem kɔ bɔs dum nε bot ε nyε di ekwyel ɔ!»

Bεbaalel ε ebhata eetɔ pε dεl ε Bheteleεm

¹⁵ Dάa efofop nalik bε, sik pε tɔ gwɔɔ ε, bebaalel ε mesaa mε ebhata zokazεke pak'ɔɔ nάά: «Djhootɔka pε Bheteleεm. Ye goka ε nάά, mena beeka sa tuula penek ε, sa Ghεη lyaal menaka ε.»

¹⁶ Bε eezεghεε mεnyel tɔ, tin, bε eezεbela Maali bε nε Zozεf, dɔɔ nε mɔn tɔlɔɔ ndjaasi kɔ mɔɔ tεεg bε nadi ekekel edee e ebhata ε.

¹⁷ Dáa bε nakabee nyε é, wɔ gwaa, bε zεlεε etεp ee fofop'enɔk nalεε bε dum nε mɔn tak ε.

¹⁸ E ghεη bot djas nadi egwak mbi etεp ee bεbaalel ε mεsaa mε ebhata binek nadi elεε ε, bot djas naadyeebadjoka.

¹⁹ Yε kabε Maali ɔ, nyε nazobaal etεp binek djas é tɔ bum lyem'ε. Tin, nyε moo esiiza εbuεpe.

²⁰ Bhii tak, bεbaalel ε mεsaa mε ebhata é boozεsik. Bε nadi eduwal Zεεb, étεp endem ee bε nazebee ε, nε yii bε nazegwak ε, nε etεp ee efofop nalεε, nabatasael ε.

Mɔn eegetaa din ε: Yezu

²¹ Bhii mεlu mεtεn nε elεl mɔn nabyel ε, wɔ gwaa, bε zεtɔ, keniigal nyε beka, tin, bε eezεget nyε din ε Yezu, din ε fofop nalεε bε, εsok nε nyεεg nε bela εbum ε.

Zozεf bε nε Maali eezyε nε Yezu pε Ndjaa-ebuwa

²² Tin, εwala ε nabe náá, Zozεf bε nε Maali kεsa mεzel mε etsi ε Moiiiz nadi elεε étεp εbyel ε mɔn ε, yε eezεdjala. Wɔ gwaa, bε zεtɔ nε mɔn pε kok Ndjaa-ebuwa Yeluzalem étεp ekelyaal Ghεη mɔn.

²³ Etεε náá, tɔ etsi ε Ghεη, yε nabe é, yε eekwyalaa náá: «Mɔn motom, yii mεgwyak aabyel ɔ, nyε aadi é ngbε Ghεη.»

²⁴ Bε nabaadi é, edjε dɔɔ nε dhiiti buwa yii etsi e tak wat di edji ε. Ye nabe é: «Mεpepak mεmbá, nεghu bɔɔ mεgum mεmbá.»

²⁵ Pε Yeluzalem, yε nadi é, nε dhiiti mot, din ε lε nabe é Simεyɔη. Nyε nadi é, mot epiki, eduwal Zεεb. Nyε nadi ebwood mot aazεtsik Yisalaεl ɔ. Sisim na Dεε nadi é nε nε lɔɔg.

26 Sisim na Dεε naaloolεε nyε náá, εsok nε nyε nε gwyε, nyε waabee Mεsia Ghεη aadhis ɔ.

27 Wɔ gwaa, Sisim na Dεε zεdul Simeyɔη, nyε tɔ pε kok Ndjaa-ebuwa. Bεbyael ε Yezu naazyε nε mɔn'ɔɔ étep εzεsa nyε dáa mεkpa mε etsi di elεε ε.

28 Simeyɔη é boobεp mɔn tɔ mεmbɔ mε. Bhii tak, nyε eezεghaapεε Zεεb. Nyεy náá:

29 «Nenak, Ghεη, beta kwom'ɔ nyε gwyε tɔ egwyem, tyee wɔ nalεε nyε ε.

30 Etεε náá, mis mam eezεbee tsik wɔ nadhis bis yε ε,

31 tsik wɔ nazekoobal étep membyak djas ε.

32 Ye é ngel aasa náá, membyak mesis gu wɔ ε.

Ye é duu bot ε mbyak'ɔ, Yisalaεl.»

Mεkpa ε Zεεb yii Simeyɔη nalεε ε

33 Sεεg nε nyεεg ε Yezu nabe é, edjoka dáa Simeyɔη nadi elii dum nε mɔn'ɔɔ ε.

34 Simeyɔη é boozεsεε bε metel, nyε nε Maali nyεεg náá: «Zεεb dhis mɔn'ak ε, étep εkwyεsal bot εbuεpe nε εwyel bot εbuεpe pε kɔ Yisalaεl. Nyε aadi é, ndem ngɔt ε Zεεb. Bot εbuεpe é waasyaala bhyyed kɔ lo'ε.

35 Tin, nyε waalyaal popoopwon egeka ee di esyela tɔ ebhum elyem e bot εbuεpe ε. Yε kabε wɔy Maali ɔ, mezuk ε waatuu wɔ lyem dáa pεl, kεtuula pε yii kyee.»

An ngooel-mεkpa ε Zεεb

36 Ye nabaabe é nε dhiiti ngooel-mεkpa ε Zεεb. Din ε lε nabe é An. Nyε nabe é esyεs ε Fanuel, mot mbyak ε Aseεd. Nyε nabe é, nyε eezedyeebageeb. Nyε nabe é, nyε naadi membu meten nε ebá, bε nε ngom naba nyε, nyε dinaa ààgu botom ɔ.

³⁷ Bhis esyee ε ngom, nye nabe é ààkabaatós eba, kekum membu mekam-meten ne elel ne membu mená (84). Nye nabe é ààdus tó kok Ndjaa-ebuwa. Nye nadidi é, esa mesa me Zeeb mwos ne pum, ne etsi ε edee tó mendjaala.

³⁸ Wó gwaa, nye zetuula dwoó tak wat, nye moo tin eduwal Zeeb, bhii tak nye moo elii ne bot ε nadi ebwood náá, Yeluzalem zepkel é ban ɔ, dum ne mon tólo.

Esik ε Yezu pe del ε Nazalet

³⁹ Dáa seeg ne nyee ε Yezu nasilal esa eseseε djas etsi ε Gheη nadi elε ε, be eezesik ne ne pe kyee dik Ghalile pe del ε loo Nazalet.

⁴⁰ Tin, ye nabe é mon eewyee ne ebeε ε mis, Zeeb naawa tó le etson ne enem ne embεε be.

Yezu tó kok Ndjaa-ebuwa, nye ne membu kam ne eba

⁴¹ Membu djas bebyael ε Yezu nabe é, etetó pe Yeluzalem étep ekéból ebyon ε Pak.

⁴² Dáa Yezu nabe nye moo ne membu kam ne eba ε, be é boozetó ne ne, dáa ye nadi ezezye ne eseseε tó mefulu moo ε.

⁴³ Dáa ebyon nasi ε, be eezesik. Ghuna mon'oo Yezu naalik pe Yeluzalem, tinaak, bebyael ε Yezu àagu.

⁴⁴ Bóo nadi egek ε náá, nye é be ne bedhiiti bot tó zukamwaa ne bot ε nadi eke loog wat be ne be nóo ɔ. Tin, bóo zokake muu dwoó. Wó gwaa, be zekan esan ε nye pak bon nyeeε bóo, ne besó bóo bot ε nadi é ebyon be ne be nóo ɔ.

⁴⁵ Bóo ààbela nye ε yenek. Be é boozesik pe Yeluzalem esaa nye.

⁴⁶ Tin, kuma ye nakum melu melɛl bɔɔ esaa nyɛ ɛ, wɔ gwaa, bɛ zɛbela nyɛ tɔ kok Ndjaa-ebuwa. Nyɛ nadi ɛ, ndiindil, bɛlyoel eewa nyɛ kuku ɛbwak, nyɛy egwak bɛ, nɛ ɛbaadji bɛ ekiya.

⁴⁷ Bot djas nadi egwak nyɛ ɔ, bɛ nadi edjoka ɛbuɛpɛ nɛ kwaambi etson nyɛ nadi nɛ yɛ ɛ, nɛ dɔ́a nyɛ nadi ebɔɔza ekiya bɔɔ ɛ.

⁴⁸ Dɔ́a sɛɛg nɛ nyɛɛg nabee nyɛ ɛ, wɔ gwaa bɛ zɛdjoka ɛbuɛpɛ. Nyɛɛg ɛ boozɛke nɛ nɛ náá: «Mɔ́n'am, ɛtɛp yé wɔ sa bis deenek? Bhum elyem e bis nɛ soog di ɛ pɛ ɛko. Bis eesaa wɔ, saa saa.»

⁴⁹ Nyɛ ɛ boozɛbɔɔza nɛ nɔɔ náá: «Bi saa mɛ ɛtɛp yé? Bi ààgu náá, mɛ ɛ tɔ ndjaa saag'am, ɛtɛp esa mɛsa mɛ?»

⁵⁰ Kabela náá, bɛ nabɛ ɛ ààmɛt ɛsuk ɛ sa nyɛ nadi elii ɛ.

⁵¹ Bhii tak, bɛ eezɛsik nɛ nɛ pɛ Nazalet. Nyɛ nadi elooba nɛ nyɛɛg nɛ sɛɛg. Tin, nyɛɛg zokabaal etɛp binek djas tɔ lyem'ɛ.

⁵² Yezu moo tin ewyee nɛ tyɛ, nɛ etson, nɛ enɛm nɛ embɛɛ ɛ mis mɛ Zɛɛb nɛ ɛ mis mɛ bot.

3

Mɛlyo ɛ Zan Nduuel-bot

¹ Ye nabɛ ɛ, ɛ sok Sezaad Tibɛɛd nadi, nyɛ moo nɛ membu kam nɛ etɛn kɔ bóó ekukuma dik'ɛ ɛ, Pɔɔs Pilat nadi ɛ kukuma Yude, Elood kadi ɛ ekɔk kɔ Ghalile. Yɛ kabɛ mɔ́n nyɛɛg Filip ɔ, nyɛ nadi ɛ kukuma kyee dik Ituud, nɛ Talakonitid. Lizanyas nakabɛ yɛ ɛ kukuma kyee dik Abilen.

² E ghen Anas nɛ Kayif nadi eboo bɛghaa-Zɛɛb ɛ, ye nabɛ ɛ Zɛɛb naalii nɛ Zan mɔ́n Zakali pɛ tɔ bal.

³ Zan zokazyε kɔ mɛl mɛ nadi pɛ kyee dik wat nɛ dii Yulɔn ε. Nyε natutuud é náá: «Liigka elyem, da bi é kɛduwa Zεεb. Tin, Zεεb é waapel mesyem men.»

⁴ E di'enek, etɛp ee nadi kwyala tɔ Mɛkana mɛ ngooel-mɛkpa ε Zεεb Ezayi ε, ye naabela εsuk. Ye nabe é náá:

«Mot ngɔt ɛpetuud tɔ bal:

“Koobalka ze ε Ghɛɲ,

da bi é tuu nyε mɛze mɛ na looba-looba!

⁵ Edi e na sebetɛɛ di pak metsok

djas ε, yε waabimelaa.

Metsok nɛ eghooda djas é waasilaa.

Membon djas di é ze ε, yε waasekaa.

Mɛze mɛ di, yε eezepulel ε, yε waakoobelaa.

⁶ Tin, bot djas é waabee tsik Zεεb aadjε ε.”» *

⁷ Mɛdhuu mɛ bot nadi ezyε pɛ daa Zan etɛɛ náá, Zan neezɛduu bɛ Zεεb. Zan zokake nɛ nɔ náá: «Biyo mɛgel mak, εzε lyo bin náá, bi kaab ɛbuk ε Zεεb di ekunaa yenek?

⁸ Lyaalka nɛ esesɛɛ bin náá, ye é tɛɛtsɛ náá, bi eezeswoola etsik bin, da bi é bet ɛke biyo nɛ biyo náá: “Dhiiti sonok aanàkwaasa mena, etɛɛ náá, Abalaam é bhaab'enaka.” Betka mɛ lɛɛ bin náá, Zεεb é nɛ ghwyil ɛsa náá, mɛkok mak liiza, ye di bɛdha ε Abalaam.

⁹ Ye goka é bi é gu náá, zon moo é nɛɛga é ɛbok ε le, étɛp ye neetsaal ekanal e tak. Ele djas aadi ààdjε bhum ε, goka é nɛ ɛtsaalaa. Bhii tak, yε waakɛdikaa tɔ du.»

¹⁰ Wɔ gwaa bot moo tin edji nyε náá: «Bis goka nɛ ɛsa dǎá?»

* 3:6 Eza 40.3-5

¹¹ Nyε é boozeboɔza ne nɔɔ náá: «Mot di ne ekuwa ebá ɔ, goka é ne egwyena wat, dje mot di ààbe ne ye ɔ. Bela náá, mot di ne edee e dek ɔ, nyε kaa ne bot é di ààbe ne ye ɔ.»

¹² Benɔnel ε epata e lapo zokabaazyε yɔbo zeduwa Zeεb. Wɔ gwaa be dji Zan Nduuel-bot náá: «Lyoel, bis goka ne esa dáa?»

¹³ Nyε eezeboɔza ne nɔɔ náá: «Nàwaabka bot epata e lapo dhaa yii kukuma di eleε náá, bi goka ne εwaab ε.»

¹⁴ Esodja zokabaadji yɔbo náá: «Ye kabε bis ɔ, bis goka ne esa dáa?» Nyε eezeboɔza ne nɔɔ náá: «Sa mot ààbaanɔɔ sa mot ne bhel, sa mot ààsu mot tɛp. Bi goka é ne εde ε efute e mesa min.»

¹⁵ Bot djas nadi ebwood ne εbwaalel djas. Bot djas nagek é náá, Zan nabe é Mesia.

¹⁶ Nyε eεeke ne boɔ djas náá: «Mam duu bin Zeεb é tɔ mɛdii. Ye kabε mot di ezyε bhis'am ɔ, nyε eedhaa mε ne mεbwala ne ghwyil. Mam aanàkwaakobela-belak duu[†] εmalal étɛp ekotii-tiiak ekel e ekoko be. Nyεy aaduu bin Zeεb é tɔ ghwyil Sisim na Deε ne tɔ du.

¹⁷ Tɔ mεmbɔ mε, nyε eemɛt zyaagal étɛp nyε neewa mbek pak mbee bhum ne mbεε bhum. Tin, da nyε é wa mbεε bhum kɔ taa. Ye kabε embee bhum ɔ, nyε kakεmwas ye ε tɔ du na kɔm-kɔm.»

¹⁸ Zan naaleleε bot Mbεε Bhaadal ne bεte ne dhiiti bεmelyo. Nyε nadi elyo be ne εdje be ghwyil.

¹⁹ Wɔ gwaa, Zan zokazɛdul mεkoozi Ellood mɛlɔ kɔ esu ε Helodhiaad mwaa mɔn nyεεg nyε nadεk ɔ, dɔɔ ne étɛp embee esεεε nyε nadi esa ε djas.

[†] **3:16** Bhis etii ε ekel mɛpapa, tin mot-mesa mε nadi ààduwala ɔ nyε moo tin egwyii nyε mεko.

²⁰ Tin, Ellood naabaazesa dhiiti mbee tɛp: nyɛ naawa Zan é mbok.

Eduwa Zɛɛb ɛ Yezu

²¹ Bhii bot djas nazeduwa Zɛɛb ɛ, Yezu pe naazeduwa Zɛɛb. Nyɛ nadi edjaala, wɔ gwaa gwoo zɛbɛɲɛl.

²² Bhii tak, Sisim na Dɛɛ eezɛsul kɔ lɛ tyee ɛghum. Wɔ gwaa, dhiiti gwood zokazɛgék tɔ gwoo náá: «Wɔ é mɔn'am mɛ dyeebakwyɛl ɔ. Mɛ eedyee-bamyaala nɛ nɔ ɛbuɛpe.»

Dhaad mɛbyɛl ɛ Yezu

²³ Yezu nabe é, nyɛ moo nɛ membu tyee mɛkam-mɛlɛl é sok nyɛ nakan mɛsa mɛ ɛ, nɛ dáa bot nadi eke náá, nyɛ é mɔn Zozɛf ɛ. Zozɛf nadi é mɔn Eli.

²⁴ Eli é mɔn Mattat, Mattat nakadi é mɔn Levi. Levi nabe é mɔn Mɛlki, Mɛlki nakadi é mɔn Zanayi, Zanayi nabe é mɔn Zozɛf.

²⁵ Zozɛf nakadi é mɔn Mattatya, Mattatya nabe é mɔn Amɔs. Amɔs é mɔn Nawum. Sɛɛg ɛ Nahum nabe é Esli, Esli é mɔn Naghayi.

²⁶ Naghayi nabe é mɔn Maat. Mot nabya Maat ɔ nabe é Matatyas. Matatyas nabe é mɔn Semeyi. Mot nabya Semeyi ɔ, nabe é Yosek. Yosek nabe é mɔn Yoda.

²⁷ Yoda nakadi é mɔn Yoanan. Sɛɛg ɛ Yoanan nabe é Lesa. Lesa nadi é mɔn Zolobabel, Zolobabel nakadi é mɔn Salatyɛl, Salatyɛl nabe é mɔn Neeli.

²⁸ Neeli nakadi é mɔn Mɛlki, Mɛlki nadi é mɔn Adhi, Adhi nakadi é mɔn Kosam, Kosam nadi é mɔn Elmadham. Elmadham nakadi é mɔn Eed.

²⁹ Mot nabya Eed ɔ, nabe é Zosue, Zosue nabe é mɔn Eliezɛd, Eliezɛd kadi é mɔn Yolim, Yolim nabe é mɔn Matat. Matat kadi é mɔn Levi.

³⁰ Levi nabe é mən Simeyən, Simeyən kadi é mən Yuda. Yuda nabe é mən Zozef, Zozef kadi é mən Yonam, Yonam nabe é mən Eliakim.

³¹ Eliakim nakadi é mən Melea, Melea nabe é mən Mena, Mena nakadi é mən Matata. Seeg e Matata nabe é Natan, Natan kadi é mən Dhavid.

³² Dhavid nabe é mən Yese, Yese kadi é mən Obēed. Obēed nabe é mən Bhooz, Bhooz kadi é mən Sala. Sala nabe é mən Naason.

³³ Naason kadi é mən Aminadaab, Aminadaab nabe é mən Almin, Almin kadi é mən Aalni. Aalni nabe é mən Eslon, Eslon kadi é mən Peleez, Peleez nabe é mən Yuda.

³⁴ Yuda nabe é mən Zakəəb, Zakəəb nakadi é mən Izak. Izak nabe é mən Abalaam. Seeg e Abalaam nabe é Teela, Teela nabe é mən Nakəəd.

³⁵ Nakəəd nabe é mən Seluug, Seluug nabe é mən Lewu, Lewu kadi é mən Peleeg. Peleeg nabe é mən Ebēed, Ebēed nabe é mən Sala.

³⁶ Sala nabe é mən Kenan, Kenan nabe é mən Alpaksaad, Alpaksaad é mən Sem, Sem é mən Noe, Noe é mən Lemək.

³⁷ Lemək nabe é mən Matusalem, Matusalem nabe é mən Enək. Enək é mən Yelēed, Yelēed nabe é mən Malaleel. Malaleel nabe é mən Kenan.

³⁸ Tin, Kenan nabe é mən Enəs, Enəs nakadi é mən Set. Set kadi é mən Adam, Adam é mən Zēeb.

4

Satan eewa Yezu tə məbhowal

¹ Dáa Yezu nabula pe dii Yuldən e, ye nabe é Sisim na Dēe moo tə le na «təəə», Sisim zədul nyē tə bal,

² é di Dim mot mekəŋ nakəwa nyē tə məbhowal ə. Ye nabe é, nyē naasa melu mekam-məná ààde edee. Bhii tak za zokazesa nyē.

³ Dim mot mekɔŋ eezɛke ne ne náá: «Nɛghu wɔ é Mɔn Zɛɛb ɔɔ, kea ne ekok elak náá, ye liigel, da ye é di mapa.»

⁴ Yezu eezɛbɔɔza ne ne náá: «Ekwyala ɛ Zɛɛb lɛɛ náá: “Tsik mot tok ne mapa toto*.”»

⁵ Bhii tak, dim mot mekɔŋ eezɛbyet ne ne kɔ dwol, wɔ gwaa nye lyaal nye tɔ ɛwala ɛwat meyon me di kɔ bɔs ɛ, djas.

⁶ Satan ne ne náá: «Gwyáka, me waadjɛ wɔ eghɛŋ ne mekas me di tɔ meyon mak ɛ djas. Etɛɛ náá, ye naazedjɛaa me. Me é ne ghwyil ɛdje ne mot me aakwos ɛdje ɔ.

⁷ Ye bɛ náá, wɔ eemyaal ekwyit mebon mɔ si meko mam ɔ, me waadjɛ wɔ djas.»

⁸ Yezu eezɛbɔɔza ne ne náá: «Ekwyala lɛɛ é náá: “Ye é Ghɛŋ, Zɛɛb'ɔ é wɔ di egoka ne ɛduwal. Wɔ zosa ɛ mɛsa me nyɛy nye ɛmet†.”»

⁹ Bhii tak, Dim mot mekɔŋ eeaaazɛtɔ ne ne pɛ Yeluzalem, zegel nye kɔ ɛko ɛ kok Ndjaa-ebuwa. Nyɛy ne Yezu náá: «Ye bɛ náá, wɔ é Sɛɛɛlɛ Mɔn Zɛɛb ɔɔ, tsela, da wɔ é kɛduma pɛ si.

¹⁰ Deenek, etɛɛ náá, ekwyala lɛɛ ɛ náá: “Zɛɛb é waalɛɛ ne efofop bɛ náá, bɛ baal wɔ‡.”

¹¹ Tin, baabela náá: “Bɛ waabɛp wɔ kɔ mɛmbɔ mɔɔ, é kaab náá, ko'ɔ ɛzɛkɛbema ɛbɛk.”»

¹² Tin, Yezu eezɛbɔɔza ne ne náá: «Ekwyala baalɛɛ é náá: “Sa wɔ ààwa Ghɛŋ, Zɛɛb'ɔ tɔ mebhawal§.”»

¹³ Bhii nye nazewa Yezu tɔ mebhawal dáa nye nakwyɛl ɛ, Dim mot mekɔŋ eezɛbet nye, nye tɔ ɛtsetaɛpe, kekum é dhiiti ɛwala aanyɔ ne ne ɛ.

* 4:4 Det 8.3 † 4:8 Det 6.13 ‡ 4:10 Mɛd 91.11-12 § 4:12 Det 6.16

Yezu eekan mesa me pe Ghalile

14 Yezu eezesik pe Ghalile, ghwyil Sisim na Dεε tɔ le «tɔɔɔ». Duma ye zokake kɔ mel me nadi mbakambaka ne tin ε djas.

15 Tin, Yezu moo tin elyo bot mekpa ε Zεeb tɔ mendjaa me mendjaala me eYuda. Bot ε nadi egwak nye ɔ, naadyeebaduduwal nye.

Bot ε Nazaret eeswonal Yezu

16 Dhiiti dwoo Yezu zetɔ pe Nazaret, é di nye nawyelaa ɔ. E dwoo saba, nye eezeni tɔ ndjaa mendjaala me eYuda dɔa nye natawa ne esesa ε. Nye é boowyl é mis me bot étep elan ε ekwyla ε Zεeb.

17 Bhii tak náá, be eezedje nye mbwoob mekana me ngoolel-mekpa Ezayi, nye eezewyiiz mekana me tak. Nye kabela é di nakwyalaa náá:

18 «Sisim ε Gheɲ é ne nam etεε náá, nye naadje me ebotan, étep me neezetuud bedjel ε bot mbeε bhaadal.

Nye naadhis me, me zelεε bot ε membok náá, be moo é tiia.

Me zelεε be na edhim náá, be moo zenya sok.

Me zelεε bot é di nyalaa ɔ, be neepeka.

19 Me zetuud náá, mena moo é, é mewala me Gheɲ di zetsik bot be ε*.»

20 Bhii tak, Yezu eezewol mekana, zedje ne mot nakwokwom mbwoob mekana me tak ɔ, nye eezεnɔ nyel, disi. Bot djas nadi tɔ ndjaa mendjaala me eYuda ɔ, moo tin «dhuuu», ne mis é nyel'ε.

21 E di'enek, nye boozelεε be náá: «Mos ekwyla ee bi zegwak ε, eedjala.»

* 4:19 Eza 61.1-2

22 Bɔɔ djas nadi etanjal étɛp'ɛ, bɛ nadi edjoka mbɛɛ etɛp ee nyɛ nadi elɛɛ bɛ ɛ. Bɛ zokazɛdji náá: «Ye tok mɔn Zozeɛf'aak é?»

23 Tin, Yezu eezɛke nɛ nɔɔ náá: «Tɛɛtɛ náá, bi é waadjɛ kana yak: “Ngwomel bot, tsika nyel'ɔ wɔy wɔ é ɛmet.” Bi é waabaake nɛ nam náá: “Bis eegwak menduk mɛ mɛsa mɛ wɔ nasa pɛ dɛl ɛ Kapɛlnaum ɛ. Baasa esa e tak wak kɔ ghaada yɔ met!”»

24 Bhii tak nyɛ eezɛbaabil náá: «Nɛ tɛɛtɛ, mɛ lɛɛ bin é náá, ye tok nɛ dhiiti ngoolel-mɛkpa ɛ Zɛɛb ààmyaalaa kɔ dɛl ɛ lɛ met.

25 Tɛɛtɛ, mɛ lɛɛ bin ɛ náá: E ghen ɛ ngoolel-mɛkpa ɛ Zɛɛb Eli, ye nabe é nɛ bɛtɛ nɛ bɛkus ɛ boa tɔ Yisalaɛl, é sok ye nasa membu melɛl nɛ pes, bhi àànee ɛ, é sok boo pwom nasa kɔ dɛl djas ɛ.

26 Zɛbela náá, Zɛɛb nabe é ààkyeed Eli pɛ daa kus moma dik'ena. Nyɛ nazokyeed nyɛ é pɛ daa dhiiti kus moma, nadidi pɛ dɛl ɛ Salepta ɔ, pɛ kyee dik Sidon.

27 Ye nabaabe pɛ é, nɛ bot ɛ nadi nɛ ɛbé ɛ zezam ɔ, ɛbuɛpɛ tɔ Yisalaɛl é ghen ɛ ngoolel-mɛkpa ɛ Zɛɛb Eliize. Zɛbela náá, ye nabe ààbɛ nɛ mot ngɔt tɔ sama yɔɔ natsak, bhis Naaman, mot kyee dik Siili nyɛ ɛmet.»

28 Tin, wɔ gwaa ɛbuk zɛmɛt bɔɔ djas tɔ ndjaa mendjaala mɛ eYuda, bhii bɛ nazegwak deenɛk ɛ.

29 Wɔ gwaa bɛ zɛwyɛl, bhii tak bɛ eezɛwyis tɔ nɛ Yezu edi sis ààbɛ kɔ dɛl, pɛ kɔ nges boo ɛtsok ɛ Nazalɛt nasumaa kɔ tak ɛ, étɛp bɛ neekɛ zyeegal nyɛ, nyɛ neeges tɔ tonj.

30 Tin, Yezu zokazɛsyela tɔ lɔɔ, nɔɔ nyel'ɛ, tɔ yɛ.

Mot mbee sisim nadi edhek ɔ

³¹ Dhiiti dwoo, Yezu naatɔ pɛ Kapelnaum, dɛl ɛ Ghalile. Nyɛy ɛ lelyo bot mɛkpa ɛ Zɛɛb, dwoo saba.

³² Bot naadyeebadjodjoka dɔ́a nyɛ nadi elelyo ɛ, etɛɛ náá, nyɛ nalelyo ɛ nɛ eghɛɲ.

³³ Tɔ ndjaa mendjaala mɛ eYuda nadi ɛ nɛ dhi-iti mot nadi nɛ mbee sisim nadi edhedhek ɔ. Mot'enɔk moo zɛtsim elyɛɛpe.

³⁴ Nyɛy náá: «Haa! Mena ɛ nɛ yaa tɛp, Yezu, mot Nazaɛt? Wɔ zyɛ, zɛtwak bis ɛ? Mɛ nɛ gu náá: Wɔy ɛ mot na dɛɛ Zɛɛb nadhis ɔ.»

³⁵ Yezu eezɛbhɛm nyɛ elyɛɛpe. Nyɛy náá: «Dia gwyem, wyisa tɔ nyɛl mot'ak!» Mbee sisim zɛghɛɛg mot'enɔk si ɛ mis mɛ bot. Bhii tak, nyɛ eezɛwyis tɔ lɛ, àázuk nyɛ ɛ dhiiti di.

³⁶ Bot djas naadjoka elyɛɛpe, bɛ moo tin elelii pak'ɔ́ náá: «Yak ɛ yaa kɔkɔ lii nɛ nwyak mot? Nyɛ ɛ nɛ eghɛɲ nɛ ghwyil ɛbatake nɛ embee esisim náá, bɛ wyis, bɔɔ ɛ batawyis.»

³⁷ Wɔ gwaa, dék din ɛ lɛ zɛdjala kɔ kyee dik'enek djas.

Yezu ɛpɛtsik bɛɛ nɛ membel

³⁸ Yezu eezɛwyis tɔ ndjaa mendjaala mɛ eYuda, tɔ pɛ daa Simɔɲ. Ghuna tsi ɛ Simɔɲ yii moma nadi ɛ nɛ mɛkosa ɛkpaɲɛpe. Bɛ eezɛke nɛ Yezu náá, nyɛ sa sonok ɛtɛp'ɛ.

³⁹ Nyɛ eezɛmalal ɛ ngwoob'ɛ, tinaak nyɛ zɛbhɛm mɛkosa, nyɛ wyis. Wɔ gwaa, mɛkosa zɛwyis tɔ lɛ. E di tak wat, moma yenɔk eezɛwyɛl, nyɛ moo ebe bɛ.

⁴⁰ Kasɛka ɛ, ɛ ɛbil ɛ dwoo ɛ, bot ɛ nadi nɛ membel membi-membi ɔ, naazyɛ nɛ nɔɔ pɛ daa Yezu, nyɛ ɛ bookɛl mɛmbɔ kɔ lɔɔ. Bhii tak náá, bɛ eezɛtsak.

⁴¹ Embee esisim nadi ewyis tɔ bɛɛ nɛ membel, bɔɔ ɛ tsitsim náá: «Wɔ ɛ Mɔn ɛ Zɛɛb!» Yezu ɛ

boozelyak be náá, be diyal enuub etee náá, be nadi egu náá, nyey é di Mesia.

Yezu epelee mekpa e Zeeb to mendjaa me mendjaala me eYuda

⁴² Dáa melem nalem e, Yezu eezedus to ghaada to pe kyee di ààbe ne bot e. Tin, zukamwaa ne mot moo zesaa nye, wo gwaa, be zokazebela nye. Ekwasak e loo nabe é, be ne be noo di é di wat, nye nakabaalik be.

⁴³ Nye eezeke ne noo náá: «Ye goka é náá, me to, kegoola mbee bhaadal dum ne Eyon e Zeeb pe bedhiiti eghaada esis, etee náá, me nadhisaa é, étep tak.»

⁴⁴ Tin, nye nadi egoola mekpa e Zeeb to mendjaa me mendjaala me eYuda kyee dik Yude.

5

Yezu eedjoo bedjekel yii meken

¹ Dhiiti dwoo Yezu nadi é, é ngwoob boo soob na djato-djato Ghenezalet. Tin, bot ebupe eezesaala nye é nyel pe kyee nye nadi é, étep be neezegwak mekpa e Zeeb.

² Nye eezabee é ebon e dii, melaed memba ye zese, belael e mewyet naase étep egwyii mewyet mo.

³ Nye eezeni to elaed wat. Yiizaag nabe é ye é Simon. Nye é booke ne noo náá, be waatiila batsa ne ebon. Bhii tak nye eezenoo nyel, disi. Tin, nye moo zelyo bot mekpa e Zeeb.

⁴ Dáa Yezu nasilal elii e, nye é booke ne Simon náá: «Tiila kuku dii, bhii tak, da bi é la mewyet men.»

⁵ Simɔŋ é boozeboɔza ne ne náá: «Gheŋ, bis eegool tu pum'ak djas mos, ààbela sonok. Tin, dum ne mekpa mɔ, me epela mewyet.»

⁶ Dáa be kala mewyet ε, wɔ gwaa be zemet besu ebuepe, mewyet mɔɔ moo saa ye neekεk.

⁷ Be é boozedjoo besɔ boɔ nadi tɔ dhiiti eleed ɔ, be zekwyee be. Be é boozyε. Boɔ bela besu, bhii tak, wɔ gwaa be zokazelwoodal meleed membá mɔɔ, meleed ekee saa diida.

⁸ Dáa Simɔŋ Pyeed nabee deenek ε, wɔ gwaa nye zekwyit mebon si meko ε Yezu. Nyeɣ ne ne náá: «Gheŋ, tɔa yɔ etsetaepe ne nam, etee náá, me é mot mesyem.»

⁹ Etee náá, ekeed naadyeebasa nye ne bot ε nadi tin be ne be nɔɔ ɔ sama, dum ne yenek mbi betε ne besu ε be nagó ε.

¹⁰ Ekeed ε tak baazemet dɔɔ ne Zak ne Zan boɔ Zεbedε bot ε be ne be nɔɔ nadi ɔ. E di'enek Yezu é booke ne Simɔŋ náá: «Nàbem ba, etee náá, kana dwoɔ pan mos'ak, wɔy aakadi é lael mewyet étep εmet bot.»

¹¹ Bhii be nasel meleed é εbon ε, be eezεdhuugal eseseε boɔ djas, be eezεdu Yezu.

Yezu eetsik dhiiti mot nadi ne εbé ε zezam ɔ

¹² Yezu nadi é, kɔ dhiiti dεl, wɔ gwaa dhiiti mot nadi ne εbé ε zezam ɔ, zetiila pe daa le, kwyit mebon, bhwoob si, zedjaala ne ne náá: «Gheŋ, lyem'ɔ é kwyel ɔɔ, wɔ é ne ghwyil etsik me, da nyel'am é bula dεε.»

¹³ Yezu eezεseεb mbɔ, met nye. Nye eezeke ne ne náá: «Me eekwyel! Tsaka.» E di tak wat, zezam zokasi é nyel mot'enok.

14 Tin, nyε é boozeɗul nyε melɔ elyεlepe náá: «Sa wɔ ààlεε mot sa dhaa wak ε. Tóa kelyaal nyel pε daa ghaa-Zεεb, da wɔ é kεdje ebuwa e betit dáa Moiiiz nake é. Etεp náá, bε neetanjal é di yen dum nε tsik wɔ zetsak ε.»

15 Tin, dék'ε, nabaaze kala dhaa tyε kɔ mel djas, bot εbuεpe nadi ezyε, zegwak mεlyo mε Zεεb nε zesaa tsik pε daa lε.

16 Yezu nabe é é etetɔ tɔ bal é edi di ààbε nε bot ɔ, étεp nyε neekεdjaala.

Yezu eetsik dhiiti boka mot

17 Dhiiti dwoɔ Yezu nadi elyo bot mεkpa ε Zεεb, eFalizyε nε bεghan ε mεkana mε etsi nadus mel nε mel pε kyee dik Ghalile, nε Yude, zenɔɔ ghaada Yeluzalem ɔ nadi é tin mendiindil é gwoob Yezu. Tin, ghwyil ε Ghεη Zεεb nadi é tɔ Yezu étεp nyε neetsik bot ε mεbé.

18 Wɔ gwaa, bεdhiiti bot zokazyε nε mot zesɔɔb nε εbé ɔ, byaala kɔ mwaala. Bε nadi esaa dáa bε aaniigal nyε tɔ ndjaa étεp εkenεεg nyε si mεko ε Yezu.

19 Dáa bε nadi ààbε nε dáa bε sa ε, wɔ gwaa, bot binɔk zokazebyet kɔ mii ndjaa, tuu elen tɔ εbo, bε eezεsil mbel'enɔk kɔ mwaala yε, kuku εbwak, zeza nε di Yezu nadi ɔ.

20 Dáa Yezu nabee εdum ε koη ε bot ε nazyε nε mbel tak ɔ, nyε é boozeke nε mbel náá: «Mɔɔ sɔ'am, mesyem mɔ eεpelel.»

21 Bεghan ε mεkana mε etsi nε eFalizyε moo tin nε betε nε esiiza tɔ elyem. Bɔɔ náá: «Yenɔk εze di ebyasal Zεεb deenek? Nwyak mot di nε ghwyil εpel mesyem mε sɔ mot, bhis Zεεb nyε εmet?»

22 Dáa Yezu naagu esiiza bɔɔ ɛ, nyɛ é booke náá: «Étɛp ye bi di nɛ mbi yenek egeka?

23 Eyé di àadyeebalyel nɛ nen, ɛke é náá: «Mesyem mɔ eepelel» ooɔ, nɛghu ɛke é náá: «Wyɛla, da wɔ é kɛ»?

24 Ye goka é, bi gu náá: Sɛɛɛlɛ Mɔn Mot é nɛ ghwyil epel mesyem mɛ bot kɔ bɔs.» Bhii tak, nyɛ eezɛke nɛ sɔɔbela mot'enɔk náá: «Mɛ ke é náá, wyɛla, nɔɔa mwaala yɔ, da wɔ é sik pɛ ndjan'ɔ!»

25 E di'enek wat, bot djas «dhuuu», nɛ mis é nyel mbel, wɔ gwaa, nyɛ zɛwyɛl, ghɛ mwaala nyɛ nagheghɛɛaa nɛ yɛ ɛ, zɛnɔɔ nyel, tɔ pɛ ndjan'ɛ, nyɛy é duwal Zɛɛb.

26 Bot djas naadyeebadjoka, bhii tak bɛ moo duwal Zɛɛb é ɛkeke náá: «Bis dinaa ààpaabee kɔkɔ yak sok!»

Yezu eedjɔo Levi

27 Bhii tak Yezu zokazɛwyis, wɔ gwaa, nyɛ bee dhiiti nɔɔɛl epata e lapo, din ɛ lɛ nabɛ é Levi, ndiindil é di mɛsa mɛ. Yezu eezɛke nɛ nɛ ɛ náá: «Dua mɛ!»

28 Ngbat, Levi eezɛwyɛl, nyɛ eezɛlik esesɛɛ bɛ djas, du nyɛ.

29 Bhii tak, Levi eezɛsa ɛbyon tɔ ndjan'ɛ. Bɛtɛ nɛ bɛnɔɔɛl ɛ epata e lapo, nɛ bɛdhiiti bot ɛbuɛpe nadi é, lɔɔg wat bɛ nɛ bɛ nɔɔ kɔ mesa.

30 EFalizyɛ nɛ bɛghan ɛ mɛkana mɛ etsi nadi bɛ nɛ bɛ nɔɔ ɛ nadi elii ɛbiyɔɛpe nɛ sa tak ɛlyɛɛpe. Bɛ é boozeke nɛ bɛdjekel bɛ náá: «Étɛp ye bi di edɛ é di wat bi nɛ bɛnɔɔɛl ɛ epata e lapo nɛ bot ɛ di nɛ mbee dék ɔ?»

31 Yezu é boozeɛbɔɔza nɛ nɔɔ náá: «Bot ɛ di mɛnyɛl ɛnyɔɛpe ɔ, tok nɛ gwyɛs ngwomel mot étɛp nyɛ

neegwom be. Ye é membél ε di ne gwyes megwoma me.

³² Me nabe é ààzye, zesaa bot ε epiki. Me nazyε é, zesaa bot ε di gu náá, be é bot ε mesyem o, étep be neeswoola mefulu moo.»

Me lyo ε Yezu dum ne tep etsi ε edee

³³ EFalizye zokazεdji Yezu náá: «Bedjekel ε Zan Nduuel-bot ne bedjekel bis ne tsi edee étep mendjaala esok ne esok. Etep yé bo bedjekel di ààtsi edee étep mendjaala?»

³⁴ Wo gwaa, Yezu zokabooza ne noo náá: «Bi nakobee sok paa náá, besε ε mwaaz tsi edee dwoo eba, dhi be di loog wat ne mwaaz, mot paazyε zεba moma o? Me ààbee deenek.

³⁵ Tin, ewala ε tak é waakum, so'oo mot zye zesaa eba o, nye waadisaa to loo. E di tak é be aatsi edee.»

³⁶ Yezu eebaazεboozza be to kana náá: «Ye tok ne mot aanyaa kaad na bes étep ekoobal bet kaad ne ye. Ye sael deenek oo, pes bes kaad é waanyaa bet kaad, tin, pes bes kaad tok ne ghwyil elataa é bet kaad.

³⁷ Ye tok ne mot aawa bes menyok to ebheeb na mwa etεε náá, ye wyil o, menyok é ne ghwyil ebo ebheeb. Menyok waasee é bos tin, bheeb waapulel.

³⁸ Enyo náá, menyok me bes waaa to ebheeb na bes!

³⁹ Ye tok ne mot aakwyel εde menyok me bes, bhis nye eezede menyok me na mwa o. Ye dyeebakeaa ε náá: “Menyok me na mwa ne nyo.”»

6

Yezu é kukuma dwoo saba

¹ Dhiiti dwoo saba Yezu nadi edhaa tɔ pyeeb meɓhek me di edjooaa ble ε. Beɗjeki be nadi ebók meɓhek ne edjas ye tɔ membo mɔɔ, bhii tak, be eezede bhum tak.

² Beɗhiiti eFalizye é boozeke ne Yezu náá: «Éteɓ ye bi di esa sa etsi di elyak dwoo saba ε?»

³ Yezu eezεboɔza ne nɔɔ náá: «Bi dinaa àapaalaa dáa Dhavid nasa é sok za nasa be ne bot be ε?»

⁴ Be naani tɔ Ndjaa Zεb, nyey zokanɔɔ emapa ee nakanaa Zεb ε, de, nɔɔ yak pak, djε bot ε nadi egyee be ne ne ɔ. Dhi bɔɔ eezogu enyɔɔpe náá, etsi lee náá, bot di egoka ne ede emapa binek é, ye é bɔɔ be met beghaa-Zεb.»

⁵ Yezu zokabaazeke ne nɔɔ náá: «Seɛɛle Mɔn Mot é di kukuma dwoo saba.»

Yezu eetsik mot na sɔɔbela mbɔ dwoo saba

⁶ Dhiiti dwoo saba, Yezu eezeni tɔ ndjaa mendjaala me eYuda, nyε moo tin elyo bot mekpa ε Zεb. Tɔ tak nadi é ne dhiiti mot ngɔt ne mbɔ eghen sɔɔbela.

⁷ EFalizye ne beghan ε mekana me etsi moo tinaak «dhuuu» ne mis é nyel ε Yezu é gwyák neghu nyε waatsik nyε dwoo saba, éteɓ ebela lo meɔɔ me be aapit nyε.

⁸ Tin, Yezu nadi egu egeka e ebhum e elyem bɔɔ. Nyε eezεke ne mot na sɔɔbela mbɔ náá: «Wye! Tyanja tetel tin kuku εbwak.» Wɔ gwaa, mot'enək eezεwye, nyε eezetyaa tetel.

⁹ Nyε eezεdji edhuu ε bot é nadi tin ɔ náá: «Tɔ etsi, eyé di egoka ne esael dwoo saba, enem esa “ohoo” embee eseseε? Etsik ε mot “ohoo”, neghu ebet náá, nyε gwyε?»

¹⁰ Yezu eebulal mis gwyák bε, bhii tak nyε eezεke nε mot tak náá: «Sεεba mbó'ɔ.» Nyε eezεsεeb mbó'ε, yε eezεsekel, bula εnyɔεpe.

¹¹ Wɔ gwaa bεghan ε mεkana mε etsi nε eFal-izyε zokazεkpaa lyem εlyelεpe, bε moo tinaak esɔs pak'ɔɔ, edjek tyee bε aasa kɔ εsu ε Yezu ε.

Yezu εpesée bot ε lwoma yε kam nε bebá

¹² E ghen tak, Yezu naazεbyet kɔ etsok étεp εkεdjaala Zεεb. Nyε naadjaala Zεεb tu pum tak djas.

¹³ Dáa mεlem nakalem ε, nyε eezεdjóo bεdjekel bε. Bhii tak, nyε eezεsée tɔ sama yɔɔ bot kam nε bebá, nyε nadjóo bε «bot ε lwoma».

¹⁴ Min mɔɔ nabe é: Simɔn Yezu naget Pyεed ɔ, zenɔɔ mɔn nyεεg Andele, Zak nε Zan, Filip, Bhaatelemi,

¹⁵ Matye, Toma, Zak mɔɔ Alfe, zenɔɔ Simɔn, mot di tɔ εdhuu ε bot ε nadi djóoaa eZεlot ɔ*,

¹⁶ zenɔɔ, Yuda mɔɔ Zak, bε nε Yudas Iskaliɔt, mot aaka nyε ɔ.

Yezu εpelyo nε etsik bot

¹⁷ Yezu eezεwyeed etsok bε nε bε nɔɔ. Nyε eezεtyaa é di na sεbεtεε, é di bεdhiiti bεdjekel εbuεpe nadi ɔ. E di tak, ye nabaabe é nε zukamwaa nε mot. Bot ε tak naadudus é pε kyee dik Yude nε Yeluzalem, kɔ egħaada di é ngwoob boo dii mεsɔn ε, pε Tiid nε Sidɔn.

* **6:15** Simɔn nabe é mot di tɔ εdhuu ε bot é nadi djóoaa eZεlot ɔ. Bε nasesa mesa mɔɔ tɔ syaab étεp εbyen náá, ekwyil ε bot εzεkewa bε é bhel.

18 Bε nazyεzegwak embεε malyo mε Zεεb, dɔɔ nε zesaa tsik. Bot ε embee esisim nadi edhedhek ɔ, nabε é, bε naabela yɔbɔ tsik.

19 Bot nadi esuu é, bε mεt nyε bɔɔ bε emet, etεε náá, dhiiti kwaambi mebwala nadi ewyis tɔ lε, é tse-tsik bɔɔ djas.

Mεmyaala nε ghon

20 Yezu eεzegwyák bedjekl bε, nyεy nε nɔɔ náá:
«Mεnyɔ nε biyɔ, bedjel ε bot
etεε náá, Eyon ε Zεεb é yibɔ.

21 Mεnyɔ nε biyɔ, bot ε di nε za nenak ɔ,
etεε náá, bi é waadε, djil.

Mεnyɔ nε biyɔ, bot ε di edje nenak ɔ,
etεε náá, bi ε waago.»

22 «Mεnyɔ nε biyɔ, bot ε di ebhina bin ɔ,
bε sɔ bin ɔ,
bε lee bin,
nε esaab ε dék ε len, kɔ esu ε Sεεηελε Mɔn Mot ɔ.

23 E dwoɔ tak, myaalka, da bi é bɔl zεη, etεε náá,
boo etuud bin é nεεga pε tɔ gwoo. Bεbhaab
bɔɔ nasesa é deenek nε bεngoolεl ε mεkpa ε
Zεεb.»

24 «Haa kpaa-ghon nε biyɔ, bεkuma ε bot
etεε náá, bi nabezela yebɔ enεm nε embεε.

25 Kpaa-ghon nε biyɔ, bot ε zedε, djil nenak ɔ,
etεε náá, bi aadi é nε za.

Haa kpaa-ghon nε biyɔ, bot ε di egɔ nenak ɔ,
etεε náá, bi aadi é dje.»

26 «Haa kpaa-ghon nε biyɔ, yε bε náá, bot djas
εpeduwal bin ɔ. Ye é deenek ε, bεbhaab bɔɔ nadi
eduwal bεngoolεl ε mεkpa ε Zεεb yii mεkɔη.»

Ekwyεl ε bot ε di bhina bin ɔ

27 Yε bε biyɔ, bot ε di egwak mε ɔ, mε lεε bin ε náá: Kwyɛlka bot ε mεbhuka men. Saka enεm esa nε bot é di ebhina bin ɔ.

28 Sεεka bot ε di ekal bin ɔ, mεtel. Da bi é baadjaala Zεεb étεp bot é di esa bin εbiyo ɔ.

29 Yε bε, mot é nyuu wɔ bεεZ é εmuk ɔɔ, baadjε yak kyee εmuk. Mot é nɔɔ wɔ ndjookuwa ɔɔ, beta nyε baanɔɔ kuwa yɔ.

30 Gwyena nε mot nε mot di ewaab wɔ sonok ɔ. Yε bε mot eenɔɔ seeyɔ ɔɔ, sa wɔ àákabaadu.

31 Saka nε bot tyee bi di ekwyɛl náá, bε sa nε nen ε.

32 Yε bε náá, biyɔ zokwyɛl é bot ε di ekwyɛl bin ɔɔ, étεp yé bi di ebun náá, bi djεaa bhɔɔ? Dɔɔ nε bot ε mesyem zobaakwyɛl é, bot ε di ekwyɛl bε ɔ.

33 Yε bε náá, biyɔ zosa enεm esa ε, nε bot ε di esa bin enεm esa ɔɔ, étεp yé bi di ebun náá, bi djεaa bhɔɔ? Dɔɔ nε bot ε mesyem baasaa deenek.

34 Yε bε náá, bi ekola bot esonok ε é bwaal náá, bε neebaadjε bin yɔbɔ ɔɔ, étεp yé bi di ebun náá, bi djεaa bhɔɔ? Dɔɔ nε bot ε mesyem baadjεel pak'ɔɔ ε fulu ekola, etεε náá, bε neebulela yε.

35 Yε bε biyɔ ɔ, ye goka é, bi kwyɛl bot ε mεbhuka men. Saka bε enεm esa. Gwyenaka nε bot esa bin, àábwaal náá, bε waabaabulal bin yε. Deenek Zεεb é waadjε bin boo etuud. Bhii tak, bi é waadjóoaa bɔn Zεεb-Mεkaake, etεε náá, nyε é Zεεb mentyɔ nε bot ε lwalɛɲ, zεεg nε bεmbee ε bot.

36 Gekeka bot ghon, dáa Sεεg'en di egek bin ghon ε.

NàpéeKa bot

37 «Sa bi ààdidi é pée bot, deenek Zεεb aanàkwaapée bin. Sa bi ààdidi é kwyosal bot

ndje səs, deenek Zεεb aanàkwaakwyesal bin ndje səs. Pelka bot εbiyo ε be di esa bin ε, deenek Zεεb é waapel bin.

³⁸ Gwyenaka nε bot. Deenek Zεεb é waadjε bin εbuεpe, lwoodal. Zεεb é waaso tɔ boo bhwan'en bεtε nε bhum, nyɔmelaa, dital-dital, “tɔɔɔ” see. Hεεε! Zεεb bee é dāa bi di elwoodal bhwaabesɔ bin ε. Ye é deenek ε nyε aalwoodal yebɔ bhwaa.»

³⁹ Tin, Yezu eebaazelii nε nɔɔ pε tɔ kana náá: «Mot edhim tok nε ghwyil εdul sɔ mot edhim étep elyaal é nyε ze, deenek tε? Bε é sa deenek ɔɔ, bɔɔ djas bebá é waakedjoola tɔ guk.

⁴⁰ Ye tok nε djekel di nε ghwyil εdhaa sεεg mot di elyaal nyε mεsa ɔ. Tin, yε be náá, djekel di edjek mεsa ɔɔ, nyε eezedjek εnyɔεpe ɔ, nyε aakaswaala é, nyε moo dāa sεεg mεsa mε.

⁴¹ Étep yé wɔ gwyák kwyεεzyon di tɔ dis ε sɔ mot, wɔ kadi é, àabee pεk le di tɔ dis ε lɔ ε?

⁴² Wɔ naakwaake nε sɔ mot náá: “Mɔɔ sɔ'am, beta, mε dis mɔɔ kwyεεzyon tɔ dis ε lɔ,” dhi wɔy di àabee pεk le di tɔ yɔ dis ε! Wɔy mot mɛdjhaaz pε εko, bhimis pε si, pookodis sok pεk le tɔ dis ε lɔ! Bhii tak é wɔ aanyaa sok, étep wɔ needis kwyεεzyon di tɔ dis ε mɔɔ sɔ ε.

Le nε ebhum bε

⁴³ «Mbεε le àabya mbee bhum. Tyee wat nε mbee le, yε aanàkwaabya mbεε bhum.

⁴⁴ Le djas gwyakaa é, nε ebhum nyε di edjε ε. Bhum efiigh àábókaa kɔ le mεgɔk. Baadi náá, bhum di saaa mɛnyok mε vin nε ye é, yε àábókaa tɔ engwyinini.

⁴⁵ Mbεε mot dyeebawyisal é embεε etep di edus tɔ di εkwom ε di tɔ lyemε ε, kadi é náá, mbee mot

dyeebawyisal é embee etɛp mɛbiyo mɛ di tɔ mbee lyemɛ ɛ. Etɛɛ náá, mɛkpa mɛ mot dyeebawyisal tɔ nuube ɛ, ye é mɛkpa mɛ zelwood tɔ lyemɛ ɛ.»

Kana mendjaa membá

⁴⁶ «Étɛp yé bi di edjóo mɛ “Ghɛɲ, Ghɛɲ”, da bi kadi é, ààsa dǎa mɛ ke ɛ?

⁴⁷ Mɛ paalyaal bin mbi mot zye pɛ daa lam é gwak mɛkpa mam, da nyɛ é kɛ tyee tak ɔ, di egoka nɛ ɛdi ɛ:

⁴⁸ Nyɛ é dǎa mot nadi eesum ndjaa, nyɛ é zɛben epap e tak, zɛpu bɔs ɛdimɛpe, tuula kɔ bat ɛkok ɔ. Nyɛ nakawyeɛl epap é kɔ tak, tyee bhyon nakatuula ɛ, ɛbhyeeb ɛ mɛdii mɛ tak naanyunja é ndjan'enek, ààbik, etɛɛ náá, ndjaa naasumel ɛ ɛnyɔɛpe.

⁴⁹ Deenek, mot maa-ɛɔ di gwak mɛkpa mam, nyɛ kadi é, ààkɛ tyee tak ɔ, nyɛ é dǎa mot nasum ndjan'ɛ kɔ bɔs, ààpu ɛdimɛpe, ààbɛ ghus epap. Tyee bhyon nakatuula ɛ, ndjan'enek eezɛbik é di tak wat é “syɛɛɛ”.»

7

Yezu eetsik mot-mɛsa mɛ boo kukuma esodja eLɔm

¹ Bhii Yezu nasilal ɛlii nɛ mɛdhuu mɛ bot ɛ naze-maala tin ɔ, nyɛ eezɛtɔ pɛ Kapɛlnaum.

² Tin, dhiiti boo kukuma tɔ lɔɔg esodja eLɔm nadi é, nɛ dhiiti mot-mɛsa mɛ ngɔt nyɛ nadi ekwyɛl ɛbuɛpe ɔ. Mot-mɛsa mɛ tak nadi ebé ɛkpanɛpe, é siila nɛ ɛsyee.

³ Dǎa boo kukuma esodja tak nagwak menduk ɛ Yezu ɛ, nyɛ é boolwom bɛdhiiti bɛpaa ɛ eYuda, bɛ zɛdjóo Yezu étɛp nyɛ neezetsik nyɛ.

⁴ Bε eezεkum pε dάa Yezu. Bε moo tin edjaala nε nε elyεlεpe. Bωω nάά: «Mot tak goka ε nάά, wω kwyee nyε.

⁵ Nyε nε kwyel bot ε mbyak'enaka. Yε nyεy ε nasum ndjaa mendjaala mε eYuda yenaka.»

⁶ Tin, Yezu eezεghεε nyel, tό bε nε bε nωω. Bε dinaa àapaakotseta nε ndjaa deenek e, kukuma esodja eezεlwom bεsω bε, bε lεε nyε nάά: «Ghεη, nàdhek nyel'ω gwyes. Mam tok mbεε mot étεp wω neeni tω ndjan'am.

⁷ Etεp tak ε mam nakuma nyel, di ààzyε zεlii nε nω. Deenek, “iyeee!” Lóoa εkpa wat etεε nάά, mot-mεsa mam neetsak.

⁸ Di mε di'aak, mε ε nε ekukuma bam mε di gwak esεεε mε aasa ε nε nω ω. Pε si mεko mam, mε ε nε esodja. Mε ke nε ngωt nάά: “Tόak” ωω, nyε εpetό. Mε ke nε nwyak nάά: “Bulak” ωω, nyε εpebula. Tin, mε ke nε mot-mεsa mam: “Sa dάak” ωω, nyε εpesa.»

⁹ Dάa Yezu nagwak εbωωza kukuma yenωk ε, ye nabε ε, nyε naadyeebakwyel nyε. Nyε ε boo liig mis, nyεy nε εdhuu ε bot ε nadi egyee nε nε nωω nάά: «Mε lεε nάά, mε dinaa àapaabee kwaambi yak εbwaalel nε Zεεb sok, ye nakoozobε kω dεl ε Yisalaεl.»

¹⁰ Bot ε nalwomaa ω, eezεsik yωbω pε dάa kukuma esodja, bε kakebela mot-mεsa nadi bέ ω, nyε eezetsak.

Yezu eezεgomal muu mωn kus moma

¹¹ Bhii tak, Yezu eezεtό pε dεl ε di djóoa Nayin ε, bεdjekel bε nε mεdhuu mε bot ε nadi egyee nε nε ω.

¹² Dάa nyε nadi, nyε moo ε ngwoob εniel ε dεl ε tak ε, bot ε dεl nadi ezyε nε muu mot pε mεvit étεp εkεdel nyε. Ye nabε ε εtsak ε mωn dhiiti kus moma. Bot ε dεl ε tak εbuεpe nadi ε, ε ngwoob'ε.

13 Dáa Ghɛŋ nabee kus moma yenək ε, ghon naasa nyε εbuεpe étεp'ε. Nyε é booke náá: «Nàdje!»

14 Nyε eezεtiila, wɔ gwaa nyε mεt kεs*, bot ε nadi ebεp kεs ɔ, eezεtyaa. Yezu zεke náá: «Mɔɔ ngbaaz, mε lεε náá: Wyela!»

15 Mot nagwyε ɔ eezεgom, di ndiindil, nyε moo tinaak elii. Yezu eezεbulal nyε é mεmbɔ mε nyεεg.

16 Bot ε nadi tin ɔ, naadjoka εbuεpe. Bε é boozεduwal Zεeb é ke náá: «Boo ngoolɛl-mεkpa ε Zεeb eetuula pak'enaka. Deenek, Zεeb eezεkwyee bot ε mbyak'ε!»

17 Bot ε kyee dik Yude nε mɛl mε mengwoob nε mengwoob nabε é, bε naagwak menduk mε sa Yezu nasa ε.

Engoola-ngoola ee Zan Nduuel-bot nalwom ɔ

18 Bɛdjekel ε Zan eezεkaada Zan etεp binek djas. Zan eezεdjoo bɛdjekel εbá pak'ɔɔ.

19 Nyε eezεlwom bε pε dáa Yezu, étεp εdji Ghɛŋ náá: «Ye é wɔy ε di Mɛsia nabε náá, nyε εpezyε ɔ,† “ohoo” nεghu ye baabwoodaa dhiiti baadi ezyε ɔ?»

20 Dáa bε nakum pε Yezu nadi ε, bε eezεke nε nε náá: «Zan Nduuel-bot lwom bis é, bis zεdji wɔ náá: “Ye é wɔy ε di Mɛsia nabε náá, nyε εpezyε é, ‘ohoo’ nεghu ye baabwoodaa dhiiti baadi ezyε ɔ?»»

21 E εwala ε tak wat, Yezu zokazetsik bεtε nε membɛl, bot ε nadi nε edjam ɔ, nε bot ε embee esisim nadi edhedhek ɔ, dɔɔ nε εbε ε mis mε bot ε edhim.

22 Bhii tak Yezu eezεbɔɔza nε engoola-ngoola ε Zan náá: «Kεbaanaka nε Zan esesεε bi bee ε, nε yii

* 7:14 Ye nabε é, é lyaal náá, Yezu nadi é kɔ etsi, etεε náá, tɔ etsi eYuda, ghaa-Zεeb nabε ààtitila nε muu mot, ààkomεt nyε mε tak.

† 7:19 Dεt 18.19

bi gwak ε. Bot ε edhim moo nyaasok, bot ε di ne edjam ɔ moo ke enyɔɔpe, bot ε nadi ne εbέ ε zezam ɔ, be eezetsak. Be na endiila e mεɔ, moo gwak. Bot ε zegwyε ɔ, be eezegom. Mbεε Bhaadal εpegooel, kekum pe daa bedjel ε bot.

²³ Menyɔ ne mot aadi àadis εbwaalel ε le kɔ lam ɔ!»

²⁴ Bhis engoola-ngoola ε Zan nasik ε, Yezu moo tin elii ne zukamwaa ne mot nadi tin ɔ kɔ esu ε Zan. Nyε nalεε ne nɔɔ náá: «Bi nakεbee yé pe tɔ bal? Mɔɔ le ghwaazok é dheegel ne pup é? Aàbe!

²⁵ Haa εyέ bi nakεbee tɔ bal? Mot ngɔt ne van mbi bhet é? Bi ne gu náá, bot ε dyeebabɔt evan e ekaad ɔ, ne bot ε di edi tɔ ekum ɔ, dyeebadi é tɔ eboo mendjaa me bemεkoozi.

²⁶ Ha bi nakεbee yé? Bi nakεbee é ngooel-mεkpa ε Zεεb é? Ne tseεtse me lee bin náá, yii bi nakεbee ε, nyey eedhaa-dhanjaak ngooel-mεkpa ε Zεεb.

²⁷ Etεε náá, Zan é mot ekwyala nalεε náá: “Esok ne wɔ ne tɔ, me waalwom ngoola-ngoola yam, éteε nyε neekεkoobal wɔ mεze‡.”»

²⁸ Yezu eeabaabil náá: «Me lee bin ε etsεεtse náá: Pe tɔ bot ε di kɔ bɔs'ak ɔ djas, ye tok ne mot dhaa Zan Nduuel-bot. Tin, ye guaa náá, tɔ bot djas di tɔ Eyon ε Zεεb ɔ, mot di mɔɔ dhyyeb ɔ di boo-mot ne ne.

²⁹ «Bot ε mbyak Yisalaεl djas ne benɔnel ε epata e lapo naagwak nyε, bɔɔ myaal náá, Zεεb é mot epiki. Bhii tak, bɔɔ batazeduwa Zεεb pe daa Zan.

³⁰ Tin, eFalizye ne belyoel ε etsi ε Zεεb naabyen ekwosak ε Zεεb éteε'ɔɔ, be naapeε náá, Zan duu be Zεεb.»

‡ 7:27 Mal 3.1

³¹ Yezu eebaazeke náá: «Mε gek bot ε melu mak ne beze? Be baakɔa ne ze é?

³² Be é dáa zεεga bɔɔ dhyeeb mendiindil kɔ ebεσεε ε bot djas di edi ε. Tin, ngɔt katsim é, lεε ne bɔɔ besɔ be náá: “Bis eebwom bin ngɔmbi, bi ààpabɔl. Bis eedjeeb bin mεdjeeb me εsyee, bi ààpadje!”

³³ Etεε náá, Zan Nduuel-bot eezyε. Nyε nabe ààde mapa, ààde menyok, bi kake ε náá: “Ye é elyeeb ε di esa nyε deenek!”

³⁴ Σεηελε Mɔn Mot eezyε. Nyε epede ye edee ne menyok, bi kake ε náá: “Beeka nwyak é, mesa me é, ye é ede edee ne menyok. Nyε é mɔɔ sɔ benɔηel ε epata e lapo, ne bot ε di ne mbee tsik ɔ!”

³⁵ Tin, bot djas di myaal etson e Zeεb ɔ, be epegu náá, ye é epiki.»

Yezu tɔ ndjan ε Simɔη, mot Falizye

³⁶ Dhiiti mot Falizye zokazεdjɔo Yezu, nyε zede edee be ne. Wɔ gwaa, Yezu zetɔ pe daa le, nyε eezεnɔɔ di kɔ mesa.

³⁷ Pe kɔ del ε tak ye nabe é ne dhiiti moma nadi ne mbee dék ɔ. Dáa nyε nagwak náá, Yezu nadi é, kɔ mesa pe daa mot Falizye ε, nyε eezεzye ne beεb nasaεl ne εkok ε albat ε «tɔɔɔ» ne menanas.

³⁸ Nyε eezetyaa bhii kon ε Yezu, é dje si meko me. Nyε moo tin ebel meko ε Yezu ne miηal me. Tin, nyε moo suηal ye ne bhoo lo'ε, dɔɔ ne εboma nuub'ε é meko ε Yezu. Bhii tak nyε eezεso menanas kɔ meko me tak.

³⁹ E ghεη mot Falizye nadjɔo Yezu náá, nyε zede pe daa le ε, nabee deenek ε, nyε moo tin elii tɔ lyem'ε náá: «Mot tak epedi é ngooel-mεkpa ε Zeεb ɔ, pe nyε eegu mbi moma met nyε'aak. Pe nyε eegu náá, nyε é moma na mbee dék!»

⁴⁰ Yezu eezεke ne mot Falizye yenεk náá: «Simεη, me ε ne sa wat me di kwyel ελεε wε.» Simεη eezεke ne ne náá: «Bela, liia lyoel.»

⁴¹ Yezu eezεke ne ne náá: «Mot ngεt naakola bot εbá epata. Ngεt nakola ε, epata bemil εten, dhiiti tak epata bemil mekam-mεten.

⁴² Dáa bεε djas nadi áabe ne ghwyil εbulal epata tak ε, nakuma epata ε boopel kola bεε djas bebá. Pe tε bot εbá binεk εze aakwyel mot'enεk dhaa tyε?»

⁴³ Simεη eezεbεεza náá: «Ye be mam ε, me gek ε náá, ye aadi ε, mot nakola epata εbuepe ε.» Yezu eezεbεεza ne ne náá: «Simεη, wε ε ne gham.»

⁴⁴ Bhii tak nye eezeliig mis, gwyák moma tak. Nyey ne Simεη náá: «Wε eebee moma yak ε? Me eeni tε ndjan'ε, wε áapadje me medii me egwyii ε meko. Gwyáka! Nye eegwyii me meko ne minjal me, bhii tak nye eesunjal ye ne bhoo'ε.

⁴⁵ Wε áapaboma nuub'ε ε memuk mam. Ye kabε nyey ε, dáa me looni wak mos ε, nye áapakat εboma nuub'ε ε meko mam.

⁴⁶ Wε áapalεεb me mul kε lo. Ye kabε nyey ε, nye eelεεb me menanas ε meko!

⁴⁷ Etep tak ε me di lee wε náá: Beε ne mesyem me epelel! Etep tak ε nye lyaal boo kwyel deenek. Mot pelaa ba bim ε, zobaalyaal ε ba bim kwyel.»

⁴⁸ Yezu ε boozeke ne moma tak náá: «Mesyem mε, epelel.»

⁴⁹ Bot ε be ne be nεε nadi kε mesa ε moo tin elii pak'εε náá: «Nwyak ε nwyaa kwaambi mot di ne ghwyil εpel mesyem me bot'aak?»

⁵⁰ Tin, Yezu eezεke ne moma yenεk náá: «Emyaal ε lε eetsik wε. Tóa tε egwyem.»

8

Boa nadi egyee be ne Yezu o

¹ Bhii tak, Yezu eezetó kegoola bot Mbεε Bhaadal Eyon ε Zεeb pe tó eghaada ne kó bɔɔ mɛl, be ne bedjekel be kam ne bebá,

² Zenɔɔ bedhiiti boa nye nawyisal embee esisim tó lɔɔ o, ne bot nye natsik be o. Ye nabe é Maali di djóoaa Maali mot del ε Makdala o, mot esisim eten ne ebá nasɔaa tó le o,

³ Zan, mwaa Kuuzá, ngɔt tó lɔɔg ekukuma di sa mesa tó ndjaa mekoozi Ellood o, Suuzan, ne betε ne bedhiiti boa nadi ekwyee Yezu ne bedjekel be ne esa e bɔɔ met.

Kana sɔsel mebhek

⁴ Zukamwaa ne mot nadus mɛl ne mɛl o, naazesaala é bhaaz ε Yezu. Wɔ gwaa Yezu zekan kana yak:

⁵ «Dhiiti mot ngɔt zokazetó, kemwam mebhek tó pyeeb'ε. Tyee nye nadi emwam ε, dhiiti kyee bhek eezekwyit é ze. Haa kpaa-ghon ne bhek'enek, bhii tak, enen ε zεde ye.

⁶ Dhiiti kyee bhek kakwyit é, kó bɔs di ne bat mekok ε. Tyee bhek'enek nakwyit ε, ye é boozesyee, etεε náá, é di tak, bɔs nadi é ghas.

⁷ Dhiiti yak kyee bhek kazekwyit é tó engwyinini. Bhek tak eezekwyil lɔɔg wat ne engwyinini. Dikel engwyinini e tak eeboozεgó ye.

⁸ Ghuna dhiiti kyee bhek naazekwyit é mbεε bɔs. Tyee ye nawyee ε, bhek ne bhek naadjε bhum bedhet εbuεpe.» Bhii Yezu nasilal kana yenek ε, nye ezeke náá: «Gwakeka enyɔεpe, bi é di ne mɛlɔ étεp εgwak ɔɔ.»

nεεgaa é, pε kɔ tεeg etεε náá, bot ε di ni tɔ ndjan ɔ, needi tɔ gwyε.

¹⁷ Esa ee di tɔ sɔ ε djas aadi é, wyis é gwyε mwos dwoo. Esa e mεsɔ djas aadi é, nyen é gwyε.

¹⁸ Dika nε etson dum nε etεp djas bi di egwak ε! Etεε náá, mot aadi nε ba bim sonok ɔ, bε waabil nyε dhiiti. Tin, mot kwaadi ààbε nε sonok ɔ, bε aadis nyε ba bim djas nyε di nε yε ε.»

Nyεεg ε Yezu nε bɔn nyεεg

¹⁹ Nyεεg ε Yezu nε bɔn nyεεg zokazyε, zεbela Yezu. Bε eezεtyaa pε kel etεε náá, ze εdhaa étεp bε neekεboma nε Yezu nadi é, εkɔɔlaεpe étεp mεbu mε bot.

²⁰ Deenek, bε eezεlεε Yezu náá: «Nyoog nε bɔn nyoog é metetel pε kel, bε εpekwyel εboma nε nɔ.»

²¹ Wɔ gwaa Yezu zεbɔɔza nε bot djas náá: «Nyaag'am nε mɔn nyaag'am é bot ε di egwak mεkpa ε Zεεb, da looba nε yε ɔ.»

Yezu eelyak boo ghuu

²² Dhiiti dwoo, Yezu eezεni tɔ boo elεed bε nε bεdjekel bε. Bhii tak nyε eezεke nε nɔɔ náá: «Djhoosεεka, tɔ pε yii kyiid boo soob na djato-djato.» Bhii tak bε eezεtɔ.

²³ Dáa bε nadi eke tɔ elεed ε, gɔ eezεbe Yezu. Kasεka é, boo ghuu εlyelεpe eezεkan εpupal kɔ dii. Mεpupal mε ghuu tak eeghεε εbhyyeb ε mεdii kεεza é elεed, elεed moo tin eni mεdii. Mεdii mε tak εkεε sa yε aalwoodal-lwoodelak elεed, bε moo tin pak tsik nε εsyee.

²⁴ Bεdjekel ε Yezu eezεtiila pε daa lε, bε eezεdjem nyε nε etsim: «Ghεη, Ghεη, mena é di esik'aak!» Tin, Yezu eezεdjem. Bhii tak, nyε eezεbhem ghuu

nε ebhyeeb. E di'enek, ghuu eezεsila, bhwak moo tin «kup».

²⁵ Bhii tak, Yezu eezεke nε bedjekel bε náá: «Emyaal ε len é wo?»

Ye nabe é boo bwoo naamεt bε, bε naadyeebad-joka dhaa nyel. Bε moo tin edjinel pak'ɔ náá: «Nwyak é nwyaa kwaa mbi mot di náá, dɔɔ nε ghuu nε medii epegwak nyε?»

Yezu eetsik dhiiti mot nadi nε embee esisim ɔ

²⁶ Yezu nε bedjekel bε eezεkum pε kyee dik Ghadasa di di egwyákel nε kyee dik Ghalile ε.

²⁷ Dáa Yezu nadi esul tɔ elεed ε, dhiiti mot dεl tak zokazyε, zεboma nε nε. Mot tak nabe é nε embee esisim nadi dhedhek nyε ε. Nyε nabe é ààbε nε ekaad é nyel, ààkadidi tɔ ndjaa. Nyε nakadidi é tɔ mεvit.

²⁸ Dáa nyε nabee Yezu ε, wɔ gwaa nyε zεbo tsim. Nyε eezεkwyit mεboŋ si mεko mε. Nyε eezεbo tsim, nyεy nε nε, náá: «Mena é nε yaa tεp, Yezu, Mɔn Zεeb-Mεkaake? Mε epedjaala nε nɔ, nàtwak mε!»

²⁹ Yezu eezεke nε mbee sisim náá, nyε wyis tɔ lε, etεε náá, ye nabe é, mbee sisim tak eezeloobe di tɔ lε. Nyε nadi é kɔɔla mεmbɔ nε mεko nε eghwooz étep nyε neemεtaa é di wat. Mot tak nabebwak yε ε bwakak. Da mbee sisim tak é kazyeeegal nyε, kyeed nyε tɔ bal.

³⁰ Yezu zokazεdji nyε náá: «Din ε lɔ é εyé?» Nyε eezεbɔɔza nε nε náá: «Yam din é “Mεkɔm-mεkɔm”», etεε náá, bεte nε embee sisim naani tɔ lε.

³¹ Tin, embee esisim nadi edjaala nε Yezu náá, nyε nàkyeed bε tɔ guk di ààbε nε εsik ε*.

* **8:31** *guk di ààbε nε εsik ε* Ye é boo guk edi bot ε nazegwyε ε di ε

³² E di tak, ye nabe é ne boo esaŋ ε beghwyee nadi é egɔɔ kɔ mɛtsok menekɔ. Embee esisim eezɛdjaala ne Yezu, náá, nye kyeed be tɔ menyel me beghwyee binɔk. Yezu zokamyaa be.

³³ Tin, wɔ gwaa embee esisim zɛwyis tɔ mot'enɔk, ni tɔ esaŋ ε beghwyee binɔk. Bɔɔ djas eezɛsul ne ekaab pɛ be nadi kɔ ekalel ɛtsok ε. Wɔ gwaa be zɛges, kɛghaaga tɔ dii, diida. Bɔɔ djas si na «bheee».

³⁴ Dáa bot ε nadi ebaal mɛsaa me beghwyee binɔk nabee edjema binek djas ε, be é boozetsema ne ekaab, sik, kɛlee bot kɔ eghaada ne kɔ bɔɔ mɛl.

³⁵ Bot zokawyis tɔ kɛbee sa nasée ε. Be eezɛkum pɛ kyee Yezu nadi é. Tin, be eezɛbee mot na embee esisim mɛkɔm-mɛkɔm nawyis tɔ le ɔ, ndiindil é ngwoob ε Yezu, nye ne ekaad é nyel. Nye nyel enyɔpe. Wɔ gwaa, bwɔɔ zɛmɛt bɔɔ djas.

³⁶ Bot ε nabee edjema binek djas ɔ, moo tin ebaŋa dáa mot na embee esisim mɛkɔm-mɛkɔm natsak ε.

³⁷ Tin, bot ε kyee dik'enek djas zokazɛdjaala ne Yezu náá, nye dus kɔ kyee dik'ɔɔ, etɛ náá, ye naadyebakpaa be boo ekɛɛd.

Bhii tak, Yezu eezɛni tɔ elɛɛd, nɔɔ nyel'ε, sik.

³⁸ Mot na embee esisim nawyis tɔ le ɔ booke ne ne náá: «Me kwyel é, mena gyeeka lɔɔg wat.» Yezu é boozeswaal nye. Nye é booke ne ne náá:

³⁹ «Sika pɛ ndjan'ɔ, da wɔ é kɛlee enɛm ne embɛɛ Zɛɛb sa wɔ ε.» Mot'enɔk eezɛtɔ, nye moo tin ekɛtuud kɔ ghaada djas dáa Yezu natsik nye é.

Tsik ε mɔn Zayilus ne moma nadi ne ebé ε ghiya ɔ

⁴⁰ Dáa Yezu nabula pɛ yak kyiid dii ε, wɔ gwaa zukamwaa ne mot baazɛboma ne ne, etɛ náá, be nadi ebwood nye.

⁴¹ Dhiiti mot, din ε le nabe é Zayilus. Nyε nadi é, kukuma ndjaa mendjaala me eYuda. Nyε eezεkwyit mebon si meko ε Yezu, é djaala ne ne, nyε zyε pe ndjan'ε,

⁴² etεε náá, nyε nabe é ne sim esyes ε le ngot, mon membu kam ne ebá nadi ebé εkpanεpe pak tsik ne esyee.

Dáa Yezu nadi etó ε, zukamwaa ne mot nadi edu nyε, bak eghuηa nyε é nyel, bak tak etiidal nyε.

⁴³ Ghuna tó εdhuu ε bot binok, ye nabe é ne dhiiti moma, ghiya nadi ekekεk nyε é nyel boa, àabe ne etsek o. Ébé ε tak naasa ne ne tyee membu kam ne ebá. Nyε naasilal epata be djas tó mendjaa me megwoma εbuεpe, ébé àasi. Ye nabe àabe ne mot nakwak εgwom ébé ε tak.

⁴⁴ Nyε eezεdu Yezu bhii kon, zyε, zεmet kyee εgho ε kaad'ε wat. Meta nyε nazomet ε, é di tak wat, ghiya eezetsek.

⁴⁵ Yezu eezεdji náá: «Eze met me?» Wó gwaa bot djas kela, Pyεεd eezεke náá: «Gheη, beea kwaambi zukamwaa ne mot di etiidal wó ekyee djas'aak.»

⁴⁶ Deenek, Yezu eezεke náá: «Tsεεtse mot eekwyet me, etεε náá, me eegwyak náá, dhiiti pes mebwala eewyis tó lam.»

⁴⁷ Dáa moma tak nagu náá, nyε eepanaa ε, moma tak eezεtiila, nyε moo pwak ne bwoo. Bhii tak, nyε eezεkwyit mebon si, si meko ε Yezu. Nyε eezεmyam é mis me bot djas, tin, nyε moo elεε ne bot djas étεp yé nyε namet kaad ε Yezu ε, ne dáa nyε nakatsak é di tak wat ε.

⁴⁸ Wó gwaa Yezu eezεke ne ne náá: «Esyes ε lam, εdum ε kon ε lo ne Zεεb eetsik wó. Tóa tó egwyem.»

⁴⁹ Tinaak, Yezu dinaa elii, ngoola-ngoola ngot

eezedus pe ndjan ε kukuma ndjaa mendjaala me eYuda, zεεε nye náá: «Esyses ε lo eezepεka. Nákabaadhek lyoel.»

⁵⁰ Yezu nabe áabis sa be nadi elii ε. Nyε é boozεke ne Zayilus náá: «Nábem ba. Duma kon ne Zεeb, nyε waatsak!»

⁵¹ Dáa nyε nakum pe ndjan ε, nyε eezelu bot djas náá, be nàni tɔ ndjaa. Nyε nazomyaal é, bedjekel be, Pyeed, Zan ne Zak, zenɔ sεeg ne nyεeg mɔn.

⁵² Bot djas, metetel ne megwye, ne etanjal ne etsim. E di'enek Yezu é booke ne nɔ náá: «Nàdjeka. Mɔn àapagwye. Nyε é é gó.»

⁵³ Wɔ gwaa bot gɔ nyε etεε náá, be nadi egu náá, mɔn naazegwye.

⁵⁴ Nyε eezεmet mɔn é mbɔ, nyε eezεben gwood. Nyey ne ne náá: «Mɔn'am, wyla!»

⁵⁵ E di tak wat, mɔn'enɔk eezεgom, nyε eezεwyl. Bhii tak, nyε é boolwom be náá, be dje mɔn tak edee e dek.

⁵⁶ Tin, ye nabe é, sεeg ne nyεeg naadyeebadjoka elyεlεpe. Yezu eezelyak be náá, be nàlεε bot sa nasael ε.

9

Lwomel bedjekel kam ne bebá

¹ Yezu eezεsεeg bedjekel be kam ne bebá, nyε eezεdje be ghwyil ne eghen εsɔ embee esisim ne etsik ε bot ε mebé.

² Bhii tak nyε eezεlwom be, be kegoola Mbεε Bhaadal Eyon ε Zεeb, ne etsik ε membel.

³ Nyε eezεdje be etsi náá: «Sa mot àànɔ sonok wat, nyε neetɔ ne ye mɛdjon. Sa mot àànɔ

sek, àànɔɔ ɛkoo, àànɔɔ mapa, keyaka ne epata tɔ mengwyɛ men. Sa mot ààdi ne ekuwa ebá.

⁴ Tɔ edi djas bot aamyaa náá, bi sulal ɛ, dika tɔ ndjaa tak, kekum dwoo bi aadus tin ɛ.

⁵ Mɛl djas bot aapɛɛ náá, bi nàsulal pɛ daa lɔɔ ɔ, kpaaka yibɔ, da bi é kut bɛ piib mɛko men. Yɛ aadi é, tyee mwana étɛp embee esesɛɛ bɔɔ.»

⁶ Bɛdjekel eezetɔ pɛ mɛl djas, kɛɛɛ bot Mbɛɛ Bhaadal, ne etsik ɛ bɛɛ ne membɛl é edi djas.

Kɛɲ ɛ Elood

⁷ Tin, Elood mot nadi mɛkoozi kɔ kyee dik Ghalile ɔ, naagwak menduk mɛ etɛp binek djas. Nyɛ nabɛ é àákagu sa nyɛ gek ɛ, etɛɛ náá, bɛdhiiti bot nadyeebake náá: «Zaɲ Nduuel-bot nagwyɛ ɔ, naazegom.»

⁸ Bak náá: «Yɛ é ngoolel-mɛkpa ɛ Zɛɛb, Eli, ee-baatuula!» Yak kyee bot náá: «Yɛ é ngoolel-mɛkpa ɛ Zɛɛb na mwa, eezegom!»

⁹ Elood é boozeke náá: «Yɛ nabɛ é mam ɛmet naazelwom náá, bɛ tsak Zaɲ Nduuel-bot. Ha yenɔk é nwyaa mot? Mot mɛ di egwak bot é lii etɛp bak ko ɛsu ɛ lɛ'aak é zɛ?» Nyɛ nadi esaa nyɛ neebɛɛ Yezu.

Yezu eedjɛ edee ne botom bɛmil ɛtɛn

¹⁰ Bot ɛ lwoma zokazɛbula pɛ daa Yezu, bɛ moo tin é baɲa nyɛ esesɛɛ ee bɛ nasa ɛ. Yezu é boozɛdul bɛdjekel bɛ, tɔ ne nɔɔ é ngwoob dhiiti ghaada di edjóaaa Bhɛtsaida ɛ.

¹¹ Ghuna bot ɛbuɛpɛ naagu ze bɛ nadi tɔ ɛ, bɛ ɛ boozɛdu bɛ. Yezu zokazɛboma ne nɔɔ. Bhii tak, nyɛ moo tin é lyo bɛ dum ne ɛyɔɲ ɛ Zɛɛb, ne etsik ɛ bot ɛ nadi kwos mɛtsika ɔ.

12 Dáa dwoo nabe ye moo sila ε, bedjekel be kam ne bebá é boozetiila pe daa le. Boo ne ne náá: «Swaala bot bak, be tó pe ko mel ne pe to epet eedi pak ne wak ε, etee náá, penek be waake bela di ndjok ne edee e dek, etee náá, menaka wak é to bal.»

13 E di'enek, Yezu eezεboozza ne nɔɔ náá: «Djeka be edee biyo be emet!» Be eezεbaake ne Yezu náá: «Bis zokalik é, ne emapa eten, zenɔɔ besu ebá. Wɔ kwyel bilak é náá, bis keεbɔm edee ee bot bak djas ee?»

14 E di'enek, metan me bot naakum tyee botom bemil eten. Tin, Yezu é boozεlee bedjekel be náá: «Dhilka bot djas mendiindil, zεega bot mekam-mεtεε-ten e di wat.»

15 Bedjekel é boozεsa dáa Yezu nake ε. Be eezεdil be si.

16 Bhii tak, Yezu zenɔɔ emapa eten ne besu ebá binek, nye eezεben mis pe εko, zεghaapeε Zεeb étεp edee binek. Nye eezεpyak mapa, nɔɔ, djε bedjekel be, be kaa bot djas.

17 Mot ne mot naade, djil. Bedjekel zokabula ne mebhwaakam ne ebá yii mebhuhhwak.

Pyεed eeleε náá, Yezu é Mesia

18 Dhiiti dwoo, dáa Yezu nadi é djaala ne Zεeb e dhiiti sum di ε, bedjekel nadi é, be ne ne. Nye eezεdji be náá: «Medhuu me bot ke náá, mam é zε?»

19 Be eezεboozza ne ne náá: «Bak ke é náá, wɔ é Zan Nduuel-bot. Bedhiiti náá, wɔ é ngooel-mεkpa ε Zεeb Eli. Bedhiiti pe ka baake ε náá: Wɔ é ngot to bengooel-mεkpa ε Zεeb ee na mwa zegom ɔ.»

20 Yezu eezεdji be náá: «Ye kabe biyo ɔ, bi ke náá, mam é zε?» Pyεed eezεboozza ne ne náá: «Wɔ é Mesia Zεeb nadhis ɔ.»

21 Yezu eezɛdul bɛ mɛlɔ ɛlyɛɛpɛ, nyɛ eezɛkɛ nɛ nɔɔ nɔ́á, sa bɛ ààlɛɛ bot.

Ɛkɛnɛɛɛɛ ɛ Yezu nalɛɛ éteɓ ɛsyee nɛ ɛgom ɛ lɛ ɛ

22 Bhii tak nyɛ eebaazɛbil náá: «Yɛ goka é Sɛɛɛɛɛ Mɔn Mot zukaɛ ɛbuɛpɛ. Bɛpaa, nɛ eboo bɛghaa-Zɛɛb, zɛnɔɔ bɛghan ɛ mɛkana mɛ etsi é waabhina nyɛ. Nyɛ waagóaa. Mɛlu mɛlɛl bhis ɛsyee ɛ lɛ, nyɛ waagom.»

23 Bhii tak, Yezu eezɛlii nɛ bɔɔ djas náá: «Yɛ bɛ náá, mot ngɔt ɛpekwyɛɛl ɛdu ɛ mɛ ɔ, nyɛ bet ɛkwyɛɛg ɛ nyɛl'ɛ, da nyɛ é bɛp mɛlaaba mɛ mɛlu djas, da nyɛ é du mɛ.

24 Etɛɛ náá, mot di ɛkwyɛɛl ɛtsik nyɛl'ɛ ɔɔ, nyɛ aanákwaabela tsik, mot é myaal ɛsu ɛ tsik nyɛl'ɛ éteɓ'am ɔɔ, nyɛ waabela tsik.

25 Mot ɛbela mɛvu mɛ bɔs djas, da nyɛ é gel nyɛl'ɛ ɛmet ɔɔ, nɛghu ɛpul ɛ nyɛl ɔɔ, yɛ é tɛtɛ yé nyɛ sa?

26 Mot aagwak sen éteɓ'am nɛ éteɓ mɛkpa mam ɔ, tin, mam Sɛɛɛɛɛ Mɔn Mot é waagwak sen éteɓ'ɛ dwoo mɛ aazyɛ tɔ duma yam ɛ, nɛ tɔ duma Saag'am nɛ efofop na dɛɛ ɛ.

27 Mɛ lɛɛ bin nɛ tɛɛtɛ náá: Tɔ sama bot ɛ di wak'aak, bɛdhiiti aanákwaagwyɛ, bɔɔ ààbɛɛ Ɛyon ɛ Zɛɛb.»

Bhwoob ɛ Yezu eeswoola

28 Yɛ naasa tyee yenga wat bhii nyɛ naalii deenek ɛ, Yezu zɛnɔɔ Pyɛɛd, nɛ Zan, zɛnɔɔ Zak, nyɛ eezɛbyet kɔ dhiiti ɛtsok éteɓ ɛdjaala nɛ Zɛɛb.

29 Esok Yezu nadi ɛdjaala ɛ, bhwoob'ɛ zokaaaswoola; ekaad bɛ moo puu, ɛkasɛpɛ dáa ngwyɛs bhi.

30 Kasɛka tin é, bot ɛbá é bhaaz'ɛ, bɔɔ elɛɛ elɛɛ nɛ Yezu. Yɛ nabɛ é Moiiiz bɛ nɛ Eli.

31 Bε eezetuula kuku mekas ε Zεεb. Bε nε Yezu nadi elii dum nε tyee nyε aasilal lwomel'ε ε, nε dāa nyε aakegwye pε Yeluzalem ε.

32 Tinaak, Pyεed nε bot ε lɔɔg'ε eezeduma tɔ gó, «syaaz». Dāa bε nakadjem ε, bε eezεbee mekas ε Yezu nε bot εbá bε nε bε nɔɔ nadi ɔ.

33 E di nabe náá, bot binɔk moo é lik Yezu ɔ, Pyεed eezεke nε nε náá: «Gheη, ye goka é náá, mena di wak. Djhoosumka epεt elεl: Wat yɔ, dhiiti yii Moiiz, dhiiti kadi é yii Eli.» Tinaak, nyε nadi é, ààgu sa nyε nadi eke ε.

34 E di nyε nadi elii deenek ɔ, eguud eezεsul, zεbutal bε. Bεdjekel é boozεgwak bwɔɔ é εbee dāa eguud di ebutal bε ε.

35 Tɔ eguud binek, gwood zokagék náá: «Nwyak é Mɔn'am mε nazetɔ ɔ. Gwakeka nyε.»

36 Bhii gwood nazegék ε, ye nakalik é, Yezu nyε εmet. Bεdjekel é boozεsyel tεp tak, é gheη tak, bε nabe é ààbaηa bot etεp ee bε nabee ε.

Yezu eetsik dhiiti mɔɔ dhyeeb embee esisim nadi dhek ɔ

37 E yak elu Yezu bε nε bεdjekel elεl binɔk moo é sul εtsok elenek, wɔ gwaa zukamwaa nε mot zεboma nε nε.

38 Tɔ εdhuu ε bot binɔk, mot ngɔt moo tin etsim: «Lyoel, mε epedjaala nε nɔ, kela mis kɔ mɔn'am. Ye é sim mɔn'am!

39 Etεε náá, mbee sisim é mεt nyε ɔ, é di tak wat nyε epekyeeb, bhii tak, ye é kadheeg nyε εlyelεpe, é di'enek mεwyil moo tin ewyis é nuub mɔn. Mbee sisim tak εpezuk nyε εlyelεpe, εdus ε lε tin nε lyel.

40 Ye bε é, mε eedjala nε bεdjekel bɔ náá, bε sɔ mbee sisim tak. Bε ààpakwak yε.»

⁴¹ Yezu eezεke ne nɔɔ náá: «Embee bot, bot di ààdum koŋ ne Zεεb ɔ! Melu mεdhen kalik ne nam é εdi tɔ len? Baabela náá, melu mεdhen me di egoka ne εmaad bin? Dha me ne mɔn'ɔ wak.»

⁴² Dáa mɔɔ tak nazokunaa ne Yezu ε, wɔ gwaa mbee sisim zegheεg nye si. Bhii tak ye moo zεdheεg mɔn'enɔk εlyelepe na «buku-kuku». Tin, Yezu eezεbhem mbee sisim tak, mɔn eezεtsak. Bhii tak Yezu eezεbulal nye é mεmbɔ me sεεg.

⁴³ Ye nabe é bot naadyeebadjoka mεbwala me Zεεb tin.

Yezu eebaaleε esyee ne εgom ε le

Dáa ye be náá, mot ne mot nabe é, nye dinaa edjoka ne εsɔs etεp djas Yezu nadi esa ε, Yezu é boolεε ne bεdjekel be náá:

⁴⁴ «Bεεka melɔ men εnyɔepe étεp bi neebaal sa me aaleε bin ε: Ye kalik é batsa Sεεŋele Mɔn Mot neekaaa é mεmbɔ me bot.»

⁴⁵ E di'enek, bεdjekel nabe é, ààmεt lo tεp nye nalεε be ε, etεε náá, εsuk ε tak nadi be é syela étεp be needi ààmεt ye. Be nadi é ne bwɔɔ εdji ε Yezu tεp'enek.

Ye é εzε di boo-mot?

⁴⁶ Bεdjekel moo tin ebe mεso pak'ɔɔ étεp be neegu tɔ sama yɔɔ, εzε di boo-mot.

⁴⁷ Yezu eezεgu sa nadi edhaa pak'ɔɔ ε, wɔ gwaa nye zenɔɔ mɔɔ dhyyeb, neεg nye é ngwoob'ε.

⁴⁸ Nyey ne nɔɔ náá: «Mot é myaal mɔn'ak kɔ εsu ε kwyel nye di ne ye ne nam ɔ, nye myaal é mam. Tin bela náá, mot é myaal me ɔ, nye myaal é, mot nadhis me ɔ. Etεε náá, mot di mɔɔ dhyyeb pak biyɔ djas ɔ, ye é nyey ε di boo mot.»

Mot di ààbhina mena ɔ, nye é mot'ena

⁴⁹ Zan eezɛke nɛ Yezu náá: «Ghɛɲ, bis eebee dhiiti mot esɔ embee esisim nɛ din ɛ lɔ. Bis eelyak nye, etɛɛ náá, nye ààkɛ lɔɔg wat mena nɛ bɛ nɔɔ.»

⁵⁰ Tin, Yezu eezɛbɔɔza nɛ nɔɔ náá: «Sa mot ààlyak nye, etɛɛ náá, mot di ààbhina bin ɔ, yenɔk é mot'en.»

Bot ɛ dɛl Samali eepɛɛ náá, Yezu sulal kɔ dɛl ɛ lɔɔ

⁵¹ Dáa ɛlu ɛ nabe náá, nye neebyet tɔ gwoo ɛ, nadi ye eezekunaa ɛ, Yezu é boozɛke nɛ lyemɛ wat náá: Nye ɛpetɔ pɛ Yeluzalem.

⁵² Nye é bookyeed engoola-ngoola mɛbhaadal pɛ sok. Engoola-ngoola eezɛtɔ, bɛ eezɛni tɔ dhiiti dɛl pɛ kyee dik Samali ɛtɛp bɛ neekoobal nye di, nɛ esesɛɛ djas.

⁵³ Tin, bot ɛ dɛl zokabyen náá, nye nàsulal kɔ dɛl ɛ tak, etɛɛ náá, nye nadi ɛtɔ pɛ kyee dik Yeluzalem.

⁵⁴ Dáa Zak nɛ Zan bɛdjekɛl bɛ nagwak deenek ɛ, bɛ é boozɛke náá: «Ghɛɲ, wɔ ɛpekwyɛl náá, bis djɔo du, dus tɔ gwoo ɛtɛp ye neezɛdik bɛ?»

⁵⁵ Yezu eezɛliig mis, bhɛm bɛ. Bhii tak, nye moo edul bɛ mɛlɔ.

⁵⁶ Bɛ eezɛtɔ pɛ dhiiti dɛl.

Bot ɛ di ekwyɛl ɛdu ɛ Yezu ɔ

⁵⁷ Yezu bɛ nɛ bot ɛ nadi egyee nɛ nɛ ɔ gba-gba kuku kyeed, wɔ gwaa dhiiti mot zokake nɛ nɛ náá: «Mɛ ɛpekwyɛl ɛdu ɛ wɔ é di djas wɔ aatɔ ɛ.»

⁵⁸ Yezu zokazɛbɔɔza nɛ nɛ náá: «Bɛbhɛk é nɛ eku, enen é nɛ mɛk. Kabela náá, Sɛɛɲɛlɛ Mɔn Mot tok nɛ di nye di edjaasi nɛ ɛwala ɛ.»

⁵⁹ Nyε eezeke ne nwyak dhiiti mot náá: «Dua me.» Mot'enək eezebɔɔza ne ne náá: «Gheη, pookobet me, me pookokedel sok saag'am.»

⁶⁰ Yezu eezebɔɔza ne ne náá: «Beta bot ε zegwyε ɔ be del myon mɔɔ. Ye be wɔy ɔ, t́a, kelyaal bot Eyon ε Zεεb.»

⁶¹ Nwyak dhiiti mot eebaake ye náá: «Gheη, me waadu wɔ. Pookobet náá, me ke emwana ne bot ε mebyel mam.»

⁶² Yezu eezebɔɔza ne ne náá: «Mot zemet awata, da nyε baake náá, nyε bulal mis, gwyák pe bhis ɔ, yenək tak àapakɔa ne Eyon ε Zεεb.»

10

Lwomel bedjekel mekam-meten ne mekam-membá ne eba

¹ Bhii tak Gheη eeaaazεséε bedjekel mekam-meten ne mekam-membá ne eba. Nyε eezelwom be bebá-bebá pe tɔ eghaada ne kɔ mel me Yezu nabe náá, nyε aadhan ε.

² Nyε eezeke ne nɔɔ náá: «Pyeeb ne bɔk. Bot ε mesa àabu. Ye goka é bi djaala náá, nakuma pyeeb nyε dhis bedhiiti bot ε mesa étεp be needis edee tɔ pyeeb.

³ T́ka! Me kyeed bin tin é, d́a bɔɔ ebhata tɔ eben.

⁴ Sa mot àànɔɔ ngwyε epata, àànɔɔ ekoo, àànɔɔ-nɔηak dɔɔ ne mεpapa. Sa mot àabe tyε étεp meswosel e ze.

⁵ Pe tɔ mendjaa me bi aani ε, keka sok náá: “Betka náá, egwyem di tɔ ndjan'ak!”

⁶ E di'enek, mot di ne egwyem o di tin o, egwyem bin e waakala ko le. Ye kabe naa, mot egwyem tok tin o, egwyem bin e waabula pe daa len.

⁷ Sulalka to ndjaa mot egwyem e tak. Bi e djaaa medii ne edee o, da bi e de ye, etee naa, mot-mesa goka e ne ebela etuud e mesa me. Sa mot aake mendjaa ne mendjaa.

⁸ Bi e ni ko del, da be e myaal bin o, deka edee be aadje bin e.

⁹ Tsikeka bot e mebe di ko del e tak o, da bi e lee bot e del naa: "Eyon e Zeeb eezekunaa ne nen."

¹⁰ Pe ko bedhiiti mel me bi aani, da bot e mel me tak etee naa, bi nasulal pe daa lo e, toka ko ebese e del, da bi e lee ne no naa:

¹¹ "Bis epikut piib meko mes. Ye e piib del e len zenaata bis e meko e. Ye goka e naa, bi gu naa, Eyon e Zeeb moo e ekunaaepe ne nen."

¹² Me lee bin e tsetse naa: Dwoo Zeeb aazep ee bot e, bot e del elak e waapeeaa e elyelope dhaa bot e del e Sodm.»

Eghaada eedi byen edum kon ne Zeeb e

¹³ «Haa kpaa-ghon ne no, ghaada Koodazin! Haa kpaa-ghon ne no, ghaada Bhetsaida! Etee naa, endem e mebwala me nasael pe yeb e pedi naa, ye nasael e pe ghaada Tiid ne pe Sidon o, pe bot e mel menok eeloobot kaad epum, pe be naazeloba mesii, pe be naaloozeliig elyem bo.

¹⁴ Etep tak e me di elee bin naa, dwoo bot aadi peeaa e, yeb e mep ee waadhaa yii Tiid ne Sidon ne melyel.

¹⁵ Kapelnaum! Ye kabε wɔy ɔ, egeka bɔ é náá, wɔ é nε ghwyil εbyet, tɔ pε εko? Wɔ waasila pε si, batakekum dεl ε myonj mε bot.»

¹⁶ Nyε eebaazeke nε bedjekel bε náá: «Mot aagwak bin ɔ, nyε eegwak mε. Mot ε byen bin ɔ, nyε byen é mam. Tin, mot ε byen mε ɔ, nyε eebyen mot nadhis mε ɔ.»

Ebula ε bedjekel mekam-meten nε mekam-membá nε ebá

¹⁷ Bedjekel mekam-meten nε mekam-membá nε ebá nalwomaa ɔ, bε eezebula nε memyaala djas. Bɔɔ nε Yezu náá: «Ghenj, dɔɔ nε embee esisim εpegwak bis esok bis di elii nε nɔɔ é ghwyil din ε lɔ ε!»

¹⁸ Yezu eezebɔɔza nε nɔɔ náá: «Mε di é, ebee Satan eedus pε εko sila pε kɔ bɔs tyee ngwyes bhi.

¹⁹ Gwakeka: Mε eedje bin eghenj εke kɔ benyo, ebaalwɔl, dɔɔ nε εke kɔ ghwyil mot mεbhuka men. Ye tok nε sa yε aasa bin.

²⁰ Tin, nàmyaalaka, etεε náá: Embee esisim εpegwak bin. Bi goka nε emyaala é, yε bε náá, min men é kwyalaa tɔ gwoo ɔ.»

Yezu eemyaala

²¹ E ghenj tak, Yezu naazεbela boo memyaala Sisim na Dεε nadjε nyε é. Nyε eezetsim: «Hee Saag'am, Ghenj gwoo nε bɔs. Mε eeghaapεε wɔ, étεp náá, wɔ eelyaal bɔɔ dhyyeb esesεε ee di esyela é mis mε betsonj ε bot nε bot ε metselal ε. Nε tseetse, Saag'am, wɔ nε kwyel náá, eesael deenek.

²² «Saag'am naadjε mε esonok djas. Ye tok nε mot di egu Mɔn, yε di ààbε Sεεg ɔ. Tin, mot aanàkwaagu

náá, Sεεg εζε, γε di ààβε Mον ο, νε bot ε Mον aakwyel elyaal be nwyak ο.»

²³ Bhii tak Yezu eezeliig mis, gwyák bedjekel, nyey νε nωω, bωω bεmet náá: «Mεnyω νε biyω, etεε náá, bi εpebee sa bi di ebee'enek!

²⁴ Etεε náá, με λεε bin é tseεtse náá, βετε νε bengoolle ε mekpa ε Zeεb νε bεmekoozi εbuεpe nadi é, νε gwyes εbee esa ee bi di ebee'aak. Saabεgωs νε nωω é náá, be nabe é ààbee. Be nadi é νε gwyes εgwak sa bi di egwak mos'ak, saabεgωs νε nωω é náá, be nabe ààgwak.»

Kana mot Samali na mbεε lyem

²⁵ Dhiiti lyoel etsi e Zeεb naazεwyel, lii, étεp εbhowal ε Yezu. Nyε eezεdji nyε náá: «Lyoel, με sa dáa étεp με neebela tsik na kωm-kωm?»

²⁶ Yezu kabωza νε νε náá: «Haa, yé nakwyalel tω mekana με etsi bina? Wω gwak dáa tω tak?»

²⁷ Mot'enak zεbωza náá: «“Wω goka é wω kwyel Gheη, Zeεb'ω νε lyem'ω djas, νε sisim'ω djas, νε ghwyil'ω djas, νε etselal ε lω djas.” Zenω náá: “Wω goka é wω kwyel sωω mot dáa wω di ekwyel nyel'ω met ε*.”»

²⁸ Yezu é bookake νε νε náá: «Wω é bωza enyωεpe. Sa deenek, wω neebela tsik na kωm-kωm.»

²⁹ Ghuna ghaa mekana με etsi ε Zeεb nakwyel é, nyε neebela gham. Nyε é boodji Yezu náá: «Sω'am mot εZe?»

³⁰ Yezu kadje nyε kana é náá: «Dhiiti motom nadi edus pε Yeluzalem, eesul pε Yeliko. Wω gwaa bot ε djii zεmet nyε, duma nyε é nyel νε mebin, bωω zεdek nyε esa be djas. Be eezεkaab, lik nyε ekωω νε esyee.

* **10:27** Det 6.5; Msa 19.18

³¹ Dhiiti ghaa-Zεεb nadi edhaa é ze'enek tyee zem-dhyee. E ghen nyε nabee mot'enøk ε, nyε eezεgwoob, tó yε.

³² Tyee wat nε dhiiti Levit† eezεkwyil é di'enek, bee mot mεpyon, gwoob nyε, tó yε.

³³ Tin, dhiiti mot dεl ε Samali nadi etó yε mεdjon ɔ nazeikum é ngwoob mot mεpyon menøk. Dáa nyε nakabee nyε é, wɔ gwaa ghon zemet nyε elyεlεpe.

³⁴ Nyε eebaazetiila é bhaaz'ε, zεso nyε mεnyok nε mul tɔ mεpyon, zεdjel nyε yε é. Bhii tak, nyε eezεkel nyε kɔ yaaga yε, tó nε nε pε ndjaa bεdjon. Tin, nyε eezεgwom nyε enyɔpe.

³⁵ Yii myen, mot dεl ε Samali yenøk eezεwyisal ghwooz epata mεdil ebá, zokadjε nakuma ndjaa bεdjon. Nyey nε nε náá: “Gwoma motom'ak. Epata djas ee wɔ aadi ebaawyisal étep'ε ε, mε waaboobulal wɔ yε é, dwoo mε aabula ε.”»

³⁶ Yezu eebaazεdji náá: «Tɔ bɔɔ bεlεl, εzε kɔa nε εdi é mɔɔ sɔ mot bot ε djii namet ɔ?»

³⁷ Ghaa etsi zokabɔɔza náá: «Yε é mot nagek nyε ghon ɔ.» Yezu é booke nε nε náá: «Tɔa, da wɔ é sa deenek.»

Yezu pε daa Maat nε Maali

³⁸ Dáa Yezu nadi é ze, bε nε bεdjekel bε ε, wɔ gwaa bε zokazeni tɔ dhiiti dεl. Tɔ dεl ε tak ye nabε é nε dhiiti moma din ε lε nabε é Maat. Nyε eezεsulal pε daa lε.

³⁹ Nyε nabε é nε dhyyeb, din ε lε nabε é Maali. Maali tak nadi é si meko ε Ghen Yezu é gwak mεlyo mε.

† **10:32** Levit ELevit ε bot ε di sa mesa tɔ kok ndjaa-ebuwa ɔ.

⁴⁰ Ye kabela é náá, Maat nadi egghuula étép edjaab ε edee e bedjon. Maat é boozye zeke ne Yezu náá: «Ghen, wə ààbee dáa dhyeeb'am dhuugal me ne betε ne yak mesa mam me emet'aak é? Lεεa nye náá, nye kwyee me.»

⁴¹ Ghen eezebɔɔza ne ne náá: «Maat, Maat, wə epobem ba é etép e gwyes, lyem'o epesəs etép ebuepe yii toto.

⁴² Ye é ne sonok wat di ne boo metan. Maali séε sa di ne boo metan ε. Yiizaag é di náá, mot tok ne ghwyil ε dek nye ye é.»

11

Yezu epelyaal bedjekel be, dáa be di egoka ne edjaala Zeεb ε

¹ Dhiiti dwoo, Yezu nadi edjaala é dhiiti di. Dáa nye nasilal ε, djekelε ngɔt eezeke nye náá: «Ghen, lyaala bis edjaala Zeεb, dáa Zan nalyaal bedjekel be ε.»

² Yezu eezeke ne nɔɔ náá: «Bi é di edjaala ɔ, keka náá:

“Zeεb Σεεg'es,

din ε lo di Dεε ye guaa.

Eyon ε lo zye.

³ Djε bis elu ne elu edee di egoka ne nes ε.

⁴ Pela bis mesyem mes

etεε náá, bisɔ epapel bot ε nasa bis mebiyo ɔ.

Sa wə ààbet bis tɔ mebhawal.”»

⁵ Yezu eeεbaake ne nɔɔ náá: «Djhoopookogek tyee náá: mot ngɔt pak'en é ne sɔ, nye eezetɔ pε daa le kuku pum. Nye eezeke ne ne náá: “Sɔ'am, djema! Kola me emapa elɛl,

⁶ etee náá, dhiiti so'am ngot nadi é mendjon o, aloo ne tuula nenak pe daa lam. Me tok ne edee me dje nye."

⁷ Djhoopookogekeka náá: So'e eezebɔɔza ne ne to ndjan'e náá: "Beta me gwyem! Ebe e ndjaa moo é kɔla ne engon. Bis ne bon moo é 'kpop' mendjaa me si. Me aanakwaawyeɛ, zedje wo emapa é tak!"

⁸ Me lee bin e tseetse náá, ye be náá, nye di aawyeɛ zedje nye é, ko esu e eso e be ne ne o, nye waabatawyeɛ, zedje nye sa nye san é, etee náá, so epenaada ewaab, aabe ne sen.

⁹ Ye be mam o, me kalee bin e náá: Waabka, bi e waadjeaa. Saaka, bi e waabela. Diigka é ebe e ndjaa, be waadii bin ye é.

¹⁰ Ye é deenek, mot aawaab o, nye waadjeaa. Mot aasan o, nye waabela. Be dii ndjan é, ne mot diig o.

¹¹ «Ye be náá, dhiiti mot pak'en é seeg mon o, mon é waab su o, nye ne ghwyil edje mon nyo é di tak é?

¹² Ye kabe náá, mon waab é eke o, nye é ne ghwyil edje nye baalɔl é di tak é? Ye aanakwaasael.

¹³ Kwyii biyo, bembee e bot bi di e, bi ne gu edje embée esonok ne bon bin, gwyasa ne Seeg'en di to gwoo o, nye waadje Sisim na Dee ne mot aawaab o.»

Yezu eezebɔɔza dum ne tep nye natilaa gwyes e

¹⁴ Dhiiti dwoo, Yezu nadi eso mbee sisim nanεεg dhiiti mot bubu e. Wo gwaa mbee sisim zokawyis to mot'enok, bubu mot'enok moo tin é lii. Tin, edhuu e bot e nadi tin o moo tin é djoka.

¹⁵ E di'enek, bot e nadi tin o moo tin é ke pak'oo náá: «Ye é Belzebul, kukuma embee esisim, e di edje kɔkɔ yak mbi mebwalaa me nye di eso embee esisim ne ye é!»

16 Bedhiiti nadi ekwyel elóo ε nyε pε eko, da é bwood nyε pε kyε. Bε é booleε nε nε náá: «Sa bis dhiiti etsenja mebwala di elyaal náá, Zεeb é nadhis wó ε!»

17 Tin, Yezu nabe é, eegu egeka e elyem bɔɔ. Nyε é booke nε nɔɔ náá: «Eyon ε di náá, mesa me bot ε tak εwaya pak'ɔɔ ε, eyon ε tak aanákwaadi. Bɔn bil wat tak ε waagonel pak'ɔɔ.

18 Yε bε náá, Satan é di etwak nyel'ε nyε met ɔɔ, eyon ε lε aapyet dáa? Etεε náá, bi ke é náá, me twak embee esisim ε nε ghwyil ε Belzebul dje me ε.

19 Yε bε náá, me sɔ embee esisim é nε ghwyil ε Belzebul ɔɔ, haa yebɔ bot aasɔ embee esisim nε yaa ghwyil? Etεp tak é di náá, bot bin bɔɔ bεmet aadi é bεtetεp bin.

20 Nε tsεtse me lεε bin ε náá: Ye é nε ghwyil ε Zεeb ε me di esɔ embee esisim. Ye kwyel elyaal é náá: Eyon ε Zεeb eezekum tɔ len.

21 «Yε bε náá, mot ghwyil di nε mekoo me dεeb ε di ebaal ndjan'ε ɔɔ, esa bε é waabaalaa enyɔpe.

22 Yε kabε náá, dhiiti mot di dhaa nyε nε ghwyil eezyε ɔɔ, nyε kwak εbhaad nyε si ɔ, bhii tak, nyε kadεk nyε mekoo me dεeb me nyε nadi ebe-bwaal ε. Tin, nyε kanɔɔ esa bε djas é kaa.

23 «Mot ε di àadi bis nε nε ɔ, nyε é mot mebhuka mam. Zenɔɔ náá, mot di àákwyee me nε εsεεg ɔ, waaz ε waaz'aak.»

Ébula ε mbee sisim

24 «É sok mbee sisim di ewyis tɔ nyel mot ε, ye dyeebawyis é tó, tɔ di di ààbε nε medii ɔ, é kesaa di ye aakεwala ɔ. Ye di ààbela di ɔɔ, ye kake é náá: “Mε pookosik pε ndjan'am, ndjaa me nawyis tɔ tak ε.”

25 Tin, sika ye aakasik ε, ye kabela ndjaa tak é, toto, waabela, koobela.

26 E di'enek, ye kató, kenɔɔ bɛdhiiti embee esisim etɛn nɛ ebá di edhaa ye nɛ embee mɛsa ɔ. Tin, bɔɔ djas kazɛni é tɔ ndjaa bɛ bela di ɛdisi ɔ. E di'enek, tsik mot'enɔk kazɛpulel dhaa-dhanjak tyee nabɛ sok ε.»

Tɛtɛ ekum

27 Dáa Yezu nadi elii deenek ε, dhiiti moma zokazɛben gwood tɔ ɛdhuu ε bot, nyey nɛ nɛ náá: «Mɛnyɔ nɛ moma nabɛp ɛbum ε lɔ ɔ! Mɛnyɔ nɛ mɛbel mɛ wɔ nadɛɛ!»

28 Tin, Yezu eezɛbɔɔza nɛ nɛ náá: «Mɛnyɔ nɛ nen, bot ε di egwak mɛkpa ε Zɛɛb, da bi é kɛ dáa Zɛɛb di ekwyɛl ε.»

Ngwyeebel dhiiti tɛɲa mɛbwala

29 Dáa mɛdhuu mɛ bot nadi esaala é ngwoob ε Yezu ε, nyɛ moo tin é ke náá: «Bot ε di kɔ bɔs'ak mos'aak àànyɔ bot. Bɛ ɛpewaab dhiiti tɛɲa mɛbwala mɛ Zɛɛb. Bɛ aanàkwaakobee dhiiti wat, ye di ààbɛ yii nabɛ ye é ngoolel-mɛkpa ε Zɛɛb Yonas ɔ.

30 Deenek, tyee wat Yonas nadi tɛɲa é mis mɛ bot ε ghaada Niniv ε, deenek é Sɛɛɲɛlɛ Mɔn Mot aadi tɛɲa ɛtɛp bot ε di kɔ bɔs'ak mos'ak.

31 E dwoo Zɛɛb aazɛpɛɛ bot ε, moma di mɛkoozi kɔ mɛl mɛ di pɛ kyɛ bɔs ε, waatyaa sok bhwoob bot ε mɛlu mak. Tin, nyɛ waakwyɛsal bɛ ndjɛ sɔs, etɛɛ náá, nyɛ naadus pɛ mɛsik mɛ bɔs, ɛtɛp ɛzɛgwak mɛkpa mɛ etson ε Salomɔɲ. Ghuna yii di wak ε eedhaa-dhanjak ye Salomɔɲ.

32 E dwoo Zɛɛb aazɛpɛɛ bot ε, bot ε dɛl ε Niniv waatyaa sok bhwoob bot ε mɛlu mak. Tin, bɛ

waaze kwyesal be ndje sos, etee náá, bot e ghaada Niniv naazeliig elyem baa, bhii be nazegwak melyo e Yonas e. Ghuna yii di wak e dhaa-dhanjak ye Yonas!»

Mis mo e lambi nyel'o

³³ «Mot aanakwaatuub lama, da nye e butal ye si bhwaa. Ye aasaaa deenek. Ye goka ne ekelaa e, pe ko teeg, etee náá, bot djas aadi eni to ndjan o needi to gwe tak.

³⁴ Mis mo e lambi nyel'o. Mis mo e di enyaasok enyape o, gua náá, nyel'o djas e to selele. Ye kabe náá, mis mo aanyaasok o, nyel'o djas e to ghooghom.

³⁵ Deenek e, me di elee wo náá, wo di tson mot etep ebaal eselele di to lo e, e kaab náá, eselele bin ezekeeliiza ghooghom.

³⁶ Ye be náá, nyel'o djas e to selele, aabe ne kyee nyel wat di to ghooghom o, nyel'o djas aadi e, to gwe, daa lambi di edje wo gwe ne mekas me e.»

Yezu eedul eFalizye be ne beghan e mekana me etsi melo

³⁷ Daa Yezu nasilal elii e, dhiiti Falizye zokadjoo nye, nye zede pe ndjan'e. Yezu zokani to ndjaa mot tak, noo nyel, disi ko mesa.

³⁸ Falizye yenok zokadjoka daa nye nabee náá, Yezu nabe aagwyii membo esok ne nye ne de edee e.

³⁹ Tin, Ghen e booke ne Falizye yenok náá: «Beeka daa biyo eFalizye di e: Bi dyeebagwyii e ekon e ebete ne ekon e esaan. Ye kabe to tak o, bi ne bu ekwosak e djii ne embee elyem dhaa nyel.

⁴⁰ Bi aatselal, ye tok Zeb mot nasa pe kel o naba aasa to tak e?

⁴¹ Djeka bedjel ε bot esa eedi tɔ ebɛɛɛ ε, nɛ yii di tɔ esaan bin ε. Deenek ε esonok djas aadi, dɛɛ ɛtɛp'en.

⁴² «Haa kpaa-ghon nɛ biyɔ, eFalizye etɛɛ nάά, bi ɛpetuud Zɛɛb nɛ endiyal kam e nadjeebe nɛ aghomkɔtɔ, zɛnɔɔ mɛwɛyee mɛ di ebɛaa tɔ bok ε. Da bi ε kapeeba ε epiki nɛ kɛɛɛl ε Zɛɛb. Ghuna, sa bɛ di egoka nɛ ɛwa lyem ε tak ε, yɛ ε yenek, ɔ̀ɔpɛeba bɛdhiiti kalik ε.

⁴³ «Haa kpaa-ghon nɛ biyɔ, eFalizye etɛɛ nάά, bi kɛɛɛl ε, mɛbhóó mɛ pɛ sok ɛtɛp ɛtɛla mɛnyel tɔ mendjaa mɛ mendjaala mɛ eYuda, bi nɛ kɛɛɛl bi swosaa nɛ duu kɔ mɛbɛɛɛ.

⁴⁴ Haa kpaa-ghon nɛ biyɔ, etɛɛ nάά, bi ε dάa mɛvit mɛ di yɛ moo ɔ̀ɔkanyen ε. Mɛvit mɛ bot di kɛ kɔ tak ɔ̀ɔgu ε!»

⁴⁵ Mot ngɔt tɔ bɛlyoel ε etsi e Zɛɛb zokazɛdji nyɛ nάά: «Lyɔel, dάa wɔ di elii deenek'enek, wɔ lee tin ε dɔɔ nɛ bisɔ!»

⁴⁶ Yezu eezɛbɔɔza nɛ nɔɔ nάά: «Kpaa-ghon dɔɔ nɛ biyɔ, bɛlyoel ε etsi e Zɛɛb! Bi ɛpekɛl kɔ ekon e bot mɛkɔm mɛ na dil-dil, da bi kadi ε, ɔ̀ɔkosɛɛb-sɛɛbak djin wat ɛtɛp ɛkɛɛyee bɛ ε ɛbɛp dil-dil mɛkɔm mɛ tak.

⁴⁷ Haa kpaa-ghon nɛ nen, etɛɛ nάά, bi ɛpesum mɛvit mɛ bɛngooel ε mɛkpa ε Zɛɛb, bɛngooel ε mɛkpa ε Zɛɛb bɛbhaab bin nagɔ ε!

⁴⁸ Deenek, bi kɛɛɛl ɛlyaal ε nάά, bi eemyaal embee esɛɛɛ bɛbhaab bin, etɛɛ nάά, bɛ naagɔ bɛngooel ε mɛkpa ε Zɛɛb, yɛ ε biyɔ ε kadi esum mɛvit mɔɔ!

⁴⁹ Kɔ ɛsu ε tak ε Zɛɛb tɔ etson bɛ, nake nάά: “Mɛ waakyeed bɛ bɛngooel ε mɛkpa ε Zɛɛb nɛ bot ε lwoma, bɛ waagɔ bɛdhiiti, da bɛ ε wa bɛdhiiti tɔ tsik mezuk.”

⁵⁰ Kana ekus ε bɔs, bεte ne bengooel ε mekpa ε Zeεb naadyeebagóaa, éteε tak é di náá, eseseε binek djas kwyε kɔ elo e kɔkɔ bot ε di kɔ bɔs dwoo mos'ak.

⁵¹ Kana dwoo esyee ε Abhel, keyaka ne ye Zakali, mot nagóaa pak mesa ebuwa, bε di eka ebuwa ɔ, ne Di na Deε ε Gheη, ne tseεtse me lee bin é náá, eseseε binek djas kwyε kɔ elo e kɔkɔ bot ε di kɔ bɔs dwoo mos'ak.

⁵² «Haa kpaa-ghon ne nen, biyɔ, belyoel ε etsi e Zeεb, etεε náá, bi eezediyal ze di etɔ ne bot pε daa Zeεb ε. Biyɔ bemet bi aapake é ze tak. Tin, bi epela bot ε di ekwyel εdhaa é ze tak ɔ, ze.»

⁵³ Dáa Yezu nawyis tɔ ndjan'enek ε, eFalizye ne beghan ε mekana me etsi moo tin ne mebhuκ tɔ elyem. Bhii tak bε moo tin edji nye bεte ne ekiya dum ne bεte ne etεp.

⁵⁴ E di'enek, bε nadi elóo nye pε eko, da bwood nye pε kyε éteε bε neebela mekpa me bε aapit nye ne ye ε.

12

Yezu epedul bot ε medjhaaz pε eko, bhimis pε si melɔ

¹ E gheη tak, bot eezεseεga é di tak. Mεbu me bot sa náá, bedhiiti nyalel pak'ɔɔ. Tin, Yezu eezεke ne bedjekel bε náá: «Esok ne esonok djas, ye goka é náá, bi kyee leviid eFalizye. Ye kwyel elyaal é, mefulu mɔɔ yii medjhaaz pε eko bhimis pε si.

² Eseseε djas di esyela ε, ye waawyis é gwyε, etεp ee nadi tɔ sɔ ε, ye waaguaa ne bot djas.

³ Etεp tak é di náá, etεp djas bi aadi elii tɔ ghooghom ε, ye aadi egék é gwyε mwos dwoo. Sa bi

nanyiinɛlaa tɔ ɛlɔ pɛ tɔ dɛɛn ɛ, yɛ aadi ɛ moo tuuda kɔ emii e mendjaa.»

Sa mot di egoka nɛ ɛkyee ɛ

⁴ «Biɔ bɛsɔ bam, mɛ lɛɛ bin ɛ náá, nákaabka bot ɛ di egó tsik epuud ɔ, bhii tak, bɛ kadi ɛ ààsa dhiiti sonok.

⁵ Mɛ paakolyaal bin sa bot di egoka nɛ ɛkaab dhaa nyel ɛ. Bi goka nɛ kaab ɛ Zɛɛb, mot di náá, bhis ɛsyee, nyɛ ɛ nɛ ghwyil ɛkɛmwas bin tɔ du na kɔm-kɔm ɔ. Nɛ tsɛɛtsɛ, mɛ lɛɛ bin ɛ náá, yɛ ɛ nyey ɛ bi di egoka nɛ ɛkaab!

⁶ Bot djas nɛ gu náá, bɔɔ enen etɛn dyee-babɔmsaa ɛ nɛ epata ebá. Kabela náá, yɛ tok nɛ sa Zɛɛb aadjisa ɛ mis mɛ.

⁷ Deenek, bhoo elo bin ɛ elanɔ, sa mot ààdi nɛ bwoo, etɛɛ náá, ɛ mis ɛ Zɛɛb, bi ɛ nɛ boo metanɔ, dhaa enen!»

ɛlyaal ɛ bot ɛzɛ di Yezu, nɛghu ɛbyen ɛ nyɛ

⁸ «Mɛ lɛɛ bin ɛ náá, mot aamyam popoopwon ɛ mis mɛ bot djas náá, nyɛ ɛ djekel'am ɔ, Sɛɛɛɛlɛ Mɔn Mot pɛ ɛ waamyam nyɛ ɛ mis mɛ efofop ɛ Zɛɛb.

⁹ Tin, Mot ɛ kɛla popoopwon ɛ mis mɛ bot djas náá, nyɛ tok djekel'am ɔ, mam pɛ, mɛ waakɛla nyɛ ɛ mis mɛ efofop ɛ Zɛɛb.

¹⁰ Yɛ bɛ náá, dhiiti mot eelɔo mbee ɛkpa nɛ Sɛɛɛɛlɛ Mɔn Mot ɔ, mot tak ɛ nɛ ghwyil ɛbela ɛpelak. Yɛ kabɛ náá, mot eebyasal Sisim na Dɛɛ ɔ, yenɔk aanàkwaabɛla ɛpelak.

¹¹ «É sok bɛ aatɔ nɛ nen sok bhwoob bɛtɛtɛp, tɔ mendjaa mɛ mendjaala mɛ eYuda nɛ pɛ daa ekukuma nɛ bɛmɛkoozi ɛ, sa mot ààbɛm ba dum nɛ dáa bi aatanɔ nɛ mɛkpa mɛ bi aalɔo ɛ.

12 Etεε náá, é di'enek wat Sisim na Dεε waalyo bin dáa bi di egoka ne etanjá ε.»

Kana kum mot di ààbe ne lyem ε

13 Mot ngət tɔ ɛdhuu ε bot ε nadi tin ɔ zokazeke ne Yezu náá: «Lyoe! Lεεa ne mən nyaag'am náá, bis kaa esa ee seeg'es nalik ε.»

14 Yezu eezεbɔɔza ne ne náá: «Mɔɔ sɔ'am, εze neεg me tetεp dum ne etεp bin, dɔɔ ne étεp εkaa esa ee seeg'en nalik bin ne ye ε?»

15 Bhii tak nyε eezεke ne nɔɔ náá: «Bi é kobaka ne dɔɔ mɛvu, etεε náá, tsik mot tok étεp mɛvu. Ye nakoozobe náá, nyε é kum mot.»

16 Tin, nyε é boozelee be kana yak: «Dhiiti kum mot nadi é ne mɛdhik me nadi sa náá, nyε gó bhek εbuεpe ε.

17 Nyε moo tin é siiza. Nyey náá: “Me sa dáa etεε náá, me tok ne beε ne e di étεp me neekwom edee me gó tɔ pyeeb'am ε?”

18 Bhii tak nyε eezεke náá: “Beeá dáa me aasa ε: me waawaaz etaa bam, da me é lóo be na bɔk-bɔk. Tin, da me é wa edee bam ne mɛvu mam djas.”

19 Bhii tak me ka ke ne nyel'am ε náá: “Mɔɔ sɔam, e di deenek, wɔ moo é ne mɛvu εbuεpe, yii aadjala étεp membu εbuεpe ε. Wɔ é ne ghwyil εka wala. Dea edee ne mɛdii. Dia tɔ me myaala.”

20 Tin, Zεeb zokazeke ne ne: “Wɔy mot di ààbe ne lyem'aak! E pum'ak mos me εpenɔ tsikɔ. Deenek, eseseε ee wɔ kwom ε, εze aabe ye?”»

21 Yezu eebaazeke náá: «Ye aadi é, deenek dum ne bot ε di saa mɛvu me mɛnyel mɔɔ ɛmet. Da é mis me Zεeb be é kadi ε, ààbe bekuma ε bot.»

Edum ε koη ne Zεeb

²² Yezu zeke bhii tak ne bedjekel náá: «Étep tak é me di ke náá: Nàbemka ba étep edee bi di ne gwyes tak étep tsiken ε, ne étep eduuba ekaad ee bi di egoka ne ebət ε.

²³ Eteε náá, tsik eedhaa edee ne menyok. Nyel eedhaa ekaad ne boo metan.

²⁴ Beeka enen ee di djóoaa kɔlbo enek: Be ààbe epyeeb, ààbók edee ee di wum tɔ epyeeb ε. Be tok ne edi ekwom edee tɔ bhwaa ne kɔ etaa. Dhi tin, Zεεb é dee be! Biyɔ, bi dhaa enen ne boo metan.

²⁵ Eze pak'en di ne ghwyil ebil ba melu kɔ melu me tsik'e ne esiiza be?

²⁶ «Ye be náá, bi tok ne ghwyil ekwak esa ba sa dem ɔ, étep yé bi di bem ba kɔ esu ε yii ka likenek?

²⁷ Pookogwyákeka dáa mezem di wyee tɔ medhik ε: Be ààsa mesa. Be ààlat ekaad. Tin, ye goka é, me lee bin náá, ye nakoobe Salomɔn ne bεte ne duu, nye nabe é ààbe ne mbee kaad nanyɔ dhaa wat tɔ kɔkɔ mezem menek.

²⁸ Kwyii Zεεb di e bet eka e medhik, da djemen ye é nɔɔaa, dikaa tɔ du, gwyaaasa ne biyɔ! Zεεb tok ne ghwyil esa deenek dum ne nen e? Dáa bi di náá, bi tok ne boo emyaal ne ne ε!

²⁹ Nà dhekeka menyel min étep esesaa edee ne medii me bi aade ε.

³⁰ Ye é bot ε bɔs'ak ε di peε Zεεb ɔ, di ne egwyes e esaala binek. Guka náá, Seeg'en ne gu egwyes bin.

³¹ Pookosaaka esok Eyon ε Zεεb. Bhii tak, nye waadjε bin yii ka lik ε.»

Ekwom ε ekum tɔ gwoo

³² «Mɔɔ esaa é Zεεb, nàbem ba, etεε náá, Seeg'en kwyeł é, nye needjε bin Eyon ε le.

³³ Bɔmsaka ekum bin. Sa bi aabela ε, bi kaakan é nε bɛdʒel ε bot. Saka mengwyε mε epata ee di yε ààgwyε é. Kwomka ekum bin pε dǎa Zεεb. Penek, bot ε djii aanákwaani, kɛdjii yε. Bεsεs aanákwaagɔɔ yε.

³⁴ Bi sa deenek etεε náá, e di mot di kwom esa bε ε, lyemε di é tak.»

Kana éteƿ mɛnyan mε mis

³⁵ «Dika nε ekaad e mεsa min, nε elambi etuuba.

³⁶ Dika dǎa bot ε mεsa di bwood kukuma yɔbɔ ɔ, etεε náá, esok nyε aabula kɛbeeb moma ε, nyε diig εbε ε ndjan ɔ, bε neeleedii.

³⁷ Mɛnyɔ nε bot ε mεsa aadi é nyan ε mis ɔ, é ghɛɲ kukuma yɔbɔ aatuula ε. Tseetse nε tseetse, mε lεε bin ε náá: kukuma nyε emet é waabɔt ekaad e mεsa mε, da bhii tak nyε é dil bε kɔ mesa, da nyε é dje bε edee.

³⁸ Nyε é bula kuku εgha ε pum ɔ, nεghu kabε pum eezeliig ɔ, da nyε é bela bε e mis membek ɔ, mɛnyɔ nε nɔɔ εbuεpe!

³⁹ «Gwakeka sa mε di lεε ε: Yε bε náá, nakuma ndjan ɛpedi é di é gu εwala ε pum mot djii aazyε, zɛdjii tɔ ndjan'ε ɔ, pe nyε aanákwaabet nyε, nyε zɛni tɔ ndjan'ε.

⁴⁰ Biyɔ pe nyanka mis, etεε náá, Sεɛɲɛlε Mɔn Mot aatuula e εwala bi aadi àábwood nyε é.»

Mot-mεsa di sosoob ɔ

⁴¹ Tin, Pyεed eezɛdji nyε náá: «Ghɛɲ, wɔ lεε kana yak é, éteƿ bisɔ bε emet “ohoo” éteƿ bot djas?»

⁴² Wɔ gwaa Ghɛɲ zεbɔɔza nε nε náá: «Nwyak mot-mεsa di sosoob nε etson ee? Beea kukuma ngɔt zokazεlεε mot-mεsa mε náá, nyε baal ndjan'ε. Bhii

tak, da nye é djε bedhiiti bot ε mesa yɔbɔ edee e tεtε ewala.

⁴³ Menyɔ nε mot-mesa menɔk, kukuma ye é bula zεbela nye, nyεy é sa mesa mε tak ɔ.

⁴⁴ Tsεetse nε tsεetse, mε lεε bin ε, náá: Kukuma ε waadjε mot-mesa menɔk esa bε djas, nyε baal.

⁴⁵ Mot-mesa menɔk ε ka ke náá: “Kukuma aanákwaaleebula.” Bhii tak nye moo duma bɔtom nε boa ε di sa mesa tin ɔ nε mεbin e menyel. Di nye di dε edee nε kuka yε menyok.

⁴⁶ Tin, kukuma yε aabula é, e dwoɔ nε ewala mot-mesa menɔk aadi pel náá, nyε aanákwaazyε dwoɔ tak ε. Nyε waasɔ mot-mesa menɔk, da nye é lyaal nyε kyet dáa bot ε di ààdum kon nε Zεεb ɔ.

⁴⁷ «Mot-mesa mε di gu sa lyem kukuma yε di kwyel ɔ, da nye é kadi é, ààsa ɔ, nyε waabiaa nε ghwyεs εbuεpe.

⁴⁸ Ye kabε náá, mot di ààgu εkwosak ε kukuma yε di sa esonok binek ɔ, yε mεbin aadi é, ba bim eghwyεs. Mot ε djεaa bεtε nε esa ɔ, pε dáa mot tak yε aabaawaabaa é εbuεpe; pε dáa mot bε aakwom daa lε εbuεpe ɔ, pε daa lε, bε aabaazowaab ε εbuεpe kεdhaa dhanjaa bim bε nakwom ε.»

Yezu, mεbεka mε bot

⁴⁹ «Mε nazyε, zεtuub du kɔ bɔs. Mε kwyel é náá, pe du tak kaa di moo tuuba!

⁵⁰ Ye goka é náá, mε duwa kɔkɔ mbi εduwa Zεεb sis. Mε εpebwood εduwa Zεεb tak nε lyem pε εko, lyem'am é pε εko kεkum dwoɔ εduwa Zεεb elenek aazyε é.

⁵¹ «Bi gek é náá, mε nazyε kɔ bɔs é, étεp egwyem nε egwakel tɔ bot e? Aàbε! Mε lεε bin ε náá: mε nazyε, zεbεk nε wa εghuub pak bot.

52 Kana dwoo pan mos'ak, bot eten di tɔ mɛbyel mɛ wat ɔ, waabɛka. Bot elɛl waapek bot ɛbá. Bot ɛbá waawaya nɛ bak bɛlɛl.

53 Sɛɛg ɛ waabhina mɔn'ɛ; mɔn bhina sɛɛg. Nyɛɛg bhina mɔn'ɛ mɔɔ moma; mɔn mɔɔ moma bhina nyɛɛg. Bhɛɛbel moma bhina nakɔla; nakɔla bhina bhɛɛbel moma.»

Egu ɛlan ɛ endem tɔ gwoo

54 Yezu nadi baake nɛ mɛdhuu mɛ bot náá: «Esok bi di baabee eguud é kɛghɛɛ pɛ ɛbil ɛ dwoo ɛ, e di tak wat, bi dyeebake ɛ náá: “Bhi ɛ waanee.” Ye é waabataswaala ɛ nee.

55 Yɛ ka bɛ, esok bi bee pup ɛpeke ghɛɛ pɛ kyɛ bɔs ɛ, bi dyeebake ɛ náá: “Gwyɛs ɛ waakas mos ɛbuɛpe.” Yɛ aabataswaala deenek.

56 Bot ɛ mɛdjhaaz pɛ ɛko, bhimis pɛ si, bi é nɛ ghwyil ɛsiiza ɛnyɔɛpe endem di kɔ bɔs ɛ, nɛ ekyee e bɔs nɛ gwoo. Ha, ɛtɛp yé bi di ààgu sa ɛwala mena dik'ak, di ekwyɛl ɛlɛɛ ɛ?»

Egwakel bi nɛ mɔɔ nyooɔ

57 «Étɛp yé biyɔ bɛ ɛmet di ààgu ɛpɛɛ náá: “Yak é mbɛɛ sonok”?

58 Yɛ bɛ náá, wɔ ɛpeke tanal bi nɛ mot ɔ, bi nɛ mot tak é di ɛdjaad ze wat ɔ, ɛtɛp ɛtɔ pɛ baake pɛɛ bin ɔ, sa mɛghaaz bi gwakel e di bi dinaa e ze'enek ɛsok. Deenek wɔ waalu náá, mot bi nɛ nɛ di nɛ tɛp ɔ nàdul wɔ sok bhwoob bɛtɛtɛp. Bhii tak bɛtɛtɛp ɛɛzɛdjɛ wɔ e mɛmbɔ mɛ esodja, da wɔ é metaa e mbok.

59 Mɛ lɛɛ wɔ náá, wɔ aanàkwaawysis tin, ààtuud sa mot wɔ nabe ɛ, dɔɔ nɛ bɛna-tseetsa.»

13

Pak eliig e elyem ne esyee: Sɛka

¹ Eghɛɲ tak, bɛdhiiti bot zokazyɛ, zɛlɛɛ Yezu dɛa mɛkoozi Pilat nagó bot e Ghalile esok bɛ nadi djɛ Zɛɛb ebuwa e bɛtit ɛ.

² Yezu é boobɔɔza nɛ nɔɔ náá: «Bi gek bilak é náá, bot e Ghalile binɔk góaa deenek é, etɛɛ náá, bɛ nadi é bot e mesyem, dhaa bot e Ghalile djas e? Aàbɛ!

³ Betka, mɛ lɛɛ bin náá: Bi e di ààliig elyem ɔ, biyɔ djas pe e waagwyɛ dɛa bot binɔk.

⁴ Tin, bot kam nɛ etɛn nɛ bɛlɛl vyɛɛgvɛɛg ndjaa Silowe nagó, esok ye nabik e, bi ke bilak e náá: Bɛ nadi egu ɛsuk e tɛp dhaa bot e Yeluzalɛm e? Aàbɛ!

⁵ Betka, mɛ lɛɛ bin náá: Bi e di ààliig elyem ɔ, biyɔ djas pe e waagwyɛ dɛa bot binɔk.»

Kana le fiigh di ààwum e

⁶ Bhii tak Yezu eezɛlii nɛ nɔɔ tɔ kana náá: «Mot ngɔt nadi é, nɛ le fiigh tɔ pyeeb vin yɛ, nyɛ zokazɛsaa ɛbók e bhum, nyɛ kadi é, ààbɛla sonok.

⁷ Nyɛ eezɛke nɛ mot di baal pyeeb vin tak ɔ: “Beeɛ, e moo mos é, membu melɛl mɛ di zyɛ, zɛsaa ɛbók e bhum le fiigh'ak. Mɛ ààbɛla. Tsaala yɛ, etɛɛ náá, yɛ ààgoka nɛ ɛnɔɔ yenek boo di tin gwyɛs.”

⁸ Tin, mot di baal pyeeb vin tak e zɛbɔɔza nɛ nɛ náá: “Ghɛɲ, pookobaabet nyɛ mbu yak. Mɛ waapu guk e mengwoob. Bhii tak da mɛ é wa eka nɛ ezeɛza, ye needjɛ nyɛ ghwyil ɛsam.

⁹ Deenek ye é nɛ ghwyil ɛwum e mbu di zyɛ yenek. Nyɛ di, ààka wum ɔ, da wɔ é ka tsaal yɛ.”»

Yezu eetsik dhiiti moma na djam é dwoo saba

¹⁰ Dhiiti dwoo saba, Yezu nadi lyo bot mɛkpa e Zɛɛb tɔ ndjaa mendjaala mɛ eYuda.

¹¹ Dhiiti mbel moma nadi é, tɔ ndjaa tak. Kana membu kam nɛ etɛn nɛ elɛl yɛ nabɛ é dhiiti mbee sisim naazenyak nyɛ konɲ. Nyɛ nabɛ é ààbɛ nɛ ghwyil ɛsek ɛ konɛ.

¹² Dáa Yezu nabee moma tak ɛ, nyɛ eezɛdjoo nyɛ. Bhii tak nyɛ eezɛke nɛ nɛ náá: «Wɔ é pɛkel tɔ ɛbé ɛ lɔ.»

¹³ Nyɛ eezɛkel membo kɔ lɛ, e di tak wat kon eezɛsekel nyɛ. Moma tak moo tin é duwal Zɛɛb.

¹⁴ Tin, yɛ nabɛ é kukuma ndjaa mendjaala mɛ eYuda naadyeebakpaa lyem dum nɛ dáa Yezu nat-sik mot dwoo saba ɛ. Kukuma tak é booke nɛ ɛdhuu ɛ bot náá: «Bot é nɛ mɛlu mɛtɛn nɛ wat bot di sa mɛsa ɛ. Dhaaka zɛtsikaa é, e mɛlu menek, ààkabe dwoo saba.»

¹⁵ Ghɛɲ zokazɛboɔza nɛ nɛ náá: «Bi é bot ɛ mɛdjhaaz pɛ ɛko, bhimis pɛ si. Dwoo saba mot nɛ mot aadi etii ngɔmbɛ nɛghu an yɛ éteɖ ɛkedje bɛ edee nɛ mɛdii, etsal é?

¹⁶ Moma yak é ngɔt tɔ bɛdha ɛ Abalaam. Tin, kabɛla náá, Satan naazelookɔl nyɛ. Nyɛ moo mos é nɛ membu kam nɛ etɛn nɛ elɛl (18). Yɛ ààgoka náá, nyɛ tsikaa e dwoo saba?»

¹⁷ Boɔza Yezu nabɔɔza deenek ɛ, yɛ nasa mot ɛ nadi bhina nyɛ ɔ, boo sen. Yɛ kabɛ mɛdhuu mɛ bot djas nadi tinaak ɔ, boɔ bɛ naadyeebamyaala nɛ esesɛɛ e duu djas nasɛɛ tin ɛ.

Kana mɔɔ bhek di eedjooaa «mutaad» ɛ

¹⁸ Yezu eebaazɛke náá: «Eyonɲ ɛ Zɛɛb ko kɔa nɛ yak mbi sa? Mɛ goka nɛ ɛgek yɛ nɛ yaa sonok?

¹⁹ Eyonɲ ɛ Zɛɛb é dáa bhek na sike-sike di ee djooaa mutaad ɛ. E sok mot di nɔɔ yɛ kɛbɛ yɛ tɔ bok ɛ, tin,

bhek εpekwyil, wyee zye boo le, enen lóo mək mǝ kǝ elεε e tak.»

Kana met di waaa tǝ etsim e mapa ε

²⁰ Yezu zokabaazeke ne nǝǝ náá: «Me koogek bin Eyon ε Zεeb ne yak sonok?

²¹ Eyon ε Zεeb nǝηel é ne met moma di wa tǝ boo εdham ε tsim nye di pul étεp nye neesa mapa ne ye. Ba εwala bhii tak, tsim'enek djas aadi é, eezeghamta.»

Εβε ε ndjaa na maad-maad

²² Yezu nadi é dhaa eghaada ne kǝ mεl é lyo bot mekpa ε Zεeb, nye eetǝ pe Yeluzalem.

²³ Dhiiti mot eezεdji nye náá: «Gheη, Zεeb aazo tsik é ba bim bot ee?» Yezu zεbǝza náá:

²⁴ «Lyelka ghwyil étεp bi neeni tǝ εβε ε ndjaa na maad-maad, etεε náá, me lee bin é tseetse náá, bot εbuεpe ε waagek eni penek, be aanǝkwaakwak eni.

²⁵ Esok kukuma ndjaa aawyel ε, nye waakǝl εβε ε ndjaa ne engon. Tin, biyǝ, bi ε waalik pe kel. Bhii tak, bi ε waazuk e diig εβε ε ndjaa, é ke náá: “Gheη! Diia bis ndjaa!” Nye ka bǝza ne nen ε náá: “Me àǝgu, pe bi dus ε!”

²⁶ Deenek bi aaka bǝza ne ne náá: “Mena naadeka edee ne medii e di wat. Wǝ nadi lyo mekpa ε Zεeb e egba e ghaada yis.”

²⁷ Nye aabaazoke ne nǝǝ náá: “Me àǝgu pe bi dus ε. Duska e mis mam, biyǝ djas, bot ε di sa embee esa ǝ.”

²⁸ Ye é deenek ε bi aadje megwye, ne ekwaal ε metsok, etεε náá, bi ε waabee Abalaam, Izak, Zakǝb, zenǝ bεngooel ε mekpa ε Zεeb penek tǝ Eyon ε Zεeb. Ye kabε biyǝ ǝ, bi aadi é mwasaa pe kel.

29 Bot ε waadus pe εdjem ε dwoo ne pe εbil ε dwoo, bedhiiti dus pe kyε bɔs ne εko ε bɔs. Be waazedisidi kɔ mesa wat tɔ Ɔyon ε Zεeb.

30 Tin, guka náá, beε ne bot ε di mos pe lɔɔg εbhis ɔ, be aaswaala bot ε lɔɔg εsok, bot ε di mos e lɔɔg εsok ɔ be aakaswaala bot εbhis.»

Yezu ne Yeluzalem

31 Edi tak wat, bedhiiti eFalizye eezεzye, zelee nye náá: «Dusa kɔ dɛl ε les. Tɔa pe kyee sis, etεε náá, mekoozi Elood εpesaa nye neezuk wɔ.»

32 Yezu ezeεbɔɔza ne nɔɔ náá: «Tɔka, kelee bebhek binɔk náá: “Me εpesɔ mɛlyeeb, me εpetsik membel dwoo mos ne djɛmɛn. Beεgel é me aasilal mesa mam.”

33 Ye goka é náá, me kemos, djɛmɛn ne beεgel, etεε náá, ye àànyɔ náá, ngoolel-mɛkpa ε Zεeb gwyε etsetape ne ghaada Yeluzalem.

34 «Yeluzalem! Yeluzalem! Wɔy mot di gó bengooel ε mɛkpa ε Zεeb ɔ, wɔy mot di gó bot ε Zεeb di dhis wɔ bak, ne mɛkok ɔ. E sok edhen me di kwyel εεεg bot ε di kɔ dɛl ε lɔ dɔa nabwa-kuu di sεεg bɔɔ be si mebhap me ε, biyɔ ààkwyel!

35 Deenek, gua náá, ndjan'en ε waalik wum! Ne tsetse, me lee bin ε náá: Bi aanàkabaabee me, kana dwoo pan mos'ak, keyaka ne dwoo bi aake ε náá: “Zεeb sεε metel me kɔ mot aazyε ne din ε Gheɲ ɔ!”»

14

Yezu eetsik mot εbé é dwoo saba

1 Dhiiti dwoo saba Yezu zokazetɔ pe dɔa dhiiti kukuma eFalizye ngɔt étεp ekede. Bot ε nadi é di tak moo tin «dhuuu» ne mis é nyel ε Yezu.

² Dhiiti mot eezetyaa tetel sok bhwoob'ε, mot tak nabε é, nyε eezebeyal nyel nε εbέ.

³ E di'enek, Yezu zεke nε belyoel ε etsi e Zεεb nε eFalizyε náá: «Etsi bina nedjε mena ze étεp etsik ε bot dwoo saba?»

⁴ Bε moo tin «gwyem», ààbɔɔza. Bhii tak, Yezu eezemet mot εbέ elenɔk, nyε eezetsik nyε, bhii tak, nyε eezeswaal nyε.

⁵ Nyε eezεke nε nɔɔ náá: «Yε bε náá, ngɔt pak'en é nε mɔn'ε, nεghu ngɔmbε ye ges ε tɔ guk ɔ, nyε aanàkwaaleekε wyisal nyε kaab, ye nàkwyii zo di dwoo saba?»

⁶ Bε nabε é, ààbε nε ekpa εbɔɔza nε nε kiya tak.

Yezu epelyo bot e di ee bε di egoka nε edi ε

⁷ Yezu eezεbee dáa bot ε nadjɔɔaa ɔ, nadi esaa é, εdisi kɔ mεbhóó mε di pε sok ε. Deenek nyε é boozεεε kana yak étεp bot djas:

⁸ «Mot ε djɔɔ wɔ e εbyon ε εbá ɔ, sa wɔ ààsuu edi kɔ mεbhóó mε di pε sok ε, e kaab náá: nεghu ye nabε é, bε eedjɔɔ dhiiti dhil mot, dhaa wɔy ɔ.

⁹ E kaab náá, mot djɔɔ biyɔ bεbá ɔ, εzεkεke nε nɔ náá: “Djεa nyε di'ak.” Tin, sen-ε-sen, wɔ moo tin é sik, kesaa ekedisii kɔ boo εbhis.

¹⁰ E nyɔ é náá, wɔ é djɔɔaa e εbyon ɔ, wɔ goka é nε edi é, kɔ boo di pε bhis ε, etεε náá, esok nakuma εbyon aatuula ε, nyε waake nε nɔ náá: “Sɔam, wyela, dha zedisii kɔ boo di pε sok ε.” Deenek ε waabela duu e mis mε bot ε bi nε bε nɔɔ aadi kɔ mesa ɔ.

¹¹ Mot ε di ekwyel εghεε nyel nε εbet ɔɔ, nyε waasilaa, mot ε di esil nyel, nyε é di ààbε nε εbet ɔɔ, nyε waabenaa.»

12 Tin, Yezu eezεke ne mot nadjόo nye ɔ náá: «Wɔ é di edje bot edee é mwos, neghu yii bikoko ɔ, sa wɔ àadjόo bɔɔ besɔ bɔ, bɔn nyoog, bot ε mebyel mɔ, bekuma ε bot bi ne be nɔɔ di di e di wat ɔ, e kaab náá, be εzekedjόo wɔ dhiiti dwoo. Tin, e kaab be εzekεbhulal yii wɔy nanyel εdjόo be sok ε.

13 E nyɔ é, wɔ djόo ebyon ɔ, wɔ goka ne εdjόo é, bedjel ε bot, bena-etiyon, eboka, ne be na edhim.

14 Menyɔ ne nɔ e di'enek, etεε náá, be tok ne ghwyil εbulal wɔ ye ε. Zεεb é waabulal wɔ ye é ghen bot ε epiki aagom tɔ esyee ε.»

Kana boo ebyon

15 Bhis be nazegwak etεp binek djas ε, mot ngɔt pak bot ε nadi é dε be ne Yezu kɔ mesa ɔ zokake náá: «Menyɔ ne mot aade edee tɔ Eyon ε Zεεb ɔ!»

16 Yezu eezεεε nye kana yak: «Dhiiti mot naazεdjόo ebyon. Nye eezεdjόo bot εbuεpe.

17 Esok εwala εdε edee nadjala ε, nye eezεlwom mot-mεsa mε, nye kε εdjόo bot, mot-mεsa eezεke ne nɔɔ náá: “Dha dεka, etεε náá, edee eezebee.”

18 «Tin, é εwala nakoobela étεp dek ε, bot ε nadjόoaa ɔ, moo tin, mot ne mot é dje ye gham εpeebe. Mot εsok eezεke ne mot-mεsa náá: “Mε eebɔm pyeeb na bes. E goka, mε tɔ, kε ebee ye. Pela mε, mɔn nyεεg.”

19 Nwyak mot náá: “Ye nabε é, mε eebɔm engɔmbε kam: Edjas e tεn, ne eswooz e tεn. Mε pookokegwyaala mεghwyil mɔɔ. Pela mε, mɔn nyεεg.”

20 Nwyak tak zεzye ye. Nyey náá: “Mε aloo ne beeb ghɔɔdam. Etεp tak é di náá, mε tok ne ghwyil εtɔ.”

21 Mot mɛsa menɔk eezɛsik pɛ dɔ́a kukuma yɛ, kɛlɛɛ nyɛ dɔ́a bot binɔk djas lɛɛ ɛ. Nakuma ndjan eezɛkpaa lyem ɛlyɛlɛpɛ. Nyɛ ɛ booke nɛ mot-mɛsa mɛ náá: “Lɛla, Tɔ́a kɔ mɛbɛsɛɛ mɛ dɛl nɛ kɔ egba. Tɔ́a, kɛdjóo bɛdjɛl ɛ bot, eboka e bot, bɛ na edjam, nɛ bɛ na edhim. Dha mɛ nɛ nɔɔ wak.”

22 Bhii tak, mot-mɛsa eezɛlɛɛ nɛ kukuma yɛ náá: “Ghɛɲ, sa wɔ lwom náá, mɛ sa ɛ, eezesaɛl. Ka bela ɛ náá, e di dinaa tak tɔ ndjaa.”

23 Tin, kukuma eezɛkɛ nɛ mot-mɛsa mɛ náá: “Tɔ́a egba nɛ egba, nɛ kɔ bɔɔ mɛl pɛ ze epyeeb. Mot nɛ mot wɔ aaboma nɛ nɛ ɔ, besɛla nyɛ, nyɛ zyɛ. Etɛɛ náá, mɛ kwyɛl ɛ, ndjan¹am lwood.”

24 Nɛ tsɛɛtɛ mɛ lɛɛ bin ɛ náá: “Tɔ́ bot djas mɛ nadjóo sok ɔ, e tok nɛ mot aadɛ edee e ɛbyon ɛ lam!”»

Sa mot di egoka nɛ ɛsa, ɛtɛp nyɛ needi djekɛl ɛ Yezu
ɛ

25 Zukamwaa nɛ mot nadi eke lɔɔg wat bɛ nɛ Yezu. Yezu zokazɛliig mis. Bhii tak, nyɛ eezɛkɛ nɛ nɔɔ náá:

26 «Mot ɛ kwyɛl ɛdu mɛ ɔ, yɛ goka ɛ nyɛ byen sɛɛg nɛ nyɛɛg, myɛl nɛ bɔn, bɔn nyɛɛg nɛ bɛkɛl. Nyɛ goka ɛ nɛ ɛbyen-byenaa tsik'ɛ ɛmet. Yɛ di ààdi deenek ɔ, nyɛ aanákwaakwak ɛdi djekɛlam.

27 Mot ɛ di ààbɛp mɛlaaba mɛ, da bhii tak nyɛ ɛ du mɛ ɔ, yɛnɔk tok nɛ ghwyil ɛdi djekɛlam.

28 Mot ngɔt pak'en ɛ kwyɛl ɛsum boo ndjaa na vyɛɛgvyyɛg ɔ, yɛ goka ɛ nyɛ pookodisi, ɛtɛp ɛval nɛghu mɛtan mɛ nyɛ goka nɛ ɛwyisal ɛtɛp ɛsum ndjaa tak ɛ, waadjala.

29 E kaab náá, nyɛ ɛ zɛkɛkan mɛsa, da nyɛ ɛ sik e ze. Tin, ɛkpaa-gon ɛ bee deenek ɔ, bɛ ɛzɛkɛgɔ nyɛ.

³⁰ Bot neekeke náá: “Mot tak eekan εsum ndjaa εnyɔεpe. Nye ààpakakwak εsilal zumal.”

³¹ «Ye é tyee wat ne dhiiti mekoozi di kwyel εke lumela deeb, be ne nwyak dhiiti mekoozi ɔ. Ye goka é nye pookodisi sok éteɸ εdjek neghu, ne esodja bemil kam, nye é ne ghwyil ekwak elumela deeb ne so mot zeke ghee ne esodja bemil mekam-membá ɔ.

³² Ye be náá, nye aanákwaakwak ɔ, nye waakyeed engoola-ngoola ne mebhadal pe daa so mekoozi, nye dinaa etsetape éteɸ εdji nye sa nye di kwyel ε, etee náá, egwyem needi pak'ɔɔ ε.»

³³ Deenek bhii tak Yezu eebaazebil ekpa náá: «E tok ne mot ngɔt pak'en aakwak εdi djekelam, nye di ààbet esa be djas ɔ.»

Mεsɔn me di àdval sonok ε

³⁴ «Mεsɔn é mbee sonok. Ye be náá, mesɔn moo é, ààkagwom ɔ, ye saa dáa éteɸ ye neebaabula egwomepe?

³⁵ Ye aanáka baako val sonok, ye nàkwyii be éteɸ εkoobal ε bɔs neghu éteɸ emwas kɔ ekwyiid. Yenek kagoka é ne emwasaa-mwasak pe kel. Gwakeka neghu bi é ne melo me egwak ɔ.»

15

Kana bhata nawo ɔ, da nye é baazebela ɔ

¹ Benɔjel ε epata e lapo, be ne bot ε mbee dék naazesesεga e bhaaz ε Yezu éteɸ eze gwak nye.

² EFalizye be ne begħan ε mekana me etsi ε Zeeb nadi é so-sɔs pak'ɔɔ. Bɔɔ náá: «Ezaaba ε mot'ak é dɔɔ ne embee bot. Nye epede be ne be nɔɔ e di wat.»

³ Deenek, Yezu é boolεε be kana yak náá:

⁴ «Dhiiti motom pak'en ε di ne ebhata dhet ɔ, ngɔt ε wo ɔ, nyey kum ebhata ka bet dhiiti ebhata mekam-meten ne ená ne ebhata eten ne ená lik ɔ, to bal, kesaa yii wo ɔ saɲa, kebatabela nye.

⁵ Ye be, nye eebela nye ɔ, nye waamyaala, da nye é ka kel nye é, kɔ mebyak me,

⁶ bula pe del, djoo besɔ ne bɔn nyeeg, zele be náá: “Me eebatabela bhata yam nawo ɔ. Dhaaka mena myaalaka.”

⁷ Ye é tyε wat ne biyɔ pe. Me lee bin náá: Ye waadi ne boo memyaala to gwoo étep mot mesyem ngɔt naliig elyem ɔ, dhaa bot mekam-meten ne ená ne bot eten ne ená epiki, di àabe ne gwyes eliig elyem bɔɔ.»

Kana pata nadiib ε, da é be é baazεbela ye é

⁸ «Neghu, ye be náá, dhiiti moma naadi ne epata kam yii ghwooz na boo metan, ye be náá, wat eediib ɔ, nye waatɔ, ketuub lambi, da nye é kewaabal ndjan'ε, bhii tak da nye é saa tityok-tityok ne lyem wat, batake bela ye.

⁹ Ye be nye eebela ye ɔ, nye waadjoo besɔ boa ne bot ε be ne be nɔɔ di di elet mendjaa wat ɔ náá: “Me eebatabela pata yam nadiib ε, dhaaka zemyaala ne nam sama.”

¹⁰ Ye é tyε wat ne biyɔ pe. Me lee bin náá: Efofop ε Zeεb ε waadi to memyaala étep mot mesyem ngɔt aaliig lyem ɔ.»

Kana mɔɔ motom nawo ɔ, da nye é baazεbela ɔ

¹¹ Ye Yezu ka baazεke náá: «Dhiiti motom nadi é ne bɔɔ bɔtom ébá.

12 Ye é dhyyeb tak kazyε, ke ne seeg náá: “Saag'am, dje me yam ekeε lyak di náá, me waa-boobela é, ne djheed.” E di tak é, seeg'ɔɔ nazεkaa ekum be, pak ɔɔ bebá.

13 Ye zεkpaa ba melu bhii tak, ye é dhyyeb ka zenɔɔ ye kyee náá, ɔmsa ye, nɔɔ epata e tak, tɔ ne ye pe dhiiti dik εtsetape. Penek, wɔ gwaa nye kebɔya tɔ medjemel, zesaab elyak be.

14 Bhis nye nakazesaab esa be djas ε, boo pwom naazetuula pe dik tak. Nye nakadi é, nye moo tɔ edjel.

15 Nye é boozetɔ, kenɔ mesa pe dáa dhiiti mot dik tak. Mot'enak é bookyeed nye kebaal engulu tɔ pyeeb ε.

16 Nye nadi é, ne gwyes εde bhum le kalubye* engulu nadi é dede ε, ye naka saa é, ne nye ààbe ne mot dje nye ye ε.

17 E di'enek, nye moo tin “ziibili” é siiza étep nyel'ε. Nyey náá: “Bot ε di sa mesa pe daa saag'am ɔ, djas ε ɔɔ epede edee kat, dhi mam eegwyε ne za wak.

18 Me paakosik pe daa saag'am, keleε nye náá: Saag'am ee! Me naasa mesyem sok bhwoob ε Zεeb, baasa ne nɔ.

19 Me ààpakabaagoka náá, me djóaaa mɔn'ɔ. Nɔɔɲa me tyee wat dáa bot ε mesa mɔ.”

20 Nye eezesik pe daa seeg.

«Dáa nye nadi, nye dinaa ba εtsetape ne ndjan ε, seeg eezεbee mɔn, nye é boo gek nye ghon. Seeg eezetɔ kaab, kebhoma ne ne, nye eezεbeedal nye.

21 Mɔn eezεke ne seeg náá: “Saag'am, me nasa

* 15:16 kalubye: le dhaa tyee ebha.

mesyem sok bhwoob ε Zεεb, baasa ne nɔ. Mε ààbaagoka náá, mε djóoaa mɔn'ɔ.”

²² Wɔ gwaa sεεg zeke ne bot ε mesa mε náá: “Lelka εzyε mε ne kaad na nyenyɔ-nyɔ. Betka nye ye ε. Sɔmka nye ghwooz e djin. Betka nye mεpapa.

²³ Kε metka mɔɔ ngɔmbε mena nawyel ɔ, da bi é gó nye, mena neesaka εbyon,

²⁴ etεε náá, mɔn'am nadi é, nye eezegwyε; nye eegom. Nye nadi é, nye eewo; nye eebatabelaa.” Mbεε εbyon é booze kan.

²⁵ «Esok tak, mɔn mεgwyak mε nadi é, pε epyeeb. Dáa nye ka bula ε, nye moo kunaa ne ndjan ε, nye ka gwak é dhok ε tap, kul ne ghom, ne mebɔl.

²⁶ Nye eezεdjóo dhiiti kwom, zεdji nye náá: “Yenek é yaa?”

²⁷ Ye é kwomenɔk ka bɔɔza ne ne náá: “Boo-mot, dhyeebɔ eebula. E di tak ε, soog é boogó mɔɔ ngɔmbε mena nawyelka ɔ, etεε náá, mɔn eebula nyel εnyɔpe.”

²⁸ Mɔn mεgwyak é boobela εbuk, nye eezεbyen εni-niaa tɔ ndjaa. Ye é sεεg kawyis kεdjaala ne ne étep nye neeni tɔ ndjaa.

²⁹ Wɔ gwaa mɔn zεbɔɔza ne sεεg náá: “Gwaka, mε moo é ne zukamwaa ne membu mε di sa wɔ mesa tyee kwom ε. Mε ààbyen dhiiti lwomelɔ wat. Wɔ bee ɔ, wɔ dinaa ààpaakodje mε djeak ba mɔɔ ngɔmbε étep mε neesa εbyon, bis ne besɔ bam.

³⁰ Beea, e di mɔn'ɔ nwyak ka bula ɔ, nyey mot naasaab elyak bɔ djas ne boa mεzɔ ɔ, étep'ε, wɔ eebatalwom náá, be gó nye mɔɔ ngɔmbε mena nawyel ɔ.”

³¹ Ye é sεεg ka lεε nye náá: “Mɔn'am ee! Menabel é di melu djas. Mε bee é náá, esa ee mε di ne ye djas

ε, ye έ γο.

³² Mena goka έ νε εσα τετε εbyon, da mena έ myaala, etee náá, dhyeebo nwyak nadi έ, nye eezegwyε; nye eegom. Nye nadi έ, nye eewo ze; mos nye eebelaa.”»

16

Kana ndombε na metselal

¹ Yezu eezεke ne bedjekel be náá: «Dhiiti kum mot nadi έ, ne ndombε. Bot eezεεε kum mot'enok náá, ndombε ye epesaab nye esa.

² Kukuma ye eezεdjoo nye, bhii tak nye eezεke ne ne náá: “Me epedyeebagwak embee menduk dum ne din ε lo. Pokobaηa me dáa wο di baal esa bam ε, etee náá, wο aanakabaadi ndombε yam.”

³ Ndombε eezεke to lyeme met náá: “Me sa dáa, dáa di náá, kukuma yam moo zεδεk ebaalel ε esa be e membο mam'aak. Mam έ di áàbe ne ghwyil mesa me epyeeb bak. Ebeeak ne sa mam sen.

⁴ Me ne gu dáa me aasa έτεp bot neemyaal me to mendjaa moο bhis kukuma yam aadis me e mesa ε.”

⁵ Tin, nye y zokazεdjoo mot ne mot nadi kola kukuma ye sonok ο. Nye eezεke ne mot εsok náá: “Wο ο ne kola kukuma yam edhen?”

⁶ Nye eezεboza náá: “Etondo bemul me bhum oliv dhet.” Ndombε zeke ne mot'enok náá: “Lela εdisi, ba mekana mo, kwyala to tak mekam-meten.”

⁷ Bhis yenok nye eebaake ne nyaa tak náá: “Ha woy, wο έ ne kola kukuma yam edhen?” Mot tak eezεboza náá: “Eghuude mebhisa dhet”. Ndombε zeke ne mot'enok náá: “Lela εdisi, ba mekana mo. Kwyala mekam-meten ne mekam-melεl.”

8 Tin, kukuma zokazɛduwal mbee ndɔmbɛ yenɔk dum nɛ mɛsa mɛ etson nyɛ sa nɛ bot ɛtɛp nyɛ needi àabyenaa bhis nyɛ aasɔaa é mɛsa ɛ. Etɛɛ náá, bot ɛ bɔs'ak nɛ gu ɛkwyɛel pak'ɔɔ dhaa dhanja bot ɛ di kɛ tɔ gwyɛ ɔ.»

9 Yezu eebaazɛbil náá: «Deenek mam lɛɛ bin ɛ náá: Beyaka ɛsɔ nɛ mɛvu mɛ di kɔɔ bot kɔ bɔs'ak ɛ. Etɛɛ náá, e di mɛvu menek aadi náá, ye tokapɛ ɔ, Zɛɛb ɛ waamyaal náá, bi di tɔ ndjan'ɛ di na kɔm-kɔm.

10 Mot di sosoob tɔ esa ee dem ɔ, mot tak ɛ waadi pe sosoob tɔ eboo esa. Mot aadi àadi sosoob tɔ esa ee dem ɔ, nyɛ aanɔkwaadi sosoob tɔ eboo esonok.

11 Yɛ bɛ náá, bi nabɛ ààgu ɛdi sosoob ɔ nɛ dɔ́a bi nadi é be mɛvu mɛ mɛkɔɔ di kɔ bɔs'ak ɔ, ɛzɛ aadi nɛ ɛbwaalel nɛ nen, da bɛ é djɛ bin tɛtɛ mɛvu?

12 Yɛ bɛ náá, bi nabɛ ààgu ɛdi sosoob dum nɛ esa e bɔɔ bɛsɔ bin ɔ, ɛzɛ aadjɛ bin embɛɛ esa ee nazekoobela bin ye é?

13 «E tok nɛ mot-mɛsa ngɔt aasa mɛsa mɛ ekukuma ebá. Deenek nyɛ waabhina ngɔt da nyɛ é kwyɛl nwyak; nɛghu nyɛ waakɛ kwyɛl ɛsa mɛsa mɛ ngɔt, da nyɛ é byen yii nwyak mot. Bi tok nɛ ghwyil ɛsa e di wat mɛsa mɛ Zɛɛb nɛ mɛsa mɛ epata.»

Bɛdhiiti etɛp ee Yezu nadi lii ɛ

14 EFalizyɛ naagwak etɛp ee Yezu nadi lii ɛ djas. Bɛ é boozɛni egɔ nyɛ etɛɛ náá, elyem bɔɔ naadyee-bakwyɛl epata dhaa nyel.

15 Yezu eezɛbɔɔza nɛ nɔɔ náá: «Bi é bot ɛ di tela mɛnyel e mis mɛ bot náá, bi é bot ɛ epiki. Guka náá, Zɛɛb nɛ gu ebhum elyem bin. Etɛɛ náá, esa ee bot di bee náá, ye é eboo esonok ɛ, Zɛɛb bee ɛ náá, ye é etɛp e gwyɛs e mis mɛ.

16 «Ewala ε etsi ε Moiiz ne ekwyala e bengooel ε mekpa ε Zeeb nabɔya, kesik é gheη ε Zan nduuel-bot. Kana membu me tak, Mbεε Bhaadal Eyon ε Zeeb epeleεel, mot ne mot goka é nye sa ye meghaaz étep ebela di tɔ tak.

17 Ye nakoozobe náá, gwoo ne bɔs é ne ghwyil esi yɔbɔ, ààbe ne tep. Ye kabε mekpa me etsi ɔ, ye aanákwaakodisaa-disak ba mɔɔ ekyε wat tɔ tak.

18 «Motom djas aabyen myel, da nye é kεba dhiiti moma sis ɔ, motom tak sa é εzɔ. Tin, motom aaba moma nazepεεaa e ebá ɔ, sa pe é, εzɔ.»

Kana djel mot Lazaad, bε ne mot ekum

19 «Ye nabe é ne dhiiti mot ekum. Mot ekum tak nabe-bot é mbεε ekaad bεna-εboo-metan. Nye nadidi ε tɔ mbεε wolo ndjaa ne tɔ mevυ. Nye de-de é mbεε edee bekuma ε bot ne boo metan dáa bot ε di tɔ mebyon ε melυ djas.

20 Sok eniel ε ndjan'ε, ye nabe é ne dhiiti djel mot nadi é dje-dja si tin ɔ. Din ε mot tak nabe é Lazaad. Nye nabe é ne mεpyon “kpeeen” e nyel djas.

21 Djel mot'enɔk nabe é ne gwyε ε dedε bɔɔ eghutu-ghutu edee nadi é kwyit e mesa mot ekum enɔk. Tin, bela náá, bebhyε nadi ezyε, zεwyiiz mεpyon mε.

22 Tin, djel mot eεzekpaa ne mεsyee, gwyε. Efofop zokazenɔɔ nye, kenεεg nye é bhaaz ε Abalaam. Mot ekum zokabaazεgwyε ye, nye zokadelaa.

23 Nye nadi ezuk εbuεpe kɔ dεl ε bot ε nazegwyε ɔ. Nye é boo zeβen mis, nye kabee ne etseta é, Abalaam zenɔɔ Lazaad e bhaaz'ε.

24 Bhii tak nye eεεbootsim: “Tata Abalaam! Geka me ghon. Lwoma Lazaad nye duu djin tɔ

mēdii, bhii tak da nyε é zεtɔlal mε εtɔ ε tak kɔ djem. Etεε náá, mε epezuk εbuεpe nε mεgoo mε du'ak.”

²⁵ Tin, Abalaam eezεbɔɔza nε nε náá: “Mɔn'am, taala náá, wɔ naabela bεtε nε ekum esok wɔ nabε, wɔ dinaa nε tsik ε. Yε kabε Lazaad ɔ, nyε nabε é mot mezuk. E di nyε di wak'ak, nyε εpebela yε mεnyɔ. Yε kabε wɔy ɔ, wɔ moo é tɔ mezuk.

²⁶ Baabela náá, ye é nε boo guk na diidim pak'enaka. Deenek bot aakwyεl εtsel, étεp εzyε penek ɔ, nyε aanàkwak εtsaal dwoob. Baabela náá, bot aadi ee kwyεl εdhaa, tɔ pε yii kyee ɔ, aanàkwaakwak pe.”

²⁷ Mot ekum zokazεke náá: “Tata, mε waab nε nɔ náá, wɔ kyeed Lazaad tɔ ndjaa saag'am,

²⁸ penek, mε é nε bεdhyyeb εtεn. Nyε kε εdul bε mεlɔ e kaab náá, bε ezεkεzyε pε yak di mezuk.”

²⁹ Abalaam eezεbɔɔza nε nε náá: “Bɔɔ penek, bε é nε etsi ε Mɔiiz nε bεngoolεl ε mεkpa ε Zεεb étεp εdul ε bε mεlɔ. Bε gwak mεlyo mɔɔ.”

³⁰ Mot ekum zεke náá: “Tata Abalaam, yenek djas aanàkwaadjala! E nyɔ é náá, mot dus tɔ bot ε nazegwyε ɔ, da nyε é kεlii nε nɔ ɔɔ, tin é bε aaswoola mεfulu mɔɔ nε tsεεtse.”

³¹ Deenek Abalaam eebaazεke nε nε náá: “Bε é di àakwyεl εgwak Mɔiiz nε bεngoolεl ε mεkpa ε Zεεb ɔ, bε aanàkwaakomyaal mot ye nàkoo zo di mot dus tɔ bot ε nazegwyε ɔ.”»

17

Mesyem nε epelak

¹ Yezu eezεke nε bεdjekel bε náá: «Ye é tsεεtse náá, ye waadi nε mεbεk mε di náá, mot aanàkwaagwoob ε, mεbεk mε tak ε waasa náá, bot

sa mesyem. Tin, saabegɔs é náá, ha kpaa-ghon ne mot aaka mebek menek ɔ.

² Ne mbi mot deenek ye goka é náá, be tsel nye boo ekok e tsun, da be é lóo nye tɔ boo dii meson. Ye àànyɔ náá, nye kwyosal ngɔt tɔ bɔɔ di dum kon ne nam ɔ tɔ mesyem.

³ Nyanka mis.

«Mɔn nyoog e syem ne nɔ ɔɔ, djóoa nye, da wɔ é dul nye melɔ ne lyem wat. Tin, nye liig lyem ɔɔ, pela nye.

⁴ Nye sa wɔ é embee esa dwoo wat esok eten ne ebá, nye bubula esok djas, éteɣ ezekɛ ne nɔ náá: “Pela me! Me eegu ebiyo e lam” ɔɔ, da wɔ é pel nye.»

Edum e kon ne Zeb

⁵ Bot e lwoma eezekɛ ne Ghen náá: «Bila bis edum e kon ne Zeb.»

⁶ Deenek, Ghen eezebɔɔza ne nɔɔ náá: «Bi é pe di é di, é dum e kon ne nam ebuɛpe dáa mɔɔ ndu le mutaad ɔ, pe bi e waake ne etsok elak náá: “Disa ekanal bɔ wak. Tóá, kebe nyel'ɔ tɔ dii meson”, nye waasa sa ekwosak e lɔ kwyel e.»

Sa mot-mesa di egoka ne esa e

⁷ «Djhooka, pookogek dáa: Wɔ di ne mot-mesa me di be wɔ epyeeb neghu ebaal e wɔ esaa e etan ɔ, esok wɔ di é bee mot tak é bula pe ndjaa bhis mesa e, wɔ ne ke ne ne náá: “Lela ezye zedi kɔ mesa wɔ neede ee”? Aàbe!

⁸ Me bee é náá, nye waake ne ne náá: “Djaaba me edee, bhii tak da wɔ é kegwyia, da wɔ é swoola ekaad. Bhii tak da wɔ é zelaa me edee, me neede. Bhis mam aasilal ede edee ne medii e, wɔy é ne ghwyil eka de yɔ.”

⁹ Nye tok ne tep eghaapee mot-mesa me etee náá, nye eesa mesa me kukuma ye lwom nye é. Ye tok deenek ee?

¹⁰ Ye é tyee wat ne biyo pe. Esok bi aadi náá, bi eezesa mesa me bi lwomaa náá, bi sa e, keka náá: “Bis tok van bot e mesa. Bis zo sa é, yii lwoma náá, bis sa e.”»

Yezu eetsik bot e ebé e zezam kam

¹¹ Dáa Yezu nadi etó pe Yeluzalem e, nye nadhan e mbaka-mbaka é kpal pak kyee del e Samali ne Ghalile.

¹² Dáa nye natuula ko ebesee e del e, wo gwaa bot e ebé e zezam kam zokazeboma ne ne. Be eezetyaa tetel ba etsetape ne ne.

¹³ Be moo tin é tsim náá: «Hyee Yezu, Ghen! Geka bis ghon!»

¹⁴ Dáa Yezu nabee be e, nye é booke ne noo náá: «Tóka kelyaal menyel men pe daa beghaa-Zeeb.» Dáa be nadi be dinaa etó-tóak e, be naazetsak.

¹⁵ Mot ngot pak'oo zokabula pe bhis, é eduwal e Zeeb ne etsim.

¹⁶ Nye eezeduma sok bhwoob e Yezu mebon si, nye eezeghaapee Yezu. Ye kabelá é náá, mot tak nabe é mot del Samali.

¹⁷ Yezu eezeke náá: «Boo bot kam djas eetsak, etsal é? Haa bak bot beten ne bená moo wo?»

¹⁸ Ye tok ne mot ngot pak'oo taala ebula etep ezeghaapee Zeeb, ye di aabe ndjon'ak nye emet oo?»

¹⁹ Bhii tak Yezu eezeke ne ne náá: «Wyele, da wo é noo nyel'ó tó. Emyaal e lo eetsik wo!»

Etuula e Eyon e Zeeb

20 EFalizye zokazɛdji Yezu náá: «Eyon ɛ Zɛɛb aazyɛ den?» Yezu eezɛbɔɔza nɛ nɔɔ náá: «Eyon ɛ Zɛɛb aanàkwaazyɛ, mis mɛ bot djas é bee.

21 Bot ɛ waake nɛ nen náá: “Beeka, ye é wak,” nɛghu “Beeka yɛ di poon'enek!” E nyɔ́ é, bi gu náá, Eyon ɛ Zɛɛb é e di bi di'enek.»

22 Bhii tak nyɛ eezeke nɛ bɛdjekel náá: «ɛwala ɛpezyɛ, ɛwala bi aadi nɛ gwyɛs ɛbee Sɛɛɲɛɛ Mɔn Mot, ye nàkoo zo bɛ beea ba dwoo wat ɛ. E ɛwala tak bi aanàkwaabee nyɛ.

23 Bɛ waalɛɛ bin náá: “Nyɛ é wak,” nɛghu náá, “Nyɛ é poon.” Deenek, sa mot ààtɔ́. Sa mot ààdu nɛ kaab.

24 Dáa ngwyɛs bhi di kas tɔ gwoo ɛ, djɛ gwyɛ tɔ gwoo djas ɛ, yɛ aadi é deenek e dwoo Sɛɛɲɛɛ Mɔn Mot.

25 ɛsok nɛ etɛp binek nɛ sɛɛ, ye goka é náá, Sɛɛɲɛɛ Mɔn Mot pookozuk ɛbuɛpɛ, da bot é di kɔ bɔs'ak mos'aak ɛ pookoswonal nyɛ.

26 Dáa ye nasaɛl é ghɛɲ ɛ Noe ɛ, yɛ aabaazosael deenek e dwoo Sɛɛɲɛɛ Mɔn Mot.

27 Eghɛɲ tak bot nadi edɛ edee nɛ dɛ mɛnyok. Bɛ nadi eba mɛba nɛ ɛkɛdje bɔɔ bɔɔ é mɛba, kɛyaka nɛ dwoo Noe nani tɔ boo elɛɛd ɛ. Bhii tak, boo bhyon nazyɛ, wɔ gwaa ye zɛdesal bɔɔ djas, bɔɔ djas gwyɛ.

28 Yɛ aadi é, tyee é ghɛɲ ɛ Lot. Eghɛɲ tak, bot nadi edɛ edee nɛ dɛ mɛnyok. Bɛ nadi ebɔmsa esa bɔɔ nɛ bɔm yii bɛsɔ bɔɔ. Bɛ nadi ebe epyeeb nɛ ɛsum ɛ mɛndjaa.

29 Tin, dwoo Lot nadus kɔ dɛɛ ɛ Sodɔm ɛ, ye nabe é Zɛɛb naakwyital bhi ma du, nɛ pup na góo-góo kɔ dɛɛ, bot djas zokagwyɛ.

³⁰ Yε aabaazosael ε deenek é dwoo Σεηελε Μον Mot aalyaal nyel e mis με bot ε.

³¹ «E dwoo tak, mot aadi e di di पे ko tō ndjan'ε, da nyε é ka lik esa be पे si tō ndjan ɔ, nyε tok ne ghwyil εbaasul éteप εZENɔɔ esa ee nyε lik पे si ε. Tyee wat ne mot aadi tō pyeeb ɔ: Nyε aanàkwaabaabela ghwyil esik पे ndjan'ε.

³² Taalaka sa nasεε ne mwaa Lot ε!

³³ Mot aasuu ekwyεεg ε tsik'ε ɔ, nyε waasu tsik'ε. Mot aakwyel εsu tsik'ε ɔ, waabaal tsik'ε.

³⁴ Με λεε bin é tseεtse náá, e pum tak, bot εbá waadjaasi gon wat. Ngɔt ε waanɔɔjaa; nwyak ngɔt likaa.

³⁵ Boa εbá aadi é, é dum tō bwak wat. Ngɔt ε waanɔɔjaa; nwyak ngɔt likaa. [

³⁶ Bot εbá ε waadi tō pyeeb. Ngɔt ε waanɔɔjaa; nwyak ngɔt likaa.]]»

³⁷ Bedjekel be zokazεdji nyε náá: «Gheη, etεp binek djas aasael पे yaa sum di?» Wɔ gwaa nyε zεbɔɔza ne nɔɔ náá: «Esok bi aadi é bee mebek é kii tō gwoo ε, keka náá, muu tit é tin.»

18

Kana kus moma ne tetεp

¹ Bhii tak Yezu eeaaazelii ne nɔɔ tō kana yak éteप nyε neelyo be náá, be goka é náá, be gheedjaala melu djas, ààbula bhis.

² Nyε eεzeke náá: «Pe kɔ dhiiti ghaada wat, ye nabe é ne dhiiti tetεp ngɔt nadi náá, etεp e Zeεb, ààgwyak nyεy ɔ. Nyε nabe é ààkobem ba ne mot.

³ Kɔ del ε tak, ye nabe é ne dhiiti kus moma nadi é pyap εzye पे dáa tetεp tak é zekeke ne ne náá: “Péεa

mε tεp bis di nε yε bis nε bot bak'aak,” etεε nάά, nyε nadi ε gu nάά, nyε ε nε gham.

⁴ E mεken, tetεp nadi byen. Deenek nyε eezεke tο lyemε nάά: “Yε kο bε nάά, mε ààkaab Zεεb ο, baadi nάά, mam ààbis bot ο,

⁵ dάa ye di nάά, kus moma yak εpemyel mε ε, ye goka ε mε pέε tεp'ε étεp nyε neekat εpyap wak.”»

⁶ Bhii tak Ghεη eezεbaabil nάά: «Gwakeka dάa mbee tetεp tak nalii ε.

⁷ Tin, Zεεb tok nε ghwyil εkwyee bot ε nyε nazesée ο, bot ε tak ε di ewaab esonok pε daa lε mwos nε pum ο. Nyε aanàkwaakwyee bε?

⁸ Mε lεε bin ε tseetse nάά: Nyε waalel εkwyee bin kaab dum nε ghamen. Tin, esok Sεεηελε Mον Mot aazyε ε, nyε waazεbela bot ε di dum kοη nε Zεεb ο kο bοs'ak ee?»

Kana Falizye bε nε nοηel epata e lapo

⁹ Yezu eebaazελεε kana kο εsu ε bot ε di bun nάά, bε ε bot ε epiki, da bε ε kadyamal ε bον nyεεg bοο ο. Nyε eezεke nε nοο nάά:

¹⁰ «Bot εbά naazεbyet pε kok Ndjaa-ebuwa kεdjaala; ngot nadi ε Falizye, dhiiti kadi ε nοηel epata e lapo.

¹¹ Falizye eezεtyaa e yε di, nyε moo djaala nάά: “Hee, Zεεb! Mε eeduwal wο, etεε nάά, mε tok dάa bεdhiiti bot: bε ε bot ε djii, embee bot, bot ε mεzο. Mε εpeduwal wο, etεε nάά, mε tok dάa nοηel epata e lapo di'ak.

¹² Mam tsi edee ε, esok εbά tο yenga wat. Mε nε djε wο endiyal kam bam.”

¹³ Nοηel epata e lapo natyaa ye ε ba εtsetape. Nyey ààben mis pε εko. Nyε eekel mεmbο kο lo.

Nyey náá: “Iyeee, Zεεb, woy ààkogek me ghon e? Mam mot mesyem.”»

¹⁴ Yezu é boozeke náá: «Nɔ̃ɔ̃ɔ̃ epata e lapo naka sik é, Zεεb eezepel mesyem me, ààbe Falizye. Étep tak é di náá, mot ε gheε nyel ɔ, Zεεb ε waasiil nye. Mot ε siila ɔ, Zεεb é bin nye.»

Yezu εpesεε bɔɔ dhyeeb metel

¹⁵ Bot naazyε ne bɔɔ tɔlɔɔ bɔɔ pe dɔ́a Yezu étep nye neekel membo kɔ lɔɔ. Tyee bedjekel nakabee deenek ε, be naazεbhem be.

¹⁶ Tin, Yezu ezeke náá, bɔɔ tɔlɔɔ tiila pe nye nadi é: «Betka bɔɔ dhyeeb be zyε pe daa lam. Sa bi ààlu be, etεε náá, Eyon ε Zεεb é yii bot ε di dɔ́a bɔɔ dhyeeb ɔ.

¹⁷ Tseεtse ne tseεtse, me lεε bin ε náá: Mot ε di ààmyaal Eyon ε Zεεb dɔ́a mɔɔ dhyeeb ɔ, nye aanàkwaani tɔ tak.»

Mot ekum

¹⁸ Dhiiti kukuma eYuda ngɔt zokazεdji Yezu náá: «Mbεε lyoel, me goka ne εsa dɔ́a étep me neebela tsik na kɔm-kɔm?»

¹⁹ Yezu ezeεbɔɔza ne ne náá: «Étep yé wɔ di djoo me mbεε lyoel? Ye tok ne mbεε mot kɔ bɔs'ak bhis Zεεb nyey nye εmet.

²⁰ Wɔ ne gu etsi djas: “Sa wɔ ààsa mezɔ. Sa wɔ ààgɔ mot. Sa wɔ ààdjii sa mot. Sa wɔ ààlε elen e etsal dum ne sɔ mot. Duwala soog ne nyoog*.”»

²¹ Mot'enɔk ezeεbɔɔza ne ne náá: «Etsi binek djas me ne duwal ye, kana edhɔma bam, kekum dwoo pan mos'ak.»

* **18:20** Ewy 20.12-16; Det 5.16-20

22 Bhis Yezu nagwak nyε é, nyε eezεke ne ne náá: «E zokalik é wɔ sa sa wat: kebɔmsa esa bɔ djas, da wɔ é nɔɔ epata e tak, djε bedjel ε bot. Tin, wɔ waabela mɛvu tɔ gwɔo, bhii tak da wɔ é zεdu mε.»

23 Dáa mot mɛvu menɔk nagwak deenek ε, ye nabε é mεkpa menek naatek nyε nyel na wɔyɔŋ, etεε náá, nyε nadi é, ne mɛvu εbuεpe.

24 Dáa Yezu nabee náá, lyem mot mɛvu menɔk nabε é, ye naakpan ε, nyε é boozεke náá: «E kɔɔla ne bot ε di ne ekum ɔ, bε ni tɔ Ɔyɔŋ ε Zεeb!

25 Ɔlyel náá, boo yaaga kyee bɔs besyε di ààbε ne mɛdii ε dhaa tɔ ba mɔɔ elen ε dhɔɔ, baadhaa-dhanja mɛlyel ne mot mɛvu étεp nyε neeni tɔ Ɔyɔŋ ε Zεeb.»

26 Bot ε nadi gwak nyε moo tin é ke pak'ɔɔ náá: «Yε bε deenek ɔ, εzε aabela tsik?»

27 Yezu eezεbɔɔza ne nɔɔ náá: «Sa di náá, bot aanàkwak ε, Zεeb aanàkwaakat yε.»

28 Wɔ gwaa Pyεed ke náá: «Gwyáka, bis eezebet djas étεp εdu ε wɔ.»

29 Yezu é boolεε bε náá: «Tseεtse ne tseεtse, mε lεε bin ε náá: Mot ε bet ndjan'ε, nεghu myεl, nεghu bɔn nyεεg, nεghu sεεg, ne nyεεg, nyε baabet bɔɔ bε étεp ε Ɔyɔŋ ε Zεeb ɔ,

30 nyε waabela bεte ne bot binɔk é mɛwala mak. Dɔɔ ne tɔ tsik aazyε bhis'aak, nyε waabela tsik na kɔm-kɔm.»

Moo é tyee esok elɛl, Yezu di lεε esyee ne gom ε lε ε

31 Dhiiti dwoɔ, Yezu zokanɔɔ bedjekel kam ne bεbá, e bhaaz'ε. Nyey ne nɔɔ náá: «Gwakekal Mena moo tɔ pε Yeluzalem. Penek ε yε aadjala djas bengooelε ε mεkpa ε Zεeb nazekwyal dum ne Sεεŋelε Mɔn Mot ε.

³² Nyε waaseebaa é mεmbɔ mε bot ε di ààbε bot é mbyak eYuda ɔ. Bot binɔk aadek nyε, lee nyε, nε εsεε é nyε metel.

³³ Bε waanyuu nyε nε eghwyεs. Bhii tak, bε waagó nyε. Melu melɛl bhii tak, nyε waagom.»

³⁴ Ghuna bɛdjekel kadi é, ààgu sa wat tɔ etɛp ee nyε nadi é ke ε. Ye nadi nε nɔɔ syela. Bε nadi é, ààgu sa Yezu nalii ε.

Yezu eetsik mot edhim pε Yeliko

³⁵ Dáa Yezu nabε náá, bε moo kunaa nε Yeliko ε, ghuna dhiiti mot na edhim nadi é, ndiindil e ngwoob gba. Nyε nadi é, mot engwyeebel.

³⁶ Nyε eezεgwak etap ε zukamwaa nε mot eezye pε kyee nyε nadi é, wɔ gwaa nyε zɛdji sa nadi dhan ε.

³⁷ Bε zεlεε nyε náá: «Ye é Yezu, mot Nazalet, ε di dhaa tin.»

³⁸ Wɔ gwaa nyε zetsim náá: «Yezu, Mɔɔ Dhavid, geka mε ghon!»

³⁹ Bεtεε nε bot ε nadi kεpε sok ɔ moo tin é bhεm nyε, nε é lyak nyε, étɛp nyε needi gwyem. Tin, nyε eebaazeloo gal gwood εlyelεpe: «Mɔɔ Dhavid, geka mε ghon!»

⁴⁰ Yezu eezεtyaa. Bhii tak, nyε eezεlwom náá, bε zyε nε nε daa lε. Dáa mot edhim binɔk natiila pε Yezu nadi é, Yezu eezɛdji nyε náá:

⁴¹ «Wɔ kwyel náá, mε sa wɔ yé?» Mot edhim binɔk eezεbɔɔza nε nε náá: «Ghεη, mε kwyel ε náá, mis mam baabεηel!»

⁴² Yezu zεke nε nε náá: «Bee, εmyaal ε lɔ eetsik wɔ.»

⁴³ E di'enek wat, mis mε eezεbεηel. Bhii tak, nyε moo du Yezu é duwal Zεeb. Dáa εdhuu ε bot ε nadi

tinaak ɔ djas nabee deenek ε, bɔɔ djas naduwal Zεεb.

19

Yezu bε nε Zasye

¹ Bhis nyε natuula kɔ dεl ε Yeliko, Yezu eezεkpaa tɔ pε yii kyee dεl.

² Kɔ dεl ε tak, ye nabε ε nε dhiiti mot, din ε lε nabε ε Zasye. Nyε nadi ε, kukuma bεnɔŋel ε epata ee elapo, nyε nadi ε, mot ekum.

³ Nyε nadi esuu εbee Yezu, saabεgɔs kabε ε nάά, nyε nadi ε εwulalεpe. Nyε nabε ε āābε nε tyee nyε bee Yezu, etεε nάά, bot nadi ε εbuεpe.

⁴ Tin, nyε ε boozεwysis kaab tɔ pε sok kεgo kɔ mɔɔ le sikomood, etεε nάά, Yezu ε dhaa tin ɔɔ, nyε neebεe nyε.

⁵ Dάa Yezu nakum ε di'enek ε, nyε zεben mis pε εko, nyε ε boolεε nε Zasye nάά: «Lela εsul Zasye, etεε nάά, ye goka ε nάά, mos, mε sulal tɔ ndjan'ɔ.»

⁶ Tin, wɔ gwaa Zasye zεsul kɔ le kaab ε kaab. Bhii tak, nyε eekedisibε nε Yezu tɔ ndjan'ε nε mεmyaala εbuεpe tɔ lyem.

⁷ Dάa bot nabee deenek ε, bot naadyeebalii εbiyoεpe kɔ εsu ε Yezu εtεp tak. Bε nadi ekeke ε nάά: «Mot tak eetɔ, kedi tɔ ndjaa mot na mbee dék!»

⁸ Zasye eezεwyl sok bhwoob ε Yezu, nyε eezεke, nε nε nάά: «Gheŋ, gwaka. Mε waakaa mεvu mam ekyee ebά. Kyee wat mε waadjε bedjel ε bot, ye bε nάά, mε naanɔɔ epata e mot, dhaa yii mε nawaagoka nε εnɔŋ ε, mε waabulal nyε mεtan mε mεnɔŋ ε esok enά.»

⁹ Tin, Yezu eezεke ne ne náá: «Dwoo pan mos'ak, tsik eeni tɔ ndjan'ak, etεε náá, wɔy pe é dha ε Abalaam.

¹⁰ Etεε náá, Σεηελε Μον Mot nazyε é, zesaa ne tsik bot djas nazewo ze ɔ.»

Kana medhεeb me laaad

¹¹ Yezu eebaazelεε dhiiti kana dum ne bot ε nadi é gwak nyε ɔ. Nyε nadi é, nyε eezekunaa ne Yeluzalem. Bot nadi é gek é náá, Eyon ε Zεεb eezekɔ ne εtuula.

¹² Tin, Yezu eezεke ne nɔɔ náá: «Mot ngɔt nabyel du wat ne bekuma ε bot ɔ zokazetɔ medjon pe dhiiti del εtsetape ne del ε le étep nyε neeke djεaa boo mekoozi. Bhii tak nyε zεbula pe del ε le.

¹³ Esok ne nyε ne tɔ, nyε eezεdjoo bot ε mesa me kam, lik be mot ne mot εdhεeb ε laad wat nadi ne boo metan ε. Bhii tak nyε eezεke ne nɔɔ náá: “Likeka é liig membɔ ne epata bak, kekum dwoo me aaboo bul ε.”

¹⁴ Tin, kaa bela náá, bot ε del ε le nadi bhina nyε. Wɔ gwaa be zelwom bot nyey àagu, étep bot ε tak neeke leε náá: “Bis àapakwyel náá, mot'enɔk di mekoozi mis.”

¹⁵ Saabegɔs ne nɔɔ, ye naka swaala náá, be naabatadje nyε boo mekoozi. Bhii tak nyε eezεsik pe del ε le. Dáa nyε nakakum ε, wɔ gwaa nyε zεdjoo bot ε mesa me nyε nadje be epata ɔ, étep nyε needji be bim epata ee nakala kɔ yii nyε nalik be ne ye étep eliig ε membɔ ε.

¹⁶ Mot εsok eezεzyε, nyey ne ne náá: “Kukuma, me eebela medhεeb me laad kam kɔ yii wɔ nalik me ne ye é.”

¹⁷ Mɛkoozi eezɛbɔɔza nɛ nɛ nɔ́á: “Ɛnyɔɛpe! Wɔ é mbɛɛ mot-mɛsa. Dáa ye di nɔ́á, wɔ kɛ tɔ etson dum nɛ bɔɔ esonok ɛ, mɛ eedil wɔ kɔ bɔ́ó mɛkoozi mɛ let eghaada kam.”

¹⁸ Mot nadi du bhis kon mot ɛsok ɔ eezɛzyɛ yɛ. Nyɛ eezɛke nɛ kukuma yɛ nɔ́á: “Kukuma, mɛ eebela mɛdɛɛb mɛ lɔɔd mɛtɛn kɔ yii wɔ nalik mɛ nɛ yɛ ɛ.”

¹⁹ Mɛkoozi eezɛbɔɔza nɛ nɛ nɔ́á: “Ɛnyɔɛpe wɔy, mɛ eedil wɔ kɔ bɔ́ó mɛkoozi mɛ let eghaada etɛn.”

²⁰ Nwyak dhiiti mot-mɛsa eezɛzyɛ. Nyɛ eezɛke nɛ kukuma yɛ nɔ́á: “Kukuma, beea ɛdɛɛb ɛ lɔɔd wɔ nalik mɛ nɛ yɛ ɛ. Mɛ ààpabe. Mɛ kwom yɛ é syela tɔ pes kaad.

²¹ Etɛɛ nɔ́á, mɛ di é, nɛ bwoo nɛ nɔ. Wɔy é mot ngɔt di nɔ́á, wɔ é nɛ biyo dhaa tyɛ. Wɔ nɛ dyeebanɔɔ dɔɔ nɛ sa di nɔ́á, wɔ ààpakwom ɛ. Wɔ nɛ tɔ tɔ epyeeb e baa, kɛnɔɔ edee bɔɔ, ààbɛ nɔ́á, wɔy é nabe yɛ.”

²² E di'enek, kukuma yɛ boobɔɔza nɛ nɛ nɔ́á: “Mbee mot-mɛsa, beta nɔ́á, mɛ pɛɛ wɔ nɛ mɛkpa mɔ ɛmet. Wɔ nadi egu nɔ́á, mam dyeebabók esa ee dɛk é tɔ epyeeb mɛ di ààbɛ ɛ.

²³ Ha wɔ di àànɔɔ epata bam, kɛwa tɔ eboo mendjaa mɛ di ebaal epata ee bot ɛ, étɛp yé? Pe bula mɛ bula ɛ, mɛ eezɛbelaa, mɛ zɛbela bɛdhiiti epata eezekala kɔ yii mɛ nalik ɛ.”

²⁴ Bhii tak nyɛ eezɛke nɛ bot ɛ nadi tin ɔ nɔ́á: “Dɛkeka nyɛ ɛdɛɛb ɛ lɔɔd ee nyɛ di nɛ yɛ enek, da bi é djɛ mot bela kam kɔ yii mɛ nadjɛ nyɛ é.”

²⁵ Bot ɛ tak eezɛbɔɔza nɛ kukuma tak nɔ́á: “Kukuma, nyɛy moo é nɛ mɛdɛɛb mɛ lɔɔd kam!”

²⁶ Kukuma eebaazɛbɔɔza nɔ́á: “Mɛ lɛɛ bin ɛ nɔ́á, ye é pɛ dáa bot djas aadi nɛ batsa ɔ bɛ aabil étɛp

ye neebu. Tin, mot aakadi toto ààbε ne sonok ɔ, bε waadek nyε dɔɔ ne eghutu-ghutu nyε lik ne ye ε.

²⁷ Ye kabε bot ε di bhina mε ɔ, bot ε nadi ààkwyeɓ náá, mε di mεkoozi ɔ, dhaaka ne nɔɔ wak, da bi é tsak bε e mis mam.”»

Yezu eetó pε Yeluzalem

²⁸ Bhis bε nalii deenek ε, Yezu eezebyet tó pε Yeluzalem. Nyey pε sok lɔɔg mεdhuu mε bot.

²⁹ Dáa bε nadi, bε moo é kunaa ne mεl mε Bhetfaze ne Bhetani ε, e ngwoob Etsok ε pyeeb oliv. Tin, Yezu eezelwom bedjekel bε bebá.

³⁰ Nyey ne nɔɔ náá: «Tóka kɔ dεl ε di pε sok enek. Tuula bi aatuula kɔ dεl ε, bi é waabee mɔɔ swooz an tinjela, nyε nabe é, nyε di náá, mot dinaa ààpaago kɔ lε ɔ. Tiika nyε, da bi é zyε mε ne ne wak.

³¹ Mot é dji bin náá: “Bi tii nyε éteɓ yé ɔ?” Lεεka nyε náá: “Ye é Gheɓ é di ne gwyes tak.”»

³² Bhii tak, bot ε nalwomaa ɔ eezetó, bε kakεbela esonok djas é dáa Yezu nazolεε bε ε.

³³ Dáa bε nakadi etii mɔɔ swooz an tak ε, bε nakuma tak eezedji bε náá: «Bi tii mɔɔ swooz an éteɓ yé?»

³⁴ Wɔ gwaa bε zεbɔɔza ne nɔɔ náá: «Ye é gheɓ é di ne gwyes tak.»

³⁵ Bε eezetii mɔɔ swooz an tak. Tin, bε eezetó ne ne pε daa Yezu. Bhii tak bε eezedja endjookuwa bɔɔ kɔ konj mɔɔ swooz an tak. Tin, bε eezεgel Yezu kɔ lε.

³⁶ Dáa bε nadi bɔɔ eke, bε moo tin edja endjookuwa bɔɔ gba ε gba.

³⁷ Dáa bε nadi, bε moo kunaa ne Yeluzalem ε, bε nadhanj ε pε ze di esul Etsok ε pyeeb oliv ε, mεdhuu mε bedjekel moo tin eduwal Zεεb εlyeleɓe dum ne endem e mεbwala mε bε nadi ebee ε.

³⁸ Bε nakeke ε náá: «Zεεb sεε Mεkoozi mε di ezyε nε din ε Ghεη ɔ metel. Egwyem tɔ gwoo dɔɔ nε duma nε Zεεb!»

³⁹ Bεdhiiti eFalizyε nadi tɔ mεdhuu mε bot binɔk ɔ zokake nε Yezu náá: «Lyael, lyaka bεdjekel bɔ náá, bε di gwyem.»

⁴⁰ Yezu eezεbɔɔza nε nɔɔ náá: «Beeka, mε lεε bin náá, bɔɔ bε diyal enuub bɔɔ di gwyem ɔ, mεkok ε waatsim e diɔɔ.»

Yezu εpedje kɔ εsu ε dεl ε Yeluzalem

⁴¹ Dáa Yezu nakum e bhaaz ghaada ε, beea nyε nabee Yeluzalem ε, Yezu zokadje kɔ εsu ε dεl ε tak.

⁴² Nyεy náá: «Yε pe bε ε di náá, dɔɔ nε wɔy pe εpegu dwoo εlak mos dáa ye di egoka nε esaa étεp εbela egwyem ɔ. Saabεgɔs nε ye kasa étεp náá, nenak e moo ε syela e mis mɔɔ.

⁴³ Etεε náá, mεlu mε bot ε di bhina wɔ ɔ, aasum boo peeb étεp εzelumela nε nɔ εpezyε. Bε waakaal wɔ kuku εbwak. Bhii tak, bε ε kemaadɔ tɔ dhiiti tuma.

⁴⁴ Bε waasii wɔ, bi nε bot bɔ. Bε aanákwaalik wɔ εkok εwat kεla kɔ sɔ, etεε náá, wɔ nabε ε ààsiiza εwala Zεεb nazεkwyee wɔ ε.»

Yezu eesɔ bot ε di bɔmsa esa pε tɔ kok Ndjaa-ebuwa ɔ

⁴⁵ Wɔ gwaa Yezu zeni tɔ kok Ndjaa-ebuwa, nyε eezeni ε sɔ bot ε nadi bɔmsa esa bɔɔ tɔ tak ɔ.

⁴⁶ Nyεy nε bot ε tak náá: «Pε tɔ ekwyala Zεεb lεε ε náá: “Ndjan'am aadjóoaa ε ndjaa mendjaala mε eYuda.” Yε kabε biyɔ ɔ, bi zeliig yε, ye di zεεga bot ε djii*.»

* **19:46** Eza 56.7; Zel 7.11

⁴⁷ Mɛlu djas Yezu nadi lelyo bot tɔ kok Ndjaa-ebuwa. Tin, eboo bɛghaa-Zɛɛb, nɛ bɛghan ɛ mɛkana mɛ etsi, zɛnɔɔ bɛdhil ɛ bot ɛ dɛl nadi esaa dɔa bɛ sa ɛtɛp bɛ neegɔ Yezu.

⁴⁸ Deenek bɛ nabɛ ɛ ààgu dɔa bɛ nawaa di ye goka nɛ esa ɛ. Etɛɛ nɔá, bot djas nadi kwyɛl ɛgwak mɛlyo mɛ ɛbuɛpɛ.

20

Ghwyil mɛbwala ɛ Yezu dus wo?

¹ Dhiiti dwoo, Yezu nadi djɛ bot mɛlyo tɔ kok Ndjaa-ebuwa. Nyɛ nadi lɛɛ bɛ Mbɛɛ Bhaadal ɛ Zɛɛb. Eboo bɛghaa-Zɛɛb, nɛ bɛghan ɛ mɛkana mɛ etsi, zɛnɔɔ bɛpaa ɛ eYuda, zokazɛtuula ɛ di'enek.

² Bɛ eezɛdji Yezu nɔá: «Kɔ eghɛɲ zɛ wɔ di esa ɛtɛp binek? Ɛzɛ djɛ wɔ ghwyil esa deenek?»

³ Yezu eezɛbɔɔza nɛ nɔɔ nɔá: «Mɛ pookodji bin kiya wat. Bi ɛ bɔɔza mɛ ɔ, ye ɛ mɛ ka lɛɛ bin ɛtɛp yɛ mɛ di nɛ ghwyil esa esɛɛɛ bak.

⁴ Ɛzɛ nadhis Zan, nyɛ zɛduu bot Zɛɛb? Ye nabɛ ɛ Zɛɛb ohoo ye nabɛ ɛ mot?»

⁵ E di'enek, bɛ moo tin ɛ, ɛ sɔs pak'ɔɔ. Bɔɔ nɔá: «Mena ɛ ke nenak nɔá: “Ye ɛ Zɛɛb” ɔ, nyɛ ɛ waadji mena nɔá: “Ɛtɛp yɛ bi nadi ààmyaal Zan?”

⁶ Mena ɛ ka keka nɔá: “Ye ɛ bot ɛ nadhis nyɔ” ɔ, mɛdhuu mɛ bot bak djas ɛ waasaa ɛgɔ mena nɛ mɛkok. Etɛɛ nɔá, bɔɔ djas nɛ myaal nɔá, Zan nabɛ ɛ ngooelɛ-mɛkpa ɛ Zɛɛb.»

⁷ Bɛ ɛ boozɛbɔɔza nɛ Yezu nɔá: «Bisɔ ààgu mot nalwom nyɛ nɔá, nyɛ zɛduu bot Zɛɛb ɔ.»

⁸ Tin, Yezu é boozeboɔza ne nɔɔ náá: «Dɔɔ ne mam pe mam aanákwaalɛɛ bin kɔ eghɛɲ e ze me di esa esesɛɛ bak ɔ.»

Kana bot ɛ mɛsa bɛ na mbee elyem di ebaal pyeeb vin ɔ

⁹ Bhii tak, Yezu zɛlii ne ɛdhuu ɛ bot binɔk tɔ kana náá: «Dhiiti mot ngɔt naabɛ pyeeb ekel e di djɛ bhum vin ɛ. Bhii tak, nyɛ eezɛkola yɛ ne bot ɛ di gu mɛsa mɛ vin ɔ ɛtɛp bɛ neesa mɛsa tɔ tak. Nyɛ eezɛnɔɔ nyel, tɔ mɛdjon, kɛboya pɛ dhiiti dɛl.

¹⁰ Tin, yɛ wum ɔ, da nyɛ é lwom dhiiti mot-mɛsa mɛ ɛtɛp bɛ djɛ nyɛ yɛ bim tɔ yii bɛ aabela ɛ. Mbu epyeeb e tak di wum ɛ, eezɛkum. Wɔ gwaa nakuma pyeeb zokazɛlwom mot ngɔt di sa mɛsa daa ɛ ɔ pɛ dáa bot ɛ nyɛ nalik ne pyeebɛ ɔ, ɛtɛp bɛ needjɛ nyɛ yɛ pak vin bɛ bela ɛ. E di'enek, wɔ gwaa bot ɛ nalik ne pyeeb ɔ mɛt mot tak, duma nyɛ e nyel ne mɛbin, bhii tak swaal nyɛ mɛmbɔ toto.

¹¹ Bhis mot sok, nakuma pyeeb baazɛlwom dhiiti mot di esa mɛsa pɛ daa ɛ ɔ, nyɛ eezɛtɔ pɛ daa lɔɔ tɔ pyeeb, bɛ eezɛnyuu nyɛ, zɛnyek nyɛ ɛbiyoɛpe.

¹² Yak kɔkɔ tyee esok elɛl, nakuma pyeeb ee-baazɛlwom nwyak mot, bɔɔ duma nyɛ e nyel ne mɛbin, wus nyɛ pɛ kel.

¹³ Nakuma pyeeb eezɛdji náá: “Mɛ sa dáa? Mɛ aaka kyeed é, sim mɔn'am ngɔt mɛ dyeebakwyl ɔ. Tin, mɛ bee ɛ náá, bɛ waakaab nyɛ.”

¹⁴ Dáa bot ɛ di sa mɛsa tɔ pyeebɛ nabee mɔn'enɔk ɛ, bɔɔ náá: “Yawee! Beeka mot aalik ne mɛvu mak djas ɔ! Dhaaka, mena góka nyɛ. Tin, mɛvu mak aadi é, yenabelka.”

¹⁵ Wɔ gwaa bɛ zɛmɛt nyɛ, mwas nyɛ bhis pyeeb vin, gó nyɛ.»

Tin, Yezu eezɛdji bɛ náá: «É di'enek, nakuma pyeeb goka nɛ esa yé? Nyɛ eebil náá:

¹⁶ Nyɛ waazyɛ, da nyɛ é gó bot ɛ nadi sa mɛsa tɔ pyeebɛ ɔ. Bhii tak da nyɛ é nɔɔ pyeeb, dje nɛ bot ɛsis.» Bhis bot nagwak deenek ɛ, bɛ é boozeke náá: «Ààbɛ! Yenek aanàkwaasaal.»

¹⁷ Bhii tak Yezu eezɛliig mis, gwyák bɛ. Nyɛy nɛ nɔɔ náá: «Mɛkpa mɛ di kwyala tɔ mɛkana'aak kwyɛl ɛlɛɛ yé

“Ɛkok ee bɛzumel mwas ɛ, moo é ɛkok di epyet ndjan ɛ*”?

¹⁸ Mot aaduma kɔ ɛkok ɛ tak ɔ, nyɛ waabik ekyes ekyes. Yɛ kabɛ náá, ɛkok ɛ ka kwyit kɔ mot ɔ, yenɔk mot aatwaalel é twaalela.»

Etuud e lapo nɛ Sezaad

¹⁹ Tin, bɛghan ɛ mɛkana mɛ etsi, nɛ eboo bɛghaa-Zɛɛb nadi esaa mɛpek éteɓ bɛ neemɛt Yezu e di tak wat. Etɛɛ náá, bɛ nabɛ é, é gu náá, Yezu nalɛɛ kana tak é, kɔ esu ɛ lɔɔ. Tin, bɛ nadi kaab é ɛdhuu ɛ bot ɛ nadi tin ɔ.

²⁰ Bɛ moo tin ebɔɲal Yezu. E di'enek, wɔ gwaa, bɛ zɛdhis bɛdhiiti bot ɛ nadi sa mɛpek náá, bɛ é bɛdhil ɛ bot ɔ. Bot ɛ tak nazye é éteɓ ɛzɛ lóo Yezu pɛ ɛko, da é bwood nyɛ pɛ kyɛ nɛ dhiiti van kiya, éteɓ bɛ neebela lo mɛsɔ mɛ di kwyosal nyɛ ndje sɔs e mis mɛ kukuma dɛl ɔ.

²¹ Bɛ é boozeke nɛ nɛ náá: «Lyɔel, bis nɛ gu náá, etɛɓ ee wɔ di lɛɛ ɛ, ye é tsɛɛtsɛ. Wɔy ààpɛɛ tɛɓ mot djhak. Wɔy lyo ɛ, sa Zɛɛb kwyɛl ɛ, nɛ lyem epiki.

²² Tinaak, lɛɛa bis, etsi lɛɛ é náá, epata e lapo tuudaa é nɛ Sezaad ee?»

* **20:17** Mɛd 118.22

²³ Tin, Yezu eezegu mepek mɔɔ. Bhii tak nye é booke ne nɔɔ náá:

²⁴ «Dhaaka me ne falanga wat, étep me neebée. Be eezɛzye nye ne falanga wat. Yezu eezɛdji be náá: bhwoob di sɔna kɔ falanga yak ε wak bhwoob zε? Ye é ekwɔyala din ε εze di kɔ tak?» Bot binɔk eezɛbɔɔza ne ne náá: «Ye é bhwoob ne din ε Sezaad.»

²⁵ Bhii tak, Yezu eebaazɛbɔɔza ne nɔɔ náá: «Djeka Sezaad sa di ye Sezaad ε; da bi é djε Zeɛb sa di ye Zeɛb ε.»

²⁶ Kɔkɔ ɛyala ε Yezu nayala ε, nabε é, ye naalyel ne nɔɔ náá, be bela mɛsɔ me nye aabela ndjε e tak ε. Etεε náá, gwaka be nagwak deenεk ε, ye nabε é be nadiaa djoka nye ɛlyelepe, tin, be eezɛdi gwyem.

Kiya dum ne tep egom bhis ɛsyee

²⁷ Bɛdhiiti bot tɔ lɔɔg eSaduseε zokazyε pε dɔ́a Yezu zɛdji nye dhiiti kiya. ESaduseε, bot ε nadi eke náá, bhis ɛsyee, mot aanɔkwaabaagom ɔ,

²⁸ bɔɔ ne Yezu náá: «Lyoel, mɛkana me Moiiiz lεε náá: “Ye be náá, mɔn nyεεg dhiiti mot ε gwyε, àalik mɔn ɔ, ye goka é náá, mɔn nyεεg lik ɔ, ba kus myel étep nye neekwɔyiida mɔn nyεεg gwyε àalik bɔn ɔ.”

²⁹ Ghuna tɔ mɔ bot binɔk, be nabε é beten ne bebá. Mɔn mεgwyak zεba, nye eezεkpaa ne mɛsyee, gwyε, nye àapakalik mɔn.

³⁰ Mot nabɔɔba mɔn mεgwyak ɔ, nye eeba kus.

³¹ Tin, nye eebaakpaa ne mɛsyee, gwyε, àalik bɔn. Bhii tak, nwyak tak eebaazɛnɔɔ moma tak, ye zokabaasaεl é tyee wat ne bot ε naba moma tak sok ɔ, zɛnɔɔ zwaabel lɔɔg. E di'enεk, bɔɔ djas beten ne bebá kadi é, àabya ne moma yenɔk.

³² Bhis bɔɔ djas, moma eezεbaagwyε ye pe.

³³ Esok bot aagom bhis esyee ε, moma yenək aakadi mwaa ze tɔ bɔɔ beten ne bebá? Etee náá, bɔɔ djas nabe é botom be.»

³⁴ Yezu eezɛbɔɔza ne nɔɔ náá: «Mɛba é, étep botom ne boa di kɔ bɔs'ak mos'aak.

³⁵ Tin, guka náá: Botom ne boa aabela mbyok egom bhis esyee, da be é kɛdi pɛ kyee dik na bes ɔ, be aakadi é, botom ne boa di ààbael ɔ.

³⁶ Be aanàkwaakabaagwye, be aakadi é dɔ́a efofop. Be é bɔɔ Zɛɛb, etee náá, be eezedhaa esyee, kɛbela tsik.

³⁷ Moiiiz naaleε popoopwon náá: Bot ε nazegwye ɔ waagom. Nyε naleε deenek é tɔ ekwyala ee di kaada tɛp ɛkpak nadi é gel ààdyak ε. Nyε nadjóo Ghɛɲ é: “Zɛɛb ε Abalaam, ye Izak, ne ye Zakɔɔb.”»

³⁸ Yezu naabil náá: «Zɛɛb tok Zɛɛb bot ε zegwye ɔ. Nyε é Zɛɛb bot ε di ne tsik ɔ, etee náá, ye é, étep'ε ε, bot djas di ne tsik.»

³⁹ Wɔ gwaa bɛdhiiti bɛghaa mɛkana mɛ etsi nadi tin ɔ zokake ne Yezu náá: «Lyool, wɔ eedyeebalii enyɔɛpe.»

⁴⁰ Deenek, be nabe é ààbe ne ghwyil ɛdji nyε bɛdhiiti mɛkiya.

Mɛsia ne Dhavid

⁴¹ Tin, Yezu eezɛke ne nɔɔ náá: «Dum ne yé bot di ke náá, Mɛsia é dha ε Dhavid?

⁴² Etee náá, ye é Dhavid nyε emet ε naleε tɔ Mɛkana mɛ Mɛdjeeb náá:

“Ghɛɲ Zɛɛb nake ne Ghɛɲ'am ε náá: Dha disi pɛ mbɔ eghɛɲ bam.

⁴³ Mɛ waanɛεg bot ε mɛbhuka mɔ be di esa ee mɛbɔ mɔ aanyal ε†.”

† 20:43 Mɛd 110.1

44 Yε bε náá, Dhavid nyε emet naadjóo nyε “Ghεη”
 ɔ, ha e yaa tyε Mesia aakabaadi dha ε Dhavid?»

*Yezu eedul bot mεlɔ dum nε bεghan ε mεkana mε
 etsi*

45 Dáa zukamwaa nε mot nadi tin ε nadi é gwak
 nyε é, Yezu eezεke nε bεdjekel bε náá:

46 «Kyeeka bεghan ε mεkana mε etsi, bot ε di kwyel
 ε kε tɔ bot nε ewolo ekaad naboo metan ε ɛlyaala
 mɛnyel étep bε needuwalaa nε swosaa é edi ee bot
 di sεεga εbuεpe ɔ. Bε dyeebakwyel edi é kɔ mεbhóó
 mε di pε esok ε tɔ mendjaa mε mendjaala mε eYuda
 nε tɔ e di e mεbyon.

47 Bɔɔ dyeebadi é dεk bεkus ε boa esa tɔ mendjaa
 mɔɔ. Tɔ mεkɔη mɔɔ, bε nε kwyel εdul ε mendjaala
 na kpɔkɔlom. Epée bɔɔ aadi é, ɛlyεεpe.»

21

Falanga djel kus moma nadjε ε

1 Yezu zokazεben lo, nyε moo tin é bee dáa
 bεkum ε bot nadi ezεduwal Zεεb nε epata tɔ εbɔɔl
 ε, nanεεga kɔ εbεsεε ε kok Ndjaa-ebuwa étep tak ε.

2 Nyε eezεbee dhiiti djel kus moma eezyε, zεlɔo
 yε tɔ εbɔɔl. Tin, nyε eezεwa yε bɔɔ efalanga ebá,
 ààkokoka-koka nε pata mot bɔm sonok wat ε.

3 Dáa Yezu nabee deenek ε, nyε é booke náá:
 «Tseetse nε tseetse, mε lεε bin ε náá: Djel kus moma
 yak eelɔo tɔ εbɔɔl dhaa yii bot djas lɔo tɔ εbɔɔl ɛlak
 ε.

4 Etεε náá, bot ε djε wak djas'aak, djε é eghutu-
 ghutu. Yε kabε djel kus moma ɔɔ, nyε djε ɛkwom ε
 lε djas.»

Yezu eelεε náá, Ndjaa-ebuwa é waawaazel

⁵ Bɛdhiiti bot nadi esɔs dum nɛ zumal kok Ndjaa-ebuwa, dɔ́a ye nasumel nɛ mbɛɛ mɛkok ɛ, zɛnɔɔ esa e bot nakadjɛ Zɛɛb ɛ. Tin, Yezu eezɛke náá:

⁶ «Dwoo ɛpezyɛ, dwoo ye aabɛ náá, ye ààka baalik é di'ak ɛkok ɛwat kɛla kɔ sɔ ɛkok tɔ ndjaa bi di bee'enek; etɛɛ náá, djas aadi é, bik, waazel, see e bɔs.»

Ghon nɛ tsik mezuk

⁷ Bɛdjekel bɛ eezɛdji Yezu náá: «Lyœl! Lɛɛa bis, esesɛɛ binek ɛ aasaɛl den. Lyaala bis endem e bis aagwyak náá, esesɛɛ binek moo kɔ nɛ ɛsɛɛ ɛ.»

⁸ Nyɛ eezɛbɔɔza náá: «Tselalka, nàbetka náá, bɛ kɔɔ bin etɛɛ náá, bot ɛbuɛpe waazezyɛ nɛ din ɛ lam. Mot nɛ mot ɛ waalɛɛ náá: “Ye é mam ɛ di Mɛsia.” Bɛ aake náá: “Èlu ɛ tak eezɛdjala.” Sa bi ààdu bɛ.

⁹ Esok bi aadi bi moo gwak lɛɲ mɛɛb, nɛ ɛbyen nɛ lek ekukuma ɛ napwakeka, ye goka é yenek ko sɛɛ ɛsok, guka náá, yenek aanàkwaaleedi ɛsi ɛ bɔs.»

¹⁰ Yezu baazeke náá: «Mbyak ngɔt ɛ waalumela dɛɛb nɛ dhiiti dhaad mbyak. Eyon ɛwat ɛ waalumela dɛɛb nɛ dhiiti eyon.

¹¹ Bɔs ɛ waaboo dheegel ɛlyɛlɛpe. Edi-nɛ-edi, pwom nɛ gum, bot djas ɛ waagwak bwoo e di baabee edjema nɛ epɛla tɔ gwoo ɔ.

¹² «Esok nɛ esesɛɛ binek nɛ saɛl, bi ɛ waakɛ mɛtaa, bi ɛ waakɛ waaa tɔ tsik mezuk, bi ɛ waakɛkaa étɛp bɛ neekɛ pɛɛ bin tɔ mɛndjaa mɛ mɛndjaala mɛ eYuda, bi ɛ waakɛ mɛtaa e membok, bi ɛ waakɛ pɛɛaa dɔ́a bɛmɛkoozi nɛ ekukuma kɔ ɛsu ɛ lam.

¹³ Yenek djas aasaɛl étɛp bi neebela ze ɛkɛɛ bot sa bi di gu dum nɛ nam ɛ.

¹⁴ Tin, guka náá, bi di nɛ lyem wat, sa mot aabem ba nɛ dɔ́a bi aakɛtanɔl ɛ.

¹⁵ Mam me emet, me waadje bin mekpa ne etson. Tin, bot e bi aadi ne tep ne noo aanakwaakwak ekwyesal e bin, ne dupal mekpa min.

¹⁶ Bot aaka bin o ye aadi e, besseg bin, ne benyseg bin, zenoo bon nyseg bin, ne beso bin doo ne bot e mebyel min. Betee ne bot pak'en e waadiyalaa e membok me na kom-kom.

¹⁷ «Bot djas e waabhina bin ko esu e lam.

¹⁸ Tin, ye aanakwaadi ne ko bhoo wat e elo bin aako diib.

¹⁹ Go pyetka pe yebo kyee elyelope, etee naa, deenek e bi aatsik menyel min.»

Yezu eelée náá, Yeluzalem e waawaazel

²⁰ «Esok bi aabee naa, medhuu me esodja eezekaal Yeluzalem. Tin, bi e ne ghwyil eka gu naa: Ye ka lik e batsa Yeluzalem neewaazel!

²¹ E di'enek, bot aadi pe kyee dik Yude o, goka e, ne kaab to to metsok. Bot aadi ko ghaada Yeluzalem o, goka e ne edus tin, to etsetape. Bot aadi pe to epet e ewala elenek o, aagoka ne sik, to pe to ghaada.

²² Etee naa, ye aadi e, dwoo Zeeb aazepée bot e, ye e dwoo ekwyla djas aabela mesuk me tak.

²³ Ha kpaa-ghon dwoo tak ne boa aadi ne mebum o, ne bot aadi ne bon e mebel o. Etee naa, boo mezuk e waadi dwoo tak ko bos. Bot ebupe waagu ebuk e Zeeb ko ghaada tak.

²⁴ Bot e tak e waagóaa ne epe. Bedhiiti e naametaa, toaa ne noo tyee ekwom ko mel djas. Tin, Yeluzalem e waazenyala ne bot e di aabe bot e mbyak eYuda o. Be waasa deenek, kekum dwoo Zeeb nadjé be e aaboo si e.»

Ezye e Seeηele Mon Mot

²⁵ «Bot ε waabee edjema ne epela to gwyes, to ngon, to ekwyikwyen. Pe si, membyak djas ε waadi ne boo ba ne ken, di be aagwak ghuu ne ebee boo mebhyeeb to boo dii meson o.

²⁶ Dwoo ne ngon ne ekwyikwyen ε waadheegel ne ghwyil ε Zeeb. Bhii tak, bete ne bot ε waagwyε ne bwoo esiiza e etep aaboo tuula ko bos djas ε.

²⁷ E di'enek, be waabee Seenjele Mon Mot ε zye to eguud. Nyε waazyε ne ghwyil ne mekas me djas.

²⁸ Dwoo etep binek ε aakan ε, tyaaka, pyetka pe yebɔ kyee, etεε nάά, Zeeb moo zepεk bin e ekwom.»

Kana le fiigh

²⁹ Bhii tak Yezu eezεεε be kana yak: «Pokobeeke mbek le fiigh ne bedhiiti ele djas.

³⁰ E sok bi di bee nάά, eka e bes moo kan ekwyil e tak ε, guka nάά, mbu ele di wum ε moo eezekunaa.

³¹ Tyε wat ne biyɔ pe, esok bi aabee endem binek moo nyen ε, guka nάά, Eyon ε Zeeb moo ε ye zekunaa.

³² Tsεetse ne tsεetse, me lee bin ε nάά: Bot ε kɔkɔ membu mak aanakwaasi, esonok ee me di elεε djas ε, aasaεl.»

³³ Yezu naake nάά: «Gwoo ne bos ε waasi, ghuna yam mekpa aanakwaasi.»

Etepyε bot di egoka ne enyan ε mis

³⁴ «Bi ε gheedi ne etson, sa bi aapul ebhum e elyem bin gwyes, ne dek menyok e mebyon, dɔɔ ne etep ewyiib esa e bos'ak. Deenek, dwoo Zeeb aazyε zεpεε bot ε, ye aatuula bin ε zaka.

³⁵ Ye aazyε dάa ewyet. Ye deenek ε ye aatuula bot ε bos djas zaka.

³⁶ Nyanka mis. Gheedjaalaka Zεεb mεlu djas. Deenek ε bi aabela ghwyil εmaad ε lyem dum nε etεp ee di zye yenek. Da bi ε tyaa tetel sok bhwoob Σεηελε Mον Mot.»

³⁷ E mwos Yezu nadi elelyo bot pε tο kok Ndjaa-ebuwa, ε pum nye katetό, kεdja si ε kο etsok ε pyeeb oliv.

³⁸ Tin, tο bεmεlem djas bot ε dεl ka zye tο kok Ndjaa-ebuwa, zegwak nye ε lelyo mεlyo mε Zεεb.

22

Ekukuma ε boob εtεp ε Yezu

¹ Ebyon ε emapa di aabe nε leviid, di djόoaa Pak ε, nabe ε eezekunaa.

² Eboo bεghaa-Zεεb nε bεghan ε mεkana mε etsi nadi esaa mεpek εtεp bε neemet Yezu etεε nάά, bε neegό nye. Tin, bε nadi ekaab zukamwaa nε mot nadi tin ο.

Yudas moo ε tsat nye aaka Yezu ε membo mε ekukuma

³ Tin, Satan eezeni tο bum lyem ε Yudas Iskaliot nadi ngot tο bεdjekel ε Yezu ο.

⁴ Yudas nazetό pε dάa eboo bεghaa-Zεεb nε bot ε di kο elo e bεbaalel ε kok Ndjaa-ebuwa ο, εtεp nye neekεka bε Yezu.

⁵ Tin, bot ε di kο elo e bεghaa-Zεεb ο naadyee-bamyaala. Wο gwaa bε zεkek Yudas epata.

⁶ Yudas eezemyaal, nye moo tin ε saa mεpek mε nye kabε Yezu gha tο syaab e kaab nάά, mεdhuu mε bot εzegu.

Yezu eelwom bε koobal εbyon ε Pak

⁷ E dwoo ebyonj ε emapa di ààβε ne leviid ε, dwoo bɔɔ ebhata e Pak di tsakaa ε, eezekum.

⁸ Yezu eezεkyeed Pyeed be ne Zanj pe sok. Nyey ne nɔɔ náá: «Tóka, kekoobalka mena edee e ebyonj ε Pak.»

⁹ Tin, be eezedji Yezu náá: «Wɔ kwyel náá, bis kekoobal wɔ di mena aadeka edee e ebyonj ε Pak wo?»

¹⁰ Yezu eezεbɔɔza ne nɔɔ náá: «Gwakeka, esok bi aakum kɔ dɛl ε, bi ε waaboma ne dhiiti mot ne bhe medii kɔ lo. Duka nye.

¹¹ E di nye aadjel ɔ, leeke nakuma ndjaa náá: “Lyoel ke é, bis dji wɔ náá, ndjaa nye aade ebyonj ε Pak tɔ tak be ne bedjekel be ε, wo ee?”

¹² Tin, nye waalyaal bin pe εko ε ndjaa boo dhenj koobela ne esa djas tɔ tak. Tin é bi aasa esese e ebyonj ε Pak.»

¹³ Bedjekel eezetɔ pe dɛl ε tak. Be ka bela djas ε dáa Yezu naleε be ε. Bhii tak, be eezeni é εkoobal ebyonj ε Pak.

Nyel ne ghiya ε Yezu: kɔminyɔn

¹⁴ Dáa ewala tak nakadjala ε, Yezu eezedi kɔ mesa be ne bot ε lwoma.

¹⁵ Nye eezεke ne nɔɔ náá: «Mε be é mε eedyee-bakwyel náá, mena deka ebyonj ε Pak'ak é di wat, esok ne náá, mε zuk!

¹⁶ Eteε náá, ye goka é mε lee bin náá, mε aanákabaade ebyonj elak, kana mos, keyaka ne dwoo esuk ε tak aabela lo tɔ Eyonj ε Zeeb ε. Tin, mε waabaade.»

¹⁷ Nye eezεnɔɔ beεle nadi ne vin tɔ tak ε. Bhii tak, nye eezεghaapeε Zeeb, nye eezεke ne nɔɔ náá: «Nɔɔka beεle vin'ak. Kaaka ye pak'en, da bi é de,

18 etεε náá, egoka é, mε lεε bin, náá, kana mos, keyaka nε dwoο Eyοη ε Zεεb aazyε ε, mε aanákabaade mεnyok mε vin.»

19 Bhii tak nyε eezenoo mapa, baazeghaapeε Zεεb tο mendjaala, bhii tak, nyε eeεpyak yε, noo yε, djε bedjekel bε. Nyεy nε noo náá: «Yak é nyel'am zekaaa kο esu ε len ε, gheesesaka deenek étep bi neetetaala mε.»

20 Nyε eebaazεdjε bε beεle tak wat bhis dek. Nyεy nε noo náá: «Beεle yak ε beεle ebheη ε na bes nε Zεεb, ebheη ε kwyalel nε ghiya yam see kο esu ε len ε.

21 Tin, guka náá, mot aaka mε ε wak, bis nε nε é kο mesa yak!

22 Ye é tseεtse náá, Seηεle Mοn Mot ε waagwyε, dáa Zεεb nazekoobale ε. Tinaak, ha kpaa-ghοη nε mot aakeka nyε o!»

23 Tin, bedjekel moo tin é djinel pak'oo náá, nwyak mot pak'oo aakeka Yezu.

Ye é εze di boo-mot?

24 Bedjekel ε Yezu moo tin é be mεso pak'oo, etεε náá, bε nadi kwyeł εgu náá, εze di dhil mot pak'oo.

25 Yezu eezebōza nε noo náá: «Bemεkoozi mε bōs'ak di àakwyel Zεεb o djas εpeke tyee wakoko kο loo. Bot ε di nyal bε o djōoaa é, bot ε enem esa.

26 Tin, yebō yε àågoka nε edi é deenek. Etεε náá, pε yibō, mot di boo-mot o, goka nε di tο besō é, dáa mōo dhyeeb. Deenek, mot ε kwyeł edi dhil mot o, goka é nε di mot-mesa mε bōo besō.

27 Etεε náá, εze di boo-mot? Ye é mot di kο mesa o, ohoo mot di be besō o? Ye é mot di kο mesa o, etsal e? Beeka mam é tο len tyee mot di sa bin mesa o!

28 Bi é bot ε nadi melu djas e ngwoobam tο mbee mebhowal o.

²⁹ Tyε wat ne dāa Saag'am nadjε me Eyon ε le ε, tyε tak wat me epedje bin Eyon ε tak.

³⁰ Bi ε waadε edee ne medii kɔ mesa yam, tɔ Eyon ε lam. Bi ε waadi kɔ mebhóó me mekoozi mam étεp bi neepée membyak kam ne ebá Yisalaεl.»

Yezu eεεε Pyεed náá, nyε waaswonal nyε

³¹ Yezu eεεεke náá: «Simɔŋ, Simɔŋ, gwaka! Satan be é, nyε eebela ze étεp esyaal ε wɔ dāa bhum di syaalaa tɔ zyaagal étεp edis eεeeza ε.

³² Tin, ye be é, me eedjaala étεp'ɔ, e kaab náá, εdum ε wɔ di dum kɔŋ ne Zεεb eεεεwyii. Tin, bula wɔ aabula daa lam ε, djeaa bɔn nyooog ghwyil.»

³³ Pyεed eεεεke ne Yezu náá: «Gheŋ, e di me di'ak, me eεzemyaal etó membok, neghu esyee menabel.»

³⁴ Wɔ gwaa Yezu zεbɔɔza ne ne náá: «Beta me lee wɔ, Pyεed, sa di tseεtse ε: E pum'ak mos, esok ne bekuu ne kɔk esok ebá, ye aabela wóó zeswonal me esok elεl.»

Ngwyε epata, kpa, ne pεl

³⁵ Bhii tak Yezu eεεεke ne nɔɔ náá: «Esok me nalwom bin bi ke esa mesa, toto ààbe ne ekpa, àànɔɔ ngwyε epata, àànɔɔ ekoko, ye nabe é sa wat nasu bin e?» Bɔɔ náá: «Ààbe. Bis nabe é ààsu sa wat.»

³⁶ Deenek nyε eεεεke ne nɔɔ náá: «Nenak e tokape deenek, ye moo é náá, ye goka é náá, mot di ne ngwyε epata be ɔ, nɔɔ ye. Tyε wat ne mot di ne kpa ɔ, nɔɔ kpae, dɔɔ ne mot di ààbe ne pεl ɔ, goka é ne εbɔmsa ndjookuwa ye étεp eεεεbɔm pεl.

³⁷ Etεε náá, ne tseεtse betka me lee bin náá, ye goka é náá, etεp ee ekwyala naleε kɔ esu ε lam náá:

“Nyε nalanɲaa tɔ lɔɔg bot ε na mbee mεsa.” Nε tsεεtsε etεp ee naliel kɔ εsu ε lam ε, goka é yε sεε.»

³⁸ Bhii tak bεdjekel eezeke nε nε náá: «Gheɲ, beea! Bis é nε epel ebá.» Yezu eezeke nε nɔɔ náá: «Yenek, eedjala.»

Yezu εpedjaala pε kɔ εtsok ε pyeeb ele e Oliv

³⁹ Yezu eezeɰwyis. Nyε eezeɰtɔ pε kɔ εtsok ε pyeeb oliv, dáa nyε nabela nε esesa sok ε. Bεdjekel bε zokadu nyε.

⁴⁰ Bhis bε nakum e di tak ε, Yezu ε boo ke nε bεdjekel bε náá: «Djaalaka Zεeb étεp bi εzekεkwyε e mεbhowal.»

⁴¹ Bhii tak nyε eezeɰtiila ba zii tyee wusa pwak, nyε eezeɰkwyit mεbon si, nyε moo djaala.

⁴² Nyε nadi é keke tɔ mendjaala mε náá: «Saag'am, wɔ kwyel ɔ, wɔ é nε ghwyil εdis bεεε mezuk mak sok bhwoob'am. Ye nàkoo zo di, ye goka é náá, ekwosak ε lɔ sael, ààkabe yam.» [

⁴³ Tin, wɔ gwaa fofop ngɔt zokadus tɔ gwoo, zεdje nyε mεghaaz mε εmaad.

⁴⁴ Yezu tɔ bεbebwol nε bwoo, nyε eebaazεnenal nyel tɔ mendjaala. Ediidyok moo tin é pak nyε e nyel, é see e bɔs dáa mεtɔ mε ghiya.]

⁴⁵ Bhis nyε nazedjaala ε, nyε eezeɰwyel, sik pε kyee bεdjekel bε nadi é. Nyε ka kεbela bε bɔɔ djas mendjaa mε si é egɔ nε kwyεsa ghon nazekwyεsa bε tɔ elyem ε.

⁴⁶ Nyε eezeke nε nɔɔ náá: «Étεp yé bi di edja gɔ? Wyelka, da bi é djaala étεp εkaab náá, bi εzekεkwyee e mεbhowal.»

Yezu eemεtaa

47 Ye nabelaa é Yezu dinaa elii, tin, Yudas, ngɔt tɔ bɛdjekel bɛ, eezɛtuula nɛ ɛdhuu ɛ bot. Bhii tak, Yudas eezɛtiila pɛ dɔ́a Yezu ɛ́tɛp nyɛ neebeedal nyɛ.

48 Tinaak Yezu zokaaaake nɛ nɛ náá: «Yudas, ye é nɛ mɛbeedela menek ɛ wɔ́ dika Sɛɛɲɛlɛ Mɔn Mot e?»

49 Dɔ́a bot ɛ nadi gyee nɛ Yezu ɔ́ nabee sa nadi kwyɛl ɛsaɛl é di'enek ɛ, bɛ é boozɛdji nyɛ náá: «Ghɛɲ, wɔ́ ɛpekwyɛl náá, bis lum bɛ nɛ ɛpɛl e?»

50 Ngɔt pak'ɔ́ zokakwyal mot-mɛsa mɛ boo ghaa-Zɛɛb, zɛtsaal nyɛ ɛlɔ́ pɛ kyee mbɔ́ e ghɛɲ.

51 Tin, Yezu é booke nɛ nɔ́ náá: «Betka, eedjala.» Bhii tak Yezu eezɛmɛt ɛlɔ́ mot tak, pyon tak eezɛgel.

52 Bhii tak, Yezu eezɛke nɛ eboo bɛghaa-Zɛɛb, nɛ bɛbaaleɛ ɛ kok Ndjaa-ebuwa zɛnɔ́ bɛpaa ɛ eYuda zye, zɛmɛt nyɛ ɔ́. Nyɛ náá: «Bi zye nɛ ɛpɛl nɛ eghwyɛs é, e kɛ é náá, bi zɛmɛt é mot djii?»

53 Bi ɛ bee ɔ́, mɛlu djas, mɛ nadi é, nɛ nen tɔ kok Ndjaa-ebuwa. Bi nabe é ààsaa náá, bi mɛt mɛ. Ghuna yak ɛwala é yibɔ́, yii ghwyil ɛ ɛgwyitok.»

Pyɛɛd eeswonal Yezu

54 Dɔ́a bɛ namɛt Yezu ɛ, bɛ eezɛtɔ́ nɛ nɛ pɛ ndjan ɛ boo ghaa-Zɛɛb. Kaa bela tin, Pyɛɛd é du bɛ pɛ bhis kon, ba ɛtsetaɛpe nɛ nɔ́.

55 Ye nabe é bɛ naapaada du kuku ɛbɛsɛɛ peeb. Tin, Pyɛɛd zokazɛdisi é gɔ́l du bɛ nɛ bot ɛ nadi tin ɔ́.

56 Dhiiti moma nadi é sa mɛsa tɔ́ ndjaa boo ghaa-Zɛɛb ɔ́ zokazɛbee nyɛ ndiindil ɛgɔ́l du. Moma tak zɛgwyák nyɛ «kpɛɛɛ», nyɛy nɛ nɛ náá: «Mot tak pe nadi é, bɛ nɛ Yezu!»

57 Wɔ́ gwaa; Pyɛɛd zɛswonal, nyɛ náá: «Mam ààgu nyɛ.»

58 Ba mɔɔ ɛwala bhii tak, dhiiti mot-mesa ee-baazɛgwyak nyɛ. Mot tak nɛ Pyɛɛd náá: «Dɔɔ nɛ wɔy pe, wɔ é mot'ɔɔ.» Tin, Pyɛɛd eezɛbɔɔza nɛ mot tak náá: «Ààbɛ. Ye tok mam.»

59 Tyee ba ɛwala wat bhii tak, dhiiti baazɛke nɛ ghwyil djas náá: «Ye é tɛɛtɛ náá, mot tak nadi é, bɛ nɛ nɛ, etɛɛ náá, nyɛ é mot kyee dik Ghalile.»

60 Tin, Pyɛɛd eezɛbaabɔɔza náá: «Mɛ ààgu sa wɔ di kwyɛl ɛlii enek.» E di'enek, Pyɛɛd dinaa é lii deenek, kuu eezɛkɔk.

61 Ghɛɲ zokaliig mis, gwyák Pyɛɛd bhii tak mis mɔɔ eezɛboma. E di'enek, Pyɛɛd eezɛtaala sa Ghɛɲ nalɛ nyɛ é: «Ɛsok nɛ kuu nɛ kɔk mos, yɛ aabela ɛ wɔ eezɛswonal mɛ esok elɛl.»

62 Tin, Pyɛɛd eezɛwyis, tó, nyɛ moo tin é djii ɛbuɛpe.

Yezu eeleaaa nɛ ɛbiaa

63 Bot ɛ nadi baal Yezu ɔ moo tin é duk nyɛ. Bhii tak bɛ eezɛnyuu nyɛ nɛ eghwyɛs.

64 Bɛ eezɛbutalɛ kaad kɔ mis. Bhii tak, bɛ moo dji nyɛ náá: «Naɲa! Ɛzɛ nyuu wɔ?»

65 Tin, bɛ naalee nyɛ ɛbuɛpe.

Yezu sok bhwoob boo zɛɛga ekukuma eYuda

66 Tɔ mɛlem kɛɛɲ, bɛpaa ɛ eYuda, bɛ nɛ eboo bɛghaa-Zɛɛb, zɛnɔɔ bɛghaɲ ɛ mɛkana mɛ etsi eezɛsɛɛga. Bɛ eezɛtel Yezu kuku boo kwan ekukuma eYuda, e di etɛp dii pɛɛaa wɔ.

67 Tin, bɛ eezɛdji nyɛ náá: «Ye bɛ náá, wɔ é Mɛsia ɔ, lɛɛa bis!» Yezu eezɛbɔɔza nɛ nɔɔ náá: «Mɛ lɛɛ bin náá, mɛ é Mɛsia ɔ, bi aanákwaamyaal mɛ.

68 Mɛ ko dji bin kiya ɔ, bi aanákwaabɔɔza mɛ. Bi nakoodi ààmyaal, mɛ epeleɛ bin náá,

⁶⁹ kan e dwoo elak mos, Σεηελε Μον Mot aadi é
ndiindil, tɔ di dék ε Zεeb na ghaa Ghwyil.»

⁷⁰ E tyε enek, bɔɔ djas zɛdʒi Yezu náá: «Wɔ é Mɔn Zɛɓ e?» Yezu zɛɓɔɔza nɛ nɔɔ náá: «Ye é dǎa bi zo ke enek. Ye é mam.»

⁷¹ Be kaa tsim ε náá: «Mena tokape ne gwyes ne mot aapit nyε ∅. Ne tseetse menabel be emet eegwak mekpa me nuube.»

23

Yezu sok bhwoob ε Pilat

¹ Bot ε σεεga djas eezeWyel, bhii tak beezetó ne ne
pe dáa kukuma Pilat.

² Tin, bε moo tinaak é su nye etεp. Bɔɔ náá: «Bis bela mot tak é, é besal bot ε mbyak es bε kus εghuub. Nyε εpelu bot náá, bε nàdje epata e lapo nε Sezaad. Nyε ke é náá, ye é nyεy ε di Mεsia, e kwyεl ελεε é: “mekoozi”.»

³ Kukuma Pilat eezedji nye náá: «Woy é di mekoozi me eYuda?» Yezu eezebɔɔza ne ne náá: «Ye é dǎa woy wɔ emet ke enek.»

⁴ Bhii tak Mekoozi Pilat eeke ne eboo beghaa-Zeeb, ne edhuu e bot nadi tin o naa: «Mam aapabee tep me di egoka ne ekwyeesal mot tak ndje sos ne ye é.»

⁵ Tin, bε eebaazεben gwood, tsim εlyelεpe nάά: «Nyε εpebesal bot, bε kus εghuub nε kəkə mbi mεlyo mε. Nyε nakan nε ye ε, pε kyee dik Ghalile. Nyε eezetuula nε ye kə Yude. Ye ε nyε moo nε ye mos wak'ak.»

Yezu sok bhwoob ε mεkoozi Elood

⁶ Dáa mekoozi Pilat nagwak mekpa menek ε, nye ε boodji náá: «Mot tak ε mot Ghalile?»

⁷ Tin, be eezελεε nyε náá, Yezu nadus é pε kyee dik Elood, nadi kək kə tak ε. Deenek nyε eezεkyeed nyε pε dáa Elood. Ze bela náá, ye nabε é mεkoozi Elood naazyε, zεkwyεεg ba mεlu tin tɔ Yeluzalem.

⁸ Mεkoozi Elood naadyeebamyaala εbuεpe dáa nyε nabee Yezu ε. Etεε náá, ye nabε é, nyε naadyeebagwak menduk ε Yezu. Nyε nadi esaa εboma nε nε. Nyε nadi suu é náá, Yezu sa dhiiti ndem mεbwala e mis mε, nyε neebεe.

⁹ Tin, nyε eezεdji Yezu bεtε nε mεdjɪn, Yezu kadi é, «gwyem» ààbɔɔza.

¹⁰ Eboo bεghaa-Zεεb nε bεghan ε mεkana mε etsi nadi é, tin, be nadi é su etεp e mεpita εbuεpe kə lo ε Yezu.

¹¹ Mεkoozi Elood be nε esodja be zokaduk nyε, gɔ nyε. Be nabee nyε é tyee ba van put mot deenek. Bhii tak be eezεbet nyε mbεε wolo kaad, bhii tak be eezεswaal nyε pε dáa kukuma Pilat.

¹² Mεkoozi Elood be nε kukuma Pilat nabε sok é, ààgwakel. Dwoo ε tak é be nakan εgwakel pak'ɔɔ.

Be eezεpée Yezu epée e εsyee

¹³ Kukuma Pilat eezεboma e boob be nε eboo bεghaa-Zεεb, nε ekukuma eYuda, zenɔɔ bεdhiiti bot ε dεl,

¹⁴ nyε eezεke nε nɔɔ náá: «Bi zye mε nε mot tak é, etεε náá, nyε εpebesal bot be kus εghuub. Deenek ye be é mε eedji ye tanjal e mis min wak, ka bela náá, mam ààpabee embee etεp ee bi zεpit nyε étεp tak ε.

¹⁵ Mεkoozi Elood nabε é ààbela nyε nε ndjε səs étεp tak é nyε naswaal nyε wak. Deenek mot tak ààpasa dhiiti tεp mena di egoka nε εgɔ ε nyε kə εsu ε tak ε.

¹⁶ Eteṙ tak é di náá, me waalwom náá, be nyuu nyε ne meka. Bhii tak da me é bet nyε.» [

¹⁷ Eghen mebyon me ePak djas, mekoozi Pilat nabe é ne ezel ε wyisal mot membok ngot.]

¹⁸ Wɔ gwaa bɔɔ djas zokazetsim náá: «Góá nyε, da wɔ é bet bis Bhaalabas.»

¹⁹ Ze bela náá, Bhaalabas naametaa é, éteṙ nyε nagó mot esok bot ε mbyak'ε nabe boo dho ne eLom ε.

²⁰ Dáa Pilat nakwyel ebet ε Yezu ε, nyε eebaazɛdji ɛdhuu ε bot.

²¹ Deenek bot djas zetsim elyεlepe náá: «Bema nyε e melaaba! Bema nyε e melaaba!»

²² Pilat zokazɛbaadji be tyee djia esok elɛl, nyε náá: «Mot tak sa yaa ɛbiyo ee? Me ààpabee ghamen bi di é ke náá, nyε góaa ε. Eteṙ tak é me ke náá, be nyuu nyε ne eghwyεs, da be é bet nyε.»

²³ Ghuna bot nadi ebesal ne etsim elyεlepe náá, nyε bema e melaaba. Etsim bɔɔ naadhaa Pilat.

²⁴ Deenek Pilat zokazetsaal teṙ dhen náá, ye kaa sael dáa ɛdhuu ε bot kwyel ε.

²⁵ Tin, kukuma Pilat eezεwyisal mot bɔɔ nadi kwyel náá, nyε wyisal ɔ. Mot tak nametaa é, etεε náá, nyε naabe boo dho, mot zokagwyε e dho tak.

Yezu eebemaa é melaaba

²⁶ Dáa be nadi tó ne Yezu ε, wɔ gwaa be zɛboma ne Simon mot dɛl ε Silen. Nyε nadi é dus ye ε pe pyeeb. Esodja zokamet nyε, zɛdje nyε melaaba nyε kwyee Yezu e ɛbɛp ε ye pe bhis kon ε Yezu.

²⁷ Zukamwaa ne mot mɛdhuu-mɛdhuu nadi edu be, zɛnɔɔ boa é dje megwye ne etanjal kɔ esu ε lɛ.

28 Tin, Yezu zokazeliig mis, gwyák be. Nyey ne nɔɔ náá: «Boa e Yeluzalem, nàdjeka kɔ esu e lam! Bi goka ne edje e éter'en ne éter bɔɔ bin!

29 Dáa di náá, ewala mot aake náá: “Menyo ne boa di náá, be aanàkwaabya ɔ, ne bekwyiid e boa, zenɔɔ boa di ààgu dáa mɔn di djɛaa ebel e!” moo é, ye eezekunaa, ne tsetse.

30 E di'enek, bot e waake ne metsok náá: “Dha dumaka kɔ les!” Ne eghooda náá: “Dha syelka bis!”

31 Ete náá, kwyii le bes saaa deenek, gwyaa za ne syeela le? Be aakasa dáa ne ye?»

32 Esodja baazetɔ ne botom ebá, bembee e bot, be neegó be, be ne Yezu loɔg wat.

33 Eghen be nakum e di be di djóo «Bhobho Lo» e, esodja zokazebem Yezu e melaaba, ne bembee e bot ebá, nwyak pe mbɔ e ghen, dhiiti pe mbɔ emyel.

34 Yezu é boozeke náá: «Pela be, Saag'am, etee náá, be ààgu sa be di sa e.» Be eezekaa ekaad be, bhis be nazesa egwyeege e.

35 Medhuu me bot nadi é, tin é bee. Ekukuma e eYuda moo é gɔ ne duk é nye. Bɔɔ náá: «Nye naatsik bot esis. Nye kaa tsik nyel'e emet, ye be náá, nye é Mesia Zeeb nato ɔ!»

36 Dɔɔ ne esodja pe nadi ego ne eduk e nye. Be zokazetiila, wɔ gwaa be dje nye menyok me na bwaaz-bwaaz.

37 Bɔɔ ne ne náá: «Ye be náá, wɔ é mekoozi me eYuda ɔ, tsika nyel'ɔ wɔy wɔ emet!»

38 Pe eko e melaaba e Yezu, ye nabe é, be naabek mɔɔ pes le kwyla kɔ tak náá: «MEKOOZI ME EYUDA É NWYAK.»

39 Tɔ bembee e bot ebá nabemaa e melaaba ɔ, ngɔt naabyasal Yezu. Nyey ne ne e náá: «Wɔ paalee náá,

Muu ε Yezu eedelaa

⁵⁰⁻⁵¹ Ye nabe é ne dhiiti mot, din ε le Zozef. Nyε nadi é, mot del ε Alimate dhiiti ghaada eYuda. Nyε nabe é tetε mot, epiki. Nyε nadi ebwood náá, Eyon ε Zεeb zyε, ye nàkwyii zo di náá, nyε nabe é mot ngot tɔ bot boob ekukuma e eYuda. Nyε nabe é ààmyaal egeka bɔɔ, ne esesel bɔɔ.

⁵² Nyε é boozetɔ pε dǎa Pilat kεwaab muu ε Yezu.

⁵³ Bhii tak, Zozef zokasil muu ε Yezu e melaaba, zεwol nyε tɔ bheeza na puu, zεnεεg nyε tɔ εvit ε bes, yii nakpakaa tɔ gho εkok ε.

⁵⁴ Ye nabe é dwoo εkoobal esonok étεp dwoo saba. Tin, nabe é saba moo aakan.

⁵⁵ Boa nadus bε ne Yezu pε kyee dik Ghalile ɔ eezetɔ lɔɔg wat bε ne Zozef. Bɔɔ zokabee εvit ε Yezu ne dǎa bε nanεεg muuε tɔ tak ε.

⁵⁶ Bhii tak bε eezεsik pε ghaada kεkoobal bεmul, ne bεmenanas étεp εkε lɔɔb muu ε Yezu. Dwoo saba bε eezεwala dǎa etsi di é lεε.

24*Egomel ε Yezu*

¹ Kεεη tɔ melem mε yenga boa zetɔ pε εvit. Bε natɔ ε ne bεmul ne bεmenanas bε nasa ε.

² Bε ka bee tin é, εkok ε nadiila εvit ne yε ε moo é mbinjela etsetaεpe ne εvit.

³ Dǎa bε ka ni tɔ εvit ε, bε nabe é ààkabela muu ε Ghεη Yezu.

⁴ Esiiza bɔɔ nadi é ye moo mbεs. E di'enek, bɔtom bεbǎ eezεtuula bε, ne ekaad e na kas-kas.

⁵ Boa é boosil mis pε si ne bwoo. Bɔtom binɔk eezεke ne nɔɔ náá: «Étεp yé bi di saa tɔ myonj mot di náá, nyε é ne tsik ɔ?

⁶ Nyε tokapε wak; nyε eezegom. Siizaka sa nyε nalεε bin esok bi nε nɔɔ nadi pε Ghalile ε:

⁷ “Ye goka ε náá, bot ε mesyem met Sεεηελε Mɔn Mot, bem nyε e melaaba. Bhis mεlu mεlεl, ye goka ε náá, nyε gom.”»

⁸ Tin, bε eetaala sa Yezu nalii nε nɔɔ ε.

⁹ Bhii tak bε eezεdus pε mεvit, sik pε dεl, kεbanja bεdjekel kam nε ngɔt nalik ɔ zεnɔɔ bak bεdhiiti bεdjekel.

¹⁰ Bot ε tak nabe ε Maali moma dεl ε Makdala, Zan zεnɔɔ Maali, nyεεg ε Zak. Bεdhiiti boa nadi bε nε bε nɔɔ ɔ, nabaazo zεlεε bot ε lwoma etεp binek ε tyε wat nε bot ε nazeleε sok ɔ.

¹¹ Deenek, bε nabe ε àadyeebamyaal tεp tak, bɔɔ nadi gek ε náá, etεp ee boa binɔk nadi lεε bε ε, nabe ε etsal.

¹² Tin, Pyεed zokazεwyel «piya», sum kaab, tɔ pε εvit. Kuma nyε nakum e di tak ε, nyε eezεmalal, gwyák tɔ εvit, àabee muu. Nyε nazobee ε ekaad e na puu bε napil nyε tɔ tak ε. Bhii tak nyε eezεnɔɔ nyel, sik pε ndjaa ε djoka kɔkɔ mbi sa nyε bee ε.

Yezu eetel nyel nε bεdhiiti bεdjekel εbá pε ze dεl ε Emayus

¹³ E dwoɔ tak wat, bεdjekel nadi etɔ pε dεl ε Emayus, dεl ε tak na tseta nε Yeluzalεm tyee ba mεwala mεmbá goη meko.

¹⁴ Bot ε tak nadi sɔs etεp djas ee nadhanj ε.

¹⁵ Dáa bε nadi kuku kyeed ε εtanjal nε εsɔs ε, wɔ gwaa, Yezu nyε εmet zokazεtiila pε yɔɔ, nyε eezεni e lɔɔg'ɔɔ. Bε moo tin ε kεsama wat.

¹⁶ Bε nadi bee nyε. Tin, ye nabe ε nε sa wat nadipal bε mis etεp bε needi àagwyak nyε é.

17 E di'enek, Yezu eezɛdji bɛ náá: «Éyɛ bi di sɔs biyɔ, é kɛgba-a-gba?» E di'enek, bɛ eezɛtyaa, mɛnyel e teka nɛ eghon tɔ elyem.

18 Ngɔt pak'ɔɔ, mot nadi djóoaa Keleopat ɔ zokazɛke nɛ nɛ náá: «Pɛ kɔ dɛlɛ Yeluzalɛm djas, mot di ààgu etɛp ee sɛɛ penek tɔ tsil mɛlu mak é wɔy wɔ ɛmet!»

19 Yezu eezɛdji bɛ náá: «Ha yɛ sɛɛ penek?» Bɛ eezɛbɔɔza nɛ nɛ náá: «Sa nasɛɛ dum nɛ Yezu mot dɛlɛ Nazalɛt ɛ! Nyɛ nabe é ngooelɛl-mɛkpa ɛ Zɛɛb ngɔt nɛ mɛbwala ɛbuɛpe. Nyɛ naalyaal yɛ tɔ kɔkɔ mɛsa mɛ, nɛ etɛp ee nyɛ nadi lelii é mis ɛ Zɛɛb nɛ e mis mɛ bot djas ɛ.

20 Bot ɛ di kɔ elo eboo bɛghaa-Zɛɛb bina ɔ, nɛ ekukuma bina naaka nyɛ étɛp bɛ neepɛɛ Yezu epɛɛ e ɛsyee, da bhii tak, nyɛ é kɛ ɛbɛmaa ɛ, é mɛlaaba.

21 Bis nadi é, nɛ ɛbwaalel náá, nyɛ nabe é mot nawaazɛpɛk Yisalaɛl e bhel ɔ. Saabɛgɔs é náá, ye moo mos é mɛlu mɛlɛl etɛp binek djas nazɛsɛɛ.

22 Bɛdhiiti boa tɔ ɛdhuu ɛlis eediaadjoka bis. Ye é tsɛɛtsɛ náá, ye bɛ é bɛ eetɔ pɛ ɛvit tɔ ghooghom mɛlem.

23 Deenek, bɛ bɛ ààbee muuɛ. Bhii tak bɛ eezɛlɛɛ bis náá, ye bɛ é, Zɛɛb eebɛɛ bɛ mis mɛ bee efofop. Efofop e tak lɛɛ bɛ náá, Yezu é nɛ tsik!

24 Bɛdhiiti pak'es zokatɔ pɛ ɛvit, bɛ ka bela es-onok é dɔ́a boa binɔk nazolɛɛ. Tin, Yezu nɛ Yezu nyɛ ɛmet é di náá, bɛ nabe é ààbela nyɛ.»

25 Bhis yenek Yezu eebɔɔza nɛ nɔɔ náá: «Bi tok nɛ etson, etɛɛ náá, elyɛl ɛ bin nɛ ɛmyaal etɛp djas ee bɛngooelɛl ɛ mɛkpa ɛ Zɛɛb nakwyal ɛ!

26 Ye nabe é ààgoka náá, Mɛsia zuk. Bhii tak é nyɛ aaka ni tɔ duma yɛ?»

27 Bhii tak nyε moo tin é lεε bε etεp ee nalεεel dum nε nε tō ekwyaλα ε djas. Nyε nakan é, tō etsi ε Moiiiz, zεnōō yii ekwyaλα mε bεdhiiti bεngoolεl ε mεkpa ε Zεεb.

28 Dáa bε nabε, bε moo kunaa nε dεl ε bε nadi é tō ε, Yezu eezεsa tyee náá, nyε nadi dhaa yε.

29 Tin, bε eezεbee nyε. Bōō nε nε náá: «Pokosulal menabelka wak, etεε náá, dwoō eezεsila. Egwyitok moo aagwyiidela.» Tin, nyε eezεmyaal εsulal e di wat bε nε bε nōō.

30 Deenek, bε eezεdisi e mesa bε nε bε nōō, bhii tak nyε eezεnōō tsim mapa, nyε eezεghaapεε Zεεb, nyε eezεpyak, nōō yε djε bε.

31 E di'enek, mis mōō eezεbεηel, bhii tak bε eezεgwyak nyε. Tin, wō gwaa nyε zεdiib bε e mis.

32 Bε moo tin é sōs pak'ōō náá: «Elyem bε mena ààdi dak esok nyε di é lii nε nena gba-gba ε, esok nyε di kaada mena sa ekwyaλα nadi é lεε ε?»

33 E di'enek wat, wō gwaa bε zεwyel «ngbat». Bε eezεsik pε Yeluzalεm, bε eezεbela bεdjekel kam nε ngōt e di wat bε nε bεdhiiti bot ε lōōg'ōō.

34 Bōō é keke náá: «Ye é tsεεtsε náá: Ghεη eegom tō εsyee! Simōη bε é, nyε eebee nyε!»

35 Tin, bōō bε εmet eezεni é baηa bε dáa ye nadhaa nε nōō pε bε nadus ε, nε dáa bε nakagwyák Yezu esok nyε napyak mapa ε.

Yezu eelyaal bεdjekel bε geka, bε neegu nád, nyε é nε tsik

36 Dwoō tak wat, bikoko, dáa bεdjekel nadi bε dinaa é sōs pak'ōō ε, Yezu nyε εmet eezεtuula tō lōō. Nyey nε nōō náá: «Zεεb djε bin egwyem!»

³⁷ Bɛdjekɛl djas moo pwak, bɛ moo ɛ nɛ bwɔɔ. Nɛ tsɛɛtsɛ, bɛ nagu ɛ nɔ́á, bɛ eebee dim, ghuna ye ɛ Yezu.

³⁸ Yezu ka ke nɛ nɔɔ ɛ nɔ́á: «Étɛp yé bi di pwak? Étɛp yé bi di nɛ mɛso?»

³⁹ Gwyákeka meez mam, nɛ mɛko mam. Nɛ tsɛɛtsɛ ye ɛ mam. Bwooka mɛ, da bi ɛ gwyák mɛ. Dim tok nɛ epuud nɛ egwyɛs dɔ́a mam, dɔ́a bi di bee'aak.»

⁴⁰ Nyɛ eezɛke nɛ nɔɔ deenek. Bhii tak, nyɛ eezɛlyaal bɛ mɛmbɔ nɛ mɛko mɛ.

⁴¹ Dɔ́a bɛ nadi bɛ dinaa àànyɔ ɛmyaal nɔ́á, Yezu eegom ɛ, tin, Yezu eezɛdji bɛ nɔ́á: «Bi ɛ nɛ edee e dek wak ee?»

⁴² Tin, bɛ eezɛdje nyɛ pes su ndika.

⁴³ Wɔ gwaa Yezu zɛnɔɔ yɛ nɔ́á, dɛ e mis mɔɔ.

⁴⁴ Bhii tak nyɛ eezɛke nɛ nɔɔ nɔ́á: «É sok mɛ nadi menabɛlka dinaa ɛ di wat ɛ, mɛ nabɛ ɛ, mɛ naalɛ bin nɔ́á: “Étɛp ee di kwyala kɔ ɛsu ɛ lam tɔ etsi ɛ Moiiiz, nɛ tɔ Mɛkana mɛ bɛngooelɛ ɛ mɛkpa ɛ Zɛɛb nɛ tɔ bɛmɛkana mɛ Mɛdjeeb ɛ waasaɛl djas.”»

⁴⁵ Yezu ɛ boozɛdje bɛ etson ɛtɛp bɛ neegwak sa nakwyalaa ɛ.

⁴⁶ Nyɛy nɛ nɔɔ nɔ́á: «Beeka sa ze kwyaalɛ ɛ: Ye goka ɛ Mɛsia zuk, da nyɛ ɛ gom bhis mɛlu mɛlɛl.

⁴⁷ Ye goka ɛ nɔ́á, bi tuud bot nɛ din ɛ lɛ pɛ dɔ́a bot ɛ di ààbɛ bot ɛ mbyak ɛYuda ɔ djas, kan pɛ Yeluzalɛm nɔ́á, bot liig elyem. Tin, Zɛɛb ɛ waapel mesyem mɔɔ.

⁴⁸ Biyɔ ɛ kwaa di bɛtyaasɛs esee ee bi zebee ɛ djas.

⁴⁹ Bhii tak, mam ɛmet ɛ waadhɛs sa Saag'am nakɛk ɛ. Ye kabɛ biyɔ bɛ ɛmet ɔ, dika tɔ ghaada, ɛtɛp ɛbwood nɔ́á, Zɛɛb dje bin ghwyil aadus tɔ gwɔɔ ɛ.»

Yezu eebyet tɔ gwoo

⁵⁰ Bhii tak, Yezu ε zεwyis, bε nε bεdjekel bε, kɔ ghaada, nyε eezεtɔ e ngwoob dεl ε Bhetani. E di'enek, nyε ε boo bin mεmbɔ pε εko, zεsεε bε mεtel.

⁵¹ Esok nyε nadi ε sεε bε mεtel ε, nyε eezεbεka nε nɔɔ, byet tɔ gwoo.

⁵² E di'enek, bεdjekel ε booduwal nyε, bula, zyε pε Yeluzalem tɔ boo mεmyaala.

⁵³ Bε naaka didi ε tɔ kok Ndjaa-ebuwa mεlu djas, εtεp εduwal ε Zεεb.

Bekwel

Bekwel: Bekwel (New Testament)

copyright © 2024 Wycliffe Bible Translators, Inc.

Language: Bekwel

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 26 Apr 2025 from source files dated 26 Apr 2025

93bbbee1-b255-555f-8c39-01878a3cad57